

自由书

梁启超

文硕阁

wenshuoge.com

关于我们	5
叙言	7
成败	8
俾士麦与格兰斯顿	10
自由祖国之祖	11
地球第一守旧党	12
文野三界之别	14
英雄与时势	16
近因、远因之说	17
草茅危言	18
养心语录	20
理想与气力	21
自助论	22
伟人讷耳逊轶事	26
放弃自由之罪	27
国权与民权	28
破坏主义	29
自信力	30
善变之豪杰	31
加布儿与诸葛孔明	32
论强权	33
豪杰之公脑	36
谭浏阳遗墨	37
精神教育者，自由教育也	38
祈战死	39
中国魂安在乎	40
答客难	41
忧国与爱国	42
保全支那	43
传播文明三利器	44
傀儡说	45
动物谈	46
惟心	47
慧观	49
无名之英雄	50
志士箴言	52

天下无无价之物	54
舌下无英雄，笔底无奇士	55
世界最小之民主国	56
维新图说	57
十九世纪之欧洲与二十世纪之中国	58
俄人之自由思想	60
二十世纪之新鬼	63
难乎为民上者	66
烟土披里纯	67
无欲与多欲	69
说悔	71
机埃的格言	73
富国强兵	76
世界外之世界	77
舆论之母与舆论之仆	79
文明与英雄之比例	80
干涉与放任	82
不婚之伟人	83
嗜报之国民	84
奴隶学	85
希望与失望	86
国民之自杀	87
成败	88
加藤博士《天则百话》	89
记斯宾塞论日本宪法语	94
中国之社会主义	96
记日本一政党领袖之言	97
记越南亡人之言	99
张勤果公佚事	103
孙文正公饰终之典	104
苏彝士运河故道	105
民兵与佣兵之得失	106
治具与治道	107
学问与禄利之路	108
不悦学之弊	109
警偷	110
雪浪和尚语录二则	111
使法必行之法	113

治治，非治乱 114

君主无责任之学说 115

所令与所好 116

好修 117

怨天者无志 118

欲恶取舍 119

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

叙言

自东徂以来，与彼都人士相接，诵其诗，读其书，时有所感触，与一二贤师友倾吐之，过而辄忘。无涯生曰：盍撮而记之？自惟东鳞西爪，竹头木屑，记之无补于天下。虽然，可以自验其学识之进退，气力之消长也，因日记数条以自课焉。每有所触，应时援笔，无体例，无宗旨，无次序；或发论，或讲学，或记事，或抄书，或用文言，或用俚语，惟意所之。庄生曰：“我朝受命而夕饮冰，我其内热欤。”以名吾室。西儒约翰·弥勒曰：“人群之进化，莫要于思想自由、言论自由、出版自由。”三大自由皆备于我焉，以名吾书。

己亥七月一日，著者识。

成败

凡任天下大事者，不可不先破成败之见。然破此见，大非易事。必知天下之事，无所谓成，无所谓败，参透此理而笃信之，则庶几矣。何言乎无所谓成？天下进化之理，无有穷也，进一级更有一级，透一层更有一层。今之所谓文明大业者，自他日观之，或笑为野蛮，不值一钱矣。然则所谓成者果何在乎？使吾之业能成于一国，而全世界应办之事复无限，其不成者正多矣；使吾之业能成于一时，而将来世界应办之事复无限，其不成者正多矣。况即以一时一国论之，欲求所谓美圆满好、毫无缺憾者，终不可得，其有缺憾者，即其不成者也。盖世界之进化无穷，故事业亦因之无穷，而人生之年命境遇、聪明才力则有穷，以有穷者入于无穷者，而欲云有成，万无是处。何言乎无所谓败？天下之理，不外因果。不造因则断不能结果，既造因则无有不结果，而其结果之迟速远近，则因其内力与外境而生种种差别。浅见之徒，偶然未见其结果，因谓之为败云尔，不知败于此者或成于彼，败于今者或成于后，败于我者或成于人。尽一分之心力，必有一分之补益，故惟日孜孜，但以造因为事，则他日结果之收成，必有不可量者。若怵于目前，以为败矣败矣，而不复办事，则遂无成之一日而已。故办事者立于不败之地者也，不办事者立于全败之地者也。苟通乎此二理，知无所谓成，则无希冀心；知无所谓败，则无恐怖心。无希冀心，无恐怖心，然后尽吾职分之所当为，行吾良知所不能自己，奋其身以入于世界中，磊磊落落，独往独来。大丈夫之志也，大丈夫之行也。

日本维新之首功，西乡乎？木户乎？大久保乎？曰唯唯否否。伊藤乎？大隈乎？井上乎？后藤乎？板垣乎？曰唯唯否否。诸子皆以成为成者也，若以败为成者，则吉田松阴其人是也。吉田诸先辈造其因，而明治诸元勋收其果。无因则无果，故吉田辈当为功首也。考松阴生平欲办之事，无一成者：初欲投西舰逃海外求学而不成，既欲纠志士入京都勤王而不成，既欲遣同志阻长藩东上而不成，事事为当道所抑压，卒坐吏议就戮，时年不过三十，其败也可谓至矣。然松阴死后，举国志士，风起水涌，卒倾幕府，成维新。长门藩士最有力焉，皆松阴之门人也。吾所谓败于今而成于后，败于己而成于人，正谓是也。丈夫以身任天下事，为天下耳，非为身也。但有益于天下，成之何必自我？必求自我成之，则是为身也，非为天下也。

吉田松阴曰：“今之号称正义人，观望持重者，比比皆是，是为最大下策；何如轻快捷速，打破局面，然后徐图占地布石之为胜乎？”又曰：“士不志道则已，苟志道矣，而畏祸惧罪，有所不尽于言，取容当世，贻误将来，岂君子学者之所为哉？”又曰：“今日事机之会，朝去夕来，使有志之士，随变喜怒于其间，何能为为？”又曰：“当今天下之事，有眼者皆见而知之。吾党为任甚重，立志宜大，不可区区而自足。”又曰：“生死离合，人事倏忽，但不夺者志，不灭者业，天地间可恃者独是而已。死生原是开阖眼，祸福正如反覆手。呜呼！大丈夫之所重，在彼不在此也。”又曰：“今世俗有一说曰，时尚未至，轻动取败，何如浮沉流俗，免人怪怒，乘时一起，攫取功名耶？当今所谓有志之士，皆抱持此说。抱持此说者，岂未

思今上皇帝之宸忧乎？宸忧如彼，犹抱持此说，非士之有志者也。”以上各条，吾愿以书诸绅，亦愿我同志以书诸绅。

读松阴之集，然后知日本有今日之维新者，盖非偶然矣。《老子》曰：“不为天下先。”盖为天下先者，未有不败者也。然天下人人皆畏败而惮先，天下遂以腐坏不可收拾。吉田松阴之流，先天下以自取败者也。天下之事，往往有数百年梦想不及者，忽焉一人倡之，数人和之，不数年而遍于天下焉。苟无此倡之之一人，则或沉埋隐伏更历数十年、数百年而不出现，石沉大海，云散太虚而已。然后叹老氏之学之毒天下，未有艾也。

俾士麦与格兰斯顿

欧洲近世大政治家，莫如德之俾士麦，英之格兰斯顿。俾士麦之治德也，专持一主义，始终以之。其主义云何？则统一德意志列邦是也。初以此主义要维廉大帝而见信用，继以此主义断行专制扩充军备，终以此主义挫奥蹶法。排万难以行之，毕生之政略，未尝少变。格兰斯顿则反是，不专执一主义，不固守一政见。故初时持守旧主义，后乃转而为自由主义；壮年极力保护国教，老年乃解散爱尔兰教会；初时以强力镇压爱尔兰，终乃倡爱尔兰之当自治。凡此诸端，皆前后大相矛盾。然其所以屡变者，非为一身之功名也，非行一时之诡遇也，实其发自至诚，见有不得不变者存焉。夫世界者，变动不居者也。一国之形势，与外国之关系，亦月异而岁不同者也。二三十年前所持之政见，至后年自觉其不适用，而思变之，智识日增之所致乎，庸何伤焉？故能如格兰斯顿者，可谓之真维新，亦可谓之真守旧矣。俾公坚持其主义，而非刚愎自用者所得藉口；格公屡变某主义，而非首鼠两端者所可学步，曰：惟至诚之故。

凡任天下大事者，不可无自信力。每处一事，既见得透，自信得过，则出一往无前之勇气以赴之，以百折不回之耐力以持之。虽千山万岳一时崩坼而不以为意，虽怒涛惊澜蓦然号鸣于脚下而不改其容；猛虎舞牙爪而不动，霹雳旋顶上而不惊；一世之俗论，器器集矢，而吾之主见如故；平生之政党，纷纷离合，而吾之主见如故。若此者，格兰斯顿与俾士麦正其人也。格公倡议爱尔兰自治之时，自党分裂，腹心尽去，昨日股肱，今日仇敌，而格公不少变，乃高吟曰：“舍兹子兮涕滂沱，故旧绝我兮涕滂沱。呜呼！绵绵此恨兮恨如何？为国家之大计兮，我终自信而不磨。”俾公为谋德国之合邦，或行专断之政策，或出压制之手段，几次解散议院而不顾，几次以身为舆论之射鹄而不惧。尝述怀曰：“以我身投于屠肆，以我首授于国民，我之所以谢天下苍生者尽于是矣。虽然，我之所信者终不改之，我之所谋者终不败之。”呜呼！此何等气概，此何等肩膀！非常之原，黎民惧焉。非有万钧之力，则不能收一寸之功。

自由祖国之祖

北亚美利加洲有一族之人民焉，距今二百七十余年前，其族之先人百有一人，苦英苛政，相率辞本国，去而自窜于北美洲蓬艾藜蒿之地。栉风沐雨，千辛万苦，自立之端绪稍萌芽焉。其初至之地曰普利摩士，遗迹至今犹有存者。尔后有志之士，接踵而来，避秦而觅桃源者，所在皆是，积百有余年，户口渐繁，财政渐增。至1775年，既弥漫于十三州之地，遂建义旗，脱英羁轭，八年苦战，幸获胜利。遂为地球上一大独立国，即今之美国是也。回忆此一百有一之先人，于1620年12月22日，冽风阴雪中，舍舟登陆，蜚足而立于太平洋岸石上之时，其胸中无限块垒抑塞，其身体无限自由自在，其襟怀无限光明俊伟，殆所谓本来无一物者，而其一片独立之精神，遂以胚胎孕育今日之新世界。天下事固有种因在千百年以前，而结果在千百年以后者。今之人有欲顶礼华盛顿者乎？吾欲率之以膜拜此百有一人也。

地球第一守旧党

有地球第一守旧党，曰梅特涅，奥地利之宰相也。自1809年至1848年，凡四十年间，掌握欧洲之大权。初为奥外部大臣，自1821年，胜意大利之后，晋兼首相，乘当欧洲全局外面和平无事、上恬下嬉之时，弄其小智小术，收全欧之霸权，归其掌中。既以其简单武断之制度，操纵繁杂文明之奥国，尤以为未足，又干涉日耳曼、意大利之内政，欲待普鲁士以属邦之礼。其政策专以愚黔首为宗旨，其行事专以模棱两可为长技，其于演说文章，务为浮泛暧昧之旨，以掩蔽其浅薄固陋之智识。其待人民也，不许有参与政事之权，以为民者惟当供纳租税以奉其上耳，舍此更无他权利。其意以为欲使奥国之威，加于欧洲，惟当注意外交之事务，锐敏熟练而已。又当到处设警察、间谍，以施临机之策，故其全副精神，皆用于此，专执锁国主义，禁他国之智识、技艺、器械，不使入奥境，犹畜牧者之防兽疫也。乃先禁止奥国臣民子弟留学于他邦之大学者，又禁国内大小学校之聘外国人为教师，及十岁以上，外国人子弟之入学者。又国中民间自立之学校，待之极为严酷，其设立仅限期六年之久，又非经警察官之稽查，不许开学。就中如政治学，如近世历史，尤其所最厌忌也。故当时日耳曼诸邦，哲学、历史、格致、政治诸学大盛，而奥国阒然无闻，其学校所授者，惟东方之语言、文字、诗歌等学而已，又授以柔人精神、止人不平之音乐，所授之学，惟以呆板之器械而已。毫不言其所以然之地，恐人因穷理而生智慧也。其于人民也，软弱者则压制之，愤激者则笼络之，或引致诸贵显，以消其不平之气，曾屡次见民情汹涌，出奸智以了事。乃造假宪法，名为许民权，实则压抑民权。加以当时俄、普、奥三帝设立神圣同盟，欲以专制民贼之政，大施于各国，梅特涅利用之，献媚各君主，以行其鬼蜮之计。日耳曼南部屡次独立，以兵力压制之；意大利屡次独立，亦以兵力压制之。盖不独为奥国之罪人而已，当十九世纪上半纪，使欧洲各国黑暗于上，而龌龊于下者，皆梅特涅一人之为之也。至1848年，欧洲中原各国革命之运已臻其极，奥国势不能以孤木立于洪涛巨涨之中，于是3月13日，人民数万群集于议事堂前，谓改革制度，众怒如火，激昂义愤之声遍于国中，卒乃不可压抑。以人民之公议，而流梅特涅于英国，于是奥人始得复见天日，而全欧洲之大魔王乃摧灭矣。

饮冰子曰：梅特涅之禁绝外国学问也，非禁形式上之学问，而禁精神上之学问也。精神上之学问者何？民权、自由是也。人民一知民权、自由之理，则其操纵驾驭苟且粉饰之术，将无所用，故不得不以死力挫其锋也。当时欧洲之民智既已大开，自治独立之声遍于全欧，而梅特涅出其阴谋诡计，犹能弥缝而掩饰之者，殆四十年，可不谓才士也夫？虽然，民权、自由者，天下之公理也。世界自然之进步，积其资格以及于今日，既已磅礴郁积，持满而必发，譬之经严冬沍寒以后，春风一度，勾出萌达，万绿齐茁，夫宁可压制耶？夫宁可压制耶！譬之奔流，壅之愈甚，则决之愈烈，吾甚悲夫以梅特涅之才，执欧洲中原四十年之牛耳，费尽心计，担尽惊恐，徒博得身败名裂，为天下万世指笑而唾骂之。噫嘻，是亦不可以已乎！抑世有才不及梅特涅，而欲学其愚民武断、模棱两可之术，以固宠沽名于一时者，吾益不知其

所终极矣。

孔子曰：“恶紫之夺朱也，恶郑声之乱雅乐也。”其南皮张公之谓乎？彼张公者，岂曾知中国为何状，岂曾知西国为何物，岂曾知西人为何学，而贸贸然号于众曰：吾知西法者。世人亦贸贸然推之曰：是知西法者。夫天下无一人知西法者，吾犹有望焉。何也？彼其一旦知之，而进步之骤，将不可限量也。今天下知西法之人如张公者，不下千万，而中国之亡真不可救矣。张公著《劝学篇》，以去岁公于世，挟朝廷之力以行之，不胫而遍于海内，其声价视孟的斯鸠之《万法精理》、卢梭之《民约论》、约翰·弥勒之《自由公理》初出世时，殆将过之。噫嘻！是噉噉嚙嚙者何足道？不三十年将化为灰烬，为尘埃野马，其灰其尘，偶因风扬起，闻者犹将掩鼻而过之。虽然，其于今者二三年中，则俨然金科玉律，与《四书》《六经》争运矣。天下事凡造因者必有结果，今张公复造此一层恶因，其谬见浸染于蚩蚩者之脑中，他日抵制其结果，固不得不费许多力也。伟哉！南海何沃生、三水胡翼南之二君者，廓清而辞辟之，如铸禹鼎，图罔两之形状；如然温犀，照百怪之症结。《〈劝学篇〉书后》一卷，排中国文明之阻力，其功不在禹下。张公见之，如以为莠言乱政乎？吾愿其集幕府中理学、经学、气节、文章之士，更为《书〈劝学篇书后〉后》一书，则距邪说扶正学之功，不益多乎？虽然，吾有知张公之能怒而不能言也。

。

文野三界之别

泰西学者分世界人类为三级：一曰蛮野之人，二曰半开之人，三曰文明之人。其在《春秋》之义，则谓之据乱世、升平世、太平世。皆有阶级，顺序而升。此进化之公理，而世界人民所公认也。其轨度与事实，有确然不可假借者。今略胪列之如下。

第一，居无常处，食无常品；逐便利而成群，利尽则辄散去；虽能佃渔以充衣食，而不知器械之用；虽有文字，而不知学问；常畏天灾，冀天幸，坐待偶然之祸福，仰仗人为之恩威，而不能操其主权于己身。如是者谓之蛮野之人。

第二，农业大开，衣食颇具，建邦设都，自外形观之，虽已成为一国，然观其内，实则不完备者甚多。文学虽盛，而务实学者少；其于交际也，猜疑之心虽甚深，及谈事物之理，则不能发疑以求真是；模拟之细工虽巧，而创造之能力甚乏，知修旧而不知改旧；交际虽有规则，而其所谓规则者，皆由习惯而成。如是者谓之半开之人。

第三，范围天地间种种事物于规则之内，而以己身入其中以鼓铸之；其风气随时变易，而不惑溺于旧俗所习惯；能自治其身，而不仰仗他人之恩威；自修德行，自辟智慧，而不以古为限，不以今自画，不安小就，而常谋未来之大成，有进而无退，有升而无降；学问之道，不尚虚谈，而以创辟新法为尚；工商之业，日求扩充，使一切人皆进幸福。如是者谓之文明之人。

论世界文野阶级之分，大略可以此为定点。我国民试一反观，吾中国于此三者之中居何等乎？可以瞿然而兴矣！

国之治乱，常与其文野之度相比比例。而文野之分，恒以国中全部之人为定断，非一二人之力所能强夺而假借也。故西儒云：“国家之政事，譬之则寒暑表也；民间之风气，譬之则犹空气也。空气之燥湿冷热，而表之升降随之，丝毫不容假借。故民智、民力、民德不进者，虽有英仁之君相，行一时之善政，移时而扫地以尽矣。如以沸水浸表，虽或骤升，及水冷而表内之度仍降至与空气之度相等。”此至浅之理，而一定之例也。故善

治国者必先进化其民。非有孟的斯鸠

（法

国人，著

《万法精理》一书

，言君主、民主、君民共主三种政体

之得失）、卢梭

（法国人，著《民约论》

，言国家乃由民间契约而成者）
，则法国不能成革命之功。非有亚丹·
斯密（英国人，为资生学之鼻祖）
之徒，则英国不能行平税之政。故曰英雄之能事在造时势而已。

英雄与时势

或云英雄造时势，或云时势造英雄，此二语皆名言也。为前之说者曰：英雄者，人间世之造物主也。人间世之大事业，皆英雄心中所蕴蓄而发现者。虽谓世界之历史，即英雄之传记，殆无不可也。故有路得然后有新教，有哥伦布然后有新洲，有华盛顿然后有美国独立，有俾士麦然后有德国联邦。为后之说者曰：英雄者，乘时者也，非能造时者也。人群之所渐渍积累、旁薄蕴蓄，既已持满而将发，于斯时也，自能孕育英雄，以承其乏。故英雄虽有利益及于人群，要不过以其所受于人群之利益而还付之耳。故使路得非生于十六世纪

（西人以耶稣纪年一百年为一世纪）

，而生于第十世纪，或不能成改革宗教之功；使十六世纪即无路得，亦必有他人起而改革之者。其他之实例亦然。虽无哥白尼，地动之说终必行于世；虽无哥伦布，美洲新世界终必出现。余谓两说皆是也。英雄固能造时势，时势亦能造英雄，英雄与时势，二者如形影之相随，未尝少离。既有英雄，必有时势；既有时势，必奋英雄。呜呼！今日禹域之厄运，亦已极矣；地球之杀气，亦已深矣。《孟子》不云乎：“以其数则过矣，以其时考之则可矣。”斯乃举天下翘首企足，喁喁焉望英雄之时也。二三豪俊为时出，整顿乾坤济时了。我同志，我少年，其可自菲薄乎？

意大利当罗马久亡、教皇猖披、奥国干涉，岌岌不可终日之时，而始有嘉富尔；普鲁士当日耳曼列国散漫积弱、见制法人、国体全失之时，而始有俾士麦；美利坚当受英压制、民不聊生之时，而始有华盛顿。然则人特患不英不雄耳，果为英雄，则时势之艰难危险何有焉？暴雷烈风，群鸟戢翼恐惧，而蛟龙乘之，飞行绝迹焉；惊涛骇浪，儵鱼失所错愕，而鲸鯢御之，一徙千里焉。故英雄之能事，以用时势为起点，以造时势为究竟。英雄与时势，互相为因，互相为果，造因不断，斯结果不断。

近因、远因之说

凡天下事，无论大小，必有其所由来。中国学者谓之为“所以然之故”，省而言之，谓之曰“原因”。论事者必求得其原因，然后下断案，则断案必不谬；治事者必针对其原因，然后施方法，则方法必有功。朱子曰：“能求所以然之故，方是第一等学问、第一等事业。”此之谓也。

虽然，原因之中，又分近因、远因两者。近因易见，远因难知，试举一例而明之。譬有酒客，堕马伤腰，遂得半身不遂之症，其治之之法当如何？寻常庸医必曰：病之原因在堕马，当以跌打之药熨贴腰际。如此疗法，必不可愈，何也？盖堕马者不过其近因耳。实则由多年饮酒过度，脊髓既衰，正当蓄病将发之时，适以堕马，激动全体，故遂痹痿耳。善医者则必先使戒酒，断其病之远因，使脊髓复原，则瘳之易易矣。夫医国亦何莫不然。今之口言经济者，辄曰中国之患，贫也弱也，官吏不忠也，乱民遍地也，外国凌逼也。其救之之法则曰练兵也，办团也，筹饷也，劝商也。其尤高识者则曰变旧法也，兴民权也。彼其持论，谁谓不然？以吾观之，虽其所见有高下大小之不同，要之皆治近因之方法，而非治远因之方法；不治远因而欲治近因，则必不可得治。

且犹有一说。近因者常繁多混杂，而使人难觅其头绪。远因则不然，一旦寻得之，则颠扑不破，可依之而定办事之方向。盖近因者每一事必有一因，远因者常合数因以为一因，故递而推之，愈推愈远，则其原因之数愈减少，而据原因以定方法，乃若网在纲，有条而不紊。更举一例以明之。譬诸水之沸腾由薪火而起，人之呼吸由空气而生，此近因也。更进一层以求之，则薪之所以燃者，由薪中所含炭气，与空中之养气相和合而生热也；人之所以呼吸者，由引空中之养气入肺，与血中留存之炭气相和合而吐纳也。然则薪火也，空气也，皆近因也。而其远因则同出于养气。水之沸与人之呼吸，其外形绝异，而其原因之相同乃如此。苟知其故，则欲止沸欬，息喘欬，或欲扬沸欬，顺气欬，皆可以同理之法而治之。所谓通其一，万事毕。其为道虽似迂远，其为法实甚简易。然则求远因者，论事之秘诀，治事之捷法也。夫所谓治远因者何？曰造时势而已。

草茅危言

曩读《亚东时报》有题《草茅危言》者，日本深山虎太郎君所撰，为篇凡三，曰《民权》，曰《共治》，曰《君权》，皆源本泰西硕儒政体之论，切中中国时病者，因录其全文于下。

民权篇

民受生于天，天赋之以能力，使之博硕丰大，以遂厥生，于是有民权焉。民权者，君不能夺之臣，父不能夺之子，兄不能夺之弟，夫不能夺之妇，是犹水之于鱼，养气之于鸟兽，土壤之于草木。故其在一人，保斯权而不失，是为全天；其在国家，重斯权而不侵，是为顺天。勿能保，于天则为弃，疾视而侵之，于天则为背，全顺者受其福，而背弃者集其殃。何者？民与权俱起，其源在乎政府以前，彼宪法云，律令云，特所以维持之，使无失坠，非有宪法、律令而后有民权也。故国人皆曰政府可设，而后政府设，国人皆曰政府可废，而后政府废，国人皆曰宪法、律令可行，而后宪法、律令行，国人皆曰宪法、律令可革，而后宪法、律令革。国家大事措施得失，阖四境之民平议而行，其权盛矣。唯人心之不同，利害交错，莫能画一，且各有生产作业，不能亲政，为古今通患，于是立贤者，以为之王，以为之辅相，假之以柄，以整齐天下。故君相之权，固假之万民，非自有其权也。柳宗元曰：“吏于上者，民之役而非以役民而已。”西人之谚曰：“官吏者，天下之公仆也。”若以民之役役民，以奴仆鞭箠其主人，则不伦孰大于是。余窃观中国古圣贤创业垂训，俱合于泰西民权之宗旨，盖公理无东西，而大道无古今，凡有血气，其积思所至均也。尧、舜官天下，求贤禅让，何与美利坚合众国公举总统之制类也。汤、武顺天应人，以放伐独夫，代膺大位，何与欧洲列国之民迫其政府更革政治类也。孔子对哀公曰：“百姓足，君孰与不足？”孟轲以“君为轻，民为贵”发明民权，岂有彰明较著于此者哉？意者孔、孟之时，距三代不远，尧、舜之道布在方策，令夫一圣一贤，得志于当时，有所成就，盖有难测者矣。惜乎，后世昧于圣哲本旨，不能扩充阐明以成太平，至于大道晦冥，冠履倒置。自秦汉以降，沦胥至今，风气之不开，纪纲之不肃，国本之不固，宫闱之不清，民力之不厚，士气之不振。是由上有背天之政府，而无顺天之君；下有弃天之人，而无敬天之民。今欲举秦汉以来积敝，摧陷而廓清之，以举自强维新之政，则必自恢复民权始。

共治篇

古今东西，一治一乱，盛衰之变，不能百年。今欧美诸邦日跻富强隆治之域，国运蒸蒸乎不知其艾期。是其故何也？不治民而与民共治也。曷言乎治民也？专制为治，独裁为政，有贤明之君在上，则国富兵强，有暗愚之君在上，则国贫兵弱。所谓其人存则其政举，其人亡则其政息。盛衰兴亡之几系在一人，自古贤君少而暗主多，此所以东洋诸国常不振也。曷言乎与民共治也？公议为治，集思为政，举国中之

良，选而委以政焉，故虽有幽、厉不能行其暴，虽有管、蔡不能逞其奸。盛衰兴亡，与一国人心相表里，此所以泰西诸国近大振也。夫人情靡弗好强而恶弱，爱治而忌乱焉。而东洋诸国之遂不免夫乱与贫者，独有尚古薄今之弊，根柢人心，牢乎不拔也。中国儒者开口辄言许身稷、契，致君尧、舜。呜呼！周汉以来论治道者，畴不以尧、舜、禹、汤为指归哉。而唐虞三代之隆治，竟不可得者，非特民心日浇，风气日薄故也。彼唯貌似圣人而忽圣人本旨，故汲汲然揭三代以为旗帜，而三代之治愈远也。余当读史，汉以下历朝帝王不下数百人，而求其聪明睿知，为天下真主者，百中仅得一二耳，中才之君则百五六，庸劣之主则百九十矣。故天下百年而无十年之治，天灾人祸接踵而至，生灵鱼肉，肝脑涂地，宗社亦随而亡。历朝相袭，如环之无端，天下搢绅章甫之士，独不能鉴于前辙，沉溺二典，歌颂三代，以待圣人之出，其愚岂止待河清之比哉？若有人于此，其力能摆脱三千年宿弊，变专制独裁之治，作众思公议之政，中国之天下不足治也。

君权篇

或难余说曰：民权说颇善，然似不与君权相容，为之何如？曰：君依民为重，民依君为重，上下一德，君臣一体，无相侵之理，是为共治之要道。今世界诸国重民权者莫英国若焉，国中四民皆仰英王如父母，君臣之间无纤芥之嫌。去年政府举女王即位五十年庆节，举国欢腾，皆祈王之万年，以至神明。忠爱之忱，沦浃于民心，未闻民权之侵害王权也。世界诸国崇君权者莫突厥若焉，箕敛头会以贪民利，钳口结舌以禁谤言，国民视王如仇讎，寇乱数起，上下解体，彼以君权为维持尊严之具，而不知启民心涣散之渐。今以英国比突厥，其王室之崇卑相距以为何如乎？自古一国之主，亲裁万机，权不旁落，名实两为天子者，唯创业垂统之君为然。至乎中才以下，则皆以政柄委其臣下，有君权之名而无君权之实，况于庸劣之主乎？故权不归宰辅则归外戚，不归外戚则归宦寺，不归宦寺则归藩镇，君唯垂拱拥虚器耳。令宰辅为伊、周，外戚为霍光、窦武，宦寺为张承业、张永，藩镇为郭子仪、田弘正，犹有专权之嫌。若令宰辅为莽、操、卓、懿，外戚为贾充、武三思，宦寺为仇士良、魏忠贤，藩镇为李师道、朱全忠，其为祸将不胜言矣。故其末造有绕柱而走者，有饮鸩投缳者，有比山雀者，有以世世不生天家为祷者，以万乘之贵，求为匹夫而不可得也。英国儒士弥儿曰：“独裁国无爱国之人，有一人，乃其君是耳。”夫独裁专制之君，以天下为家，宜爱其国，既爱其国，宜举其国之贤者委以政事。今顾偏信左右，听于佞幸，以至丧其宗祀者何也？则明有所不见而聪有所不闻也。昔唐德宗谓李泌曰：“人皆以卢杞为奸，而朕遂不知杞之为奸也。”德宗非下才之主，犹有此言，难哉人主知人之智乎！若能以所听于左右者听于国中，以所选于寡者选于众，以所分于宰辅、外戚、宦寺、藩镇者分于亿兆，与之共治天下，何患其不治也。夫从众，君德也，虽专制独裁之主，其初非得众心，则无以取大位，况于发愤自强与欧美争雄者乎？何以削君权为介介哉。

养心语录

人之生也，与忧患俱来；苟不尔，则从古圣哲，可以不出世矣。种种烦恼，皆为我练心之助；种种危险，皆为我练胆之助，随处皆我之学校也。我正患无就学之地，而时时有此天造地设之学堂以饷之，不亦幸乎！我辈遇烦恼遇危险时，作如是观，未有不洒然自得者。

凡办事必有阻力。其事小者其阻力亦小，其事愈大其阻力亦愈大。阻力者乃由天然，非由人事也。故我辈惟当察阻力之来而排之，不可畏阻力之来而避之。譬之江河，千里入海，曲折奔赴，遇有沙石则挟之而下，遇有山陵则绕越而行，要之必以至海为究竟。办事遇阻力者，当作如是观。至诚所感，金石为开，何阻力之有焉！苟畏而避之，则终无一事可办而已。何也？天下固无无阻力之事也。

理想与气力

普相士达因曰：“无哲学的理想者，不足以为英雄；无必行敢为之气力者，亦不足以为英雄。”日本渡边国武述此语而引申其义曰：“今人之弊，有理想者无气力，立于人后以冷笑一世；有气力者无理想，排他人以盲进于政界。”饮冰子曰：理想与气力兼备者，英雄也。有理想而无气力，犹不失为一学者；有气力而无理想，犹不失为一冒险家。我中国四万万人，有理想者几何人？有气力者几何人？理想、气力兼备者几何人？嗟乎！国于天地，必有与立。一念及此，可为寒心。

自助论

日本中村正直者，维新之大儒也。尝译英国斯迈尔斯氏所著书，名曰《西国立志编》，又名之为《自助论》。其振起国民之志气，使日本青年人人有自立自重之志气，功不在吉田、西乡之下矣。原书十三编，有序者凡七，今将其各编之序录出，虽尝鼎一臠，犹足令读者起舞矣。其总论曰：

国所以有自主之权者，由于人民有自主之权。人民所以有自主之权者，由于其有自主之志行。今夫二三十家之民相团则曰村，数村相联则曰县，数县相会则曰郡，数郡相合则曰国。故如曰某村风俗纯实，则某村人民之言行纯实者为之也。曰某县多出货物，则某县人民之力农勤工者为之也。曰某郡艺文蔚兴，则某郡人民之嗜学讲艺者为之也。曰某国福祚昌盛，则某国人民之志行端良、克合天心者为之也。盖总称曰国，分言曰民，殆无二致也。试揭舆地图而观之，自主之国几何，半主之国几何，羈属之国几何。如印度，古为自主之国，今则尽统于英矣。安南，古为自主之国，今则半属于法矣。如南洋中诸国，今莫不为西国之属者。人或只谓西国有英主良辅，故势威加远方。殊不知西国之民，勤勉忍耐，有自主之志行，不受暴君污吏之羈制，故邦国景象赳赳日上，盖有不期然而然者，且不独此也。西国之君，大用其智则其国大乱，小用其智则其国小乱，载在史册，历历可征。方今西国之君，不得以己意辄出一令，不得以己命辄囚系一人，财赋之数由民定之，军国大事，非民人公许，不得举行。盖西国之君，譬则御者也；民人，譬则乘车者也。其当向何方而发，当由何路而进，固乘车者之意也，御者不过从其意施控御之术耳。故君主之权者，非其私有也。阖国民人之权，萃于其身者是已。唯然，故君主之所令者，国人之所欲行也。君主之所禁者，国人之所不欲行也。君民一体，上下同情，朝野共好，公私无别，国之所以昌盛者，其不由此欤。余尚记童子时，闻清英交兵，英屡大捷，其国有女王曰维多利亚，则惊曰：“眇乎岛徼，出女豪杰乃尔，堂堂满清，反无一个是男儿耶？”后读《清国图志》，有曰：“英俗贪而悍，尚奢嗜酒，惟技艺灵巧。”当时谓为信然，及前年游于英都，留二载，徐察其政俗，有以知其不然。今女王不过寻常老妇，含饴弄孙耳，而百姓议会权最重，诸侯议会亚之，其被选于众，为民委官者，必学明行修之人也。有敬天爱人之心者也，有克己慎独之工夫者也，多更世故长于艰难之人也，而权诈儇薄之徒不与焉，慢神欺心之人不与焉，酒色货利之徒不与焉，喜功生事之人不与焉。其俗则崇尚德义，慕仁慈，守法律，好赈济贫病者。国中所设仁善之法规，不遑殫述，姑举其一。贫家子女所往学之学院，通计三万有余所，学徒二百万人，昼间有职务者所往学之学院，名夜学院者，二千有余所，学徒八万人。凡此系民人公同捐银而设者，官府不与焉。凡百之事，官府之所为十居其一，人民之所为十居其九。然而其所谓官府者，亦唯为民人之利便而设之会所耳，如贪权势、擅威刑之事无有也。抑以通国之广，人民之多，岂一无奸宄不法之徒乎？然审其大体，则称曰政教风俗擅美西方可也。而魏氏之书，徒称其贪悍尚奢嗜酒，是盖见西国无赖之徒居东洋者而概言之耳。何其谬哉！余又近读西国古今俊杰之传记，观其皆有自主自立之志，有艰难辛苦之行，原于敬天爱人

之诚意，以能立济世利民之大业。益有以知彼土文教昌明，名扬四海者，实由于其国人勤勉忍耐之力，而其君主不得而与也。尝闻善马有驾车者，不加鞭策而自能行，不待控御而自能驰，及御者妄引缰绳，多加挞责，而其马扞格牴牾，顿致不能行。呜呼！坤舆之内，何国不善？何民不良？由于御者之喜功滋事，而致不遂其性，不能存其天良者，盖亦多哉。

第一编序。（论邦国及人民之自助）

余译是书，客有过而问者曰：子何不译兵书？余曰：子谓兵强则国赖以治安乎？且谓西国之强由于兵乎？是大不然。夫西国之强，由于人民笃信天道，由于人民有自主之权，由于政宽法公。拿破仑论战曰：“德行之力，十倍于身体之力。”斯迈尔斯曰：“国之强弱，关于人民之品行。”又曰：“真实良善，为品行之本。”盖国者人众相合之称，故人人品行正，则风俗美；风俗美，则一国协和；合成一体，强何足言？若国人品行未正，风俗未美，而徒汲汲乎兵事之是讲，其不陷而为好斗嗜杀之俗者几希，尚何治安之可望哉？且由天理而论，则欲强之一念，大悖于正矣。何者？强者，对弱之称也。天生斯民，欲人人同受安乐，同修道德，同崇知识，同勉艺业，岂欲此强而彼弱，此优而彼劣哉？故地球万国当以学问文艺相交，利用厚生之道，互相资益，彼此安康，共受福祉，如此则何有乎较强弱竞优劣哉？夫人知天命之可畏，以真实之心，行良善之事，一人如此，一家如此，一国如此，天下如此。爱日仁风，四海含欢，慈云和气，六合呈祥，如此则亦何有乎甲兵铙炮之用哉？古不云乎，“兵者凶器，战者危事也。”仁者无敌，善战者服上刑，一人之命，重于全地球，匹夫之善行，有关系于邦国天下者。乃以贪土地之故，使至贵至重之人命，横罹极惨极毒之祸，其违皇天之意，负造化之恩，罪不可追矣。西国近时大省刑罚，然独未能全戢干戈，岂其教化有未洽者耶？抑宇宙泰运之期未至耶？呜呼！六合之际，礼教盛而兵刑废，当有日也，惧余与子未及见之而已。客唯唯而退，遂书以弁卷首。

第四编序。（论用心之勤勉及作业之耐久）

真正学士，不耻为贱业，耻之者非真正学士；真正文人，不嫌为俗务，嫌之者非真正文人。昔者赵岐卖饼于北海市中，沈麟士织帘读书，手口不辍。天下后世，不啻不贱之，而反更重之。程明道佾书镇南判官，管库细务，无不尽心，屡平反重狱；苏子瞻佾书凤翔府，判官意其文人，不以吏事责之，子瞻尽心其职，老吏畏服。二公之贤，于是滋见焉。今之读书者，或耻以贱业治生，又不屑为俗务，及不得已而卖履贩缯，或折腰五斗，则一切束书不观，曰我无暇矣。呜呼！人病无志耳，果有志矣，不病乎无暇也。试思子瞻在凤翔，何等繁剧，而是时所作，如《凤翔八观诗》，锻炼敲推，亦何其绰绰有余暇也。且学问之功，贵乎循序渐进，经久不辍，故一日不必要多时也。尝有一官谓某先生曰：予职务鞅掌，患读书少暇。对曰：君读书如走马看灯，虽每日二六时中，一意从事，积至于十年，不能成业也。其人怫然

。先生曰：君每日只读要书二三枚，深思牢记，十年之后，必博议超众矣。旨哉言乎，如兹编所载德留斯格的，一为理学名家，而以造鞋为职业。一为诗文巨匠，而毕生不废吏务。大有足砥砺后人之志行者焉，予深望读者之反覆致思也。

第五编序。（论机会及勉修艺业之事）

天下之事，不止千万，然察其成败得失之机，一皆决于“诚”“伪”之二字而已矣。以发于国政，则公私之别也；以见于人品，则善恶之别也；以显于学术，则邪正之别也；以著于工艺，则巧拙之别也。今夫木之大者，凌霄汉，战风雨，苍皮黛色，千年尚新，然溯其始，则一粒种子，托根于地中而已。川之洪者，溉田野，泛艨艟，百折不绝，万古不息，然探其源，则一道活泉，坌涌而出耳。是知种子者木之诚也，活泉者川之诚也，唯其有是诚，所以成其大。物尚然，况于人乎？人苟有一片之诚存于胸中，则虽若甚微不可见，而实为万事之根源，可以修艺事，可以植学识，可以治民人，可以交神明，此编曰勉强忍耐，曰善乘机会，曰不忽小事，曰偶然解悟者，不一而足。是皆人之所以成其业也。然而推其本，则不外于一诚之发为此数者而已矣。是故读书学问者，及学工事者，当自问于己曰：果然发于诚心否？苟发于诚心矣，则自能勉强忍耐，自能善乘机会，自能不忽小事，自能偶然解悟。盖有不期然而然者焉。吕新吾曰：“才自诚出。才不出于诚，不得算个才，诚了自然有才。今人不患无才，只是讨一‘诚’字不得。”斯言也，可为世间才子顶门一针。

第八编序。（论刚毅）

或曰：泰西多出刚毅之人，盖一由于天气沍寒，躯干坚实，一由于土地硃确，非勤勉不得食。余曰：此事容或有之，然其大本，不在此区区者。曰：何也？曰：泰西人所以多有刚毅之行者，由于有刚毅之原质也。曰：何谓刚毅之原质？曰：慈也，信也。不观杂末耶维廉士之事乎？确信其道，爱人如己，痛苦不避，死生不易。不观翰回沙泊之事乎？多救婴儿之命，永脱黑奴之苦，千艰万阻，不挫不折，必达其志而后已。盖如此数人，肝脾骨肉，毛发爪甲，皆由慈与信而成。故此身苟存，此心不丧，欲不刚毅，奚可得乎？以是可见刚毅者心志之力，而慈与信实其原质也。或曰：世固有强忍有力者，亦可谓刚毅之人乎？曰：非也。如李斯、吕惠卿，岂不见强忍有力者。然其所为，不根于慈信之心，而出于嗜欲之私，故弊害所极，身丧国败。宣尼不云乎：“枵也欲，焉得刚。”

第九编序。（论务职事之人）

或谓余曰：西国之事理，大概尽于是书。余曰：否，此不过一人一家之书耳。若以此为尽其概略，则大谬。且与余译之之意，甚相径庭矣。夫天下之事理日出而不穷，古人之所是，而今人非之者有矣；今人之所是，乌知不为后人之所非乎？古人之

所不言，而今人言之者有矣；今人之所不言，乌知不有后人之言之者乎？天下尽以为非，而一人独是之。在当时则受縲紲之辱，在后世则得泰斗之名。如加利列窝者有矣。天下之同论岂必是，而一人之异见岂必非乎？天下之所未言，而一人独言之，在当时则见戮为罪人，在后世则见尊为圣人。如苏格拉底者有矣。天下通行之说岂必是，而一人创始之论岂必非乎？是故纵举宇宙间千百之意见识论，而犹未足以尽天下之事理，况此区区一小册，何足以窥其万一乎？且余所以译是书，欲使人进而习读西籍，谦虚其心，容受新见异说，务集众人之智识，而不妄执一己以论断也。乃不然，而读此隔靴搔痒之译书，遽以为尽其概略，岂予心哉！或又曰：是书所说，合于孔子之旨，故可取。余曰：然则子岂谓孔子之所不言，则概不足取乎？此与孔子意悖矣，不曰子绝四，毋意、毋必、毋固、毋我乎？不曰发愤忘食，乐以忘忧，不知老之将至乎？使孔子而生于今日，则其务听纳新见异说者，果何如也？若死读孔子之书，留滞而不化，以此规天下之事理，一言不合，骇以为怪，如此则与孔子好学如不及之意，正相反矣。夫学问之事，贵乎集众异以备思察，濯旧见以冀新得。譬如贮书，若子拥万卷而皆同一书也，则奚贵于多？譬如食大餐，郇厨侯鯖，五味八珍，众异并备，然后美于口。不然，而食前方丈，所陈唯一种物，则其同也，岂不可厌乎？挂眼镜之红色者而观物，森罗万象，莫不红者；挂碧色者，则乾坤一碧；挂黄色者，则宇宙皆黄。若先执一己之见，以听他人之论，则其所谓同，亦非其真也。舜好察迩言，舍己从人，孔子问礼于老聃，问乐于苾弘，古人之好学汲汲不倦，虚以受人者如此。岂若后人之先入为主，好异同而妄相是非哉？如是书，子特宜收为万卷中之一部可也，以此自足不可也，以此自是大不可也，或以是律他人之议论，更大不可也。天下之事理，浩如巨海，岂得以升斗之量概之哉？

第十一编序。（论自修之事及其难易）

余读此编，始知西国所以兴也。西国之民，事神敬天，利用厚生之类，其事不可一二数，而皆专心一意，死生不移，国安得不兴！或曰：国之兴衰与气数相表里，非人力所能也。曰：不然。圣人于《泰》之《彖》释之曰：“君子道长。”《泰》之为卦，阴阳相半，君子之道独何以能长也？盖当《泰》之时，气数与阴阳不相下。然君子于我职分，自强不息，日进一日，则气数不复足道，故曰“裁成辅相，以左右民”。孰谓国家之兴，非人力所能哉？虽然，自非专心一意、死生不移者，安能得尽我职分？《艮》之上九，圣人系之曰“敦艮”，西国之所以兴，亦不是过已。

伟人讷耳逊轶事

人苟无名誉心则已，苟有名誉心，则虽有千百难事横于前途，以遮断其进路，而鼓舞勇气，终必能排除之。英之伟人讷耳逊者，五洲所共闻也。幼时与兄同在一学校，当冬季休暇终而归校之时，与兄并辔适校，途中风雪大作，寒彻骨不可支，其兄乃约讷耳逊同归家，见其父。父曰：“归校与否，吾听汝等之自由。虽然，凡发念欲做一事，必做成之而后已，此大丈夫之举动，而荣誉之事也；半途而废，面目扫地之事也。汝等试两者比较而择所从。”讷耳逊闻言，即促兄更上归校之途，兄犹有难色，讷耳逊厉声曰：“阿兄忘荣誉之一言乎。”卒相俱以去。呜呼！讷公其后造赫赫之伟业，轰风云于大地，虽有器量胆略，超轶寻常，抑岂不以此名誉心旁薄而宣泄矣乎！

饮冰子曰：讷耳逊者何人乎？其人栖息于海上者三十五年，中间经大小百二十四回之战斗，而赫然为世界历史之一大人物者也。当十八世纪之末，以威如雷霆、猛如虎豹之拿破仑，蹂躏马蹄于欧洲全土，各国之帝王将相，膝行莫敢仰视之时，而有鬼神之算、铁石之胆、电光之手腕，讷耳逊其人者，率英国舰队，屡决死战于海上，卒剿灭法国及其同盟国之海军，使不能再立。而地中海之海上权，遂全归英国之手。至今欧洲有井水饮处，莫不知其名焉。呜呼！荣矣，人人知其荣，而抑知其冒险犯难，遇败受挫，百折不回，万死一生，而以易之者乎。

百川学海而至于海，或直行，或曲行，或显流，或伏流，遇有山陵之障，则绕而避之，遇有沙石之阻，则挟而赴之，要之必奔流到海而后已。任事者可以鉴矣。

放弃自由之罪

西儒之言曰：“天下第一大罪恶，莫甚于侵人自由，而放弃己之自由者，罪亦如之。”余谓两者比较，则放弃其自由者为罪首，而侵人自由者乃其次也。何以言之？盖苟天下无放弃自由之人，则必无侵人自由之人。此之所侵者，即彼之所放弃者，非有二物也。夫物竞天择，优胜劣败

（此二语，群学之通语。严侯官译为“物竞天择，适者生存”，日本译为“生存竞争，优胜劣败”。今合两者并用之，即欲定以为名词焉）

，此天演学之公例也。人人各务求自存则务求胜，务求胜则务为优者，务为优者则扩充己之自由权而不知厌足，不知厌则侵人自由必矣。言自由者必曰：人人自由而以他人之自由为界。夫自由何以有界？譬之有两人于此，各务求胜，各务为优者，各扩充己之自由权而不知厌足，其力线各向外而伸张，伸张不已，而两线相遇，而两力各不相下，于是界出焉。故自由之有界也，自人人自由始也。苟两人之力有一弱者，则其强者所伸张之线，必侵入于弱者之界。此必至之势，不必讳之事也。如以为罪乎？则宇宙间有生之物，孰不争自存者，充己力之所能及以争自存。可谓罪乎？夫孰使汝自安于劣，自甘于败，不伸张力线以扩汝之界，而留此余地以待他人之来侵也！故曰：苟无放弃自由者，则必无侵人自由者。其罪之大原，自放弃者发之，而侵者因势利导不得不强受之。以《春秋》例言之，则谓之罪首可也。

国权与民权

今天下第一等议论，岂不曰国民乎哉？言民事者，莫不瞋目切齿怒发曰：彼历代之民贼，束缚驰骤，磨牙吮血，以侵我民自由之权，是可忍孰不可忍！言国事者，莫不瞋目切齿怒发曰：彼欧美之虎狼国，眈眈逐逐，鲸吞蚕食，以侵我国自由之权，是可忍孰不可忍！饮冰子曰：其无尔，苟我民不放弃其自由权，民贼孰得而侵之？苟我国不放弃其自由权，则虎狼国孰得而侵之？以人之能侵我，而知我国民自放自弃之罪不可追矣。曾不自罪，而犹罪人耶？昔法兰西之民自放弃其自由，于是国王侵之，贵族侵之，教徒侵之，当十八世纪之末，黯惨不复睹天日。法人一旦自悟其罪，自悔其罪，大革命起，而法民之自由权完全无缺以至今日，谁复能侵之者？昔日本之国，自放弃其自由权，于是白种人于交涉侵之，于利权侵之，于声音笑貌一一侵之，当庆应、明治之间，跼天蹐地于世界中。日人一旦自悟其罪，自悔其罪，维新革命起，而日本国之自由权完全无缺以至今日，谁复能侵之者？然则民之无权，国之无权，其罪皆在国民之放弃耳，于民贼乎何尤？于虎狼乎何尤？今之怨民贼而怒虎狼者，盍亦一旦自悟自悔而自扩张其固有之权，不授人以可侵之隙乎？不然，日日瞋目切齿怒发胡为者？

破坏主义

日本明治之初，政府新易，国论纷糅。伊藤博文、大隈重信、井上馨等共主“破坏主义”，又名“突飞主义”，务摧倒数千年之旧物，行急激之手段。当时诸人皆居于东京之筑地，一时目筑地为梁山泊云。饮冰子曰：甚矣！破坏主义之不可以已也！譬之筑室于瓦砾之地，将欲命匠，必先荷锺；譬之进药于痞疳之夫，将欲施补，必先重泻。非经大刀阔斧，则输倖无所效其能；非经大黄、芒硝，则参苓适足速其死。历观近世各国之兴，未有不先以破坏时代者。此一定之阶级，无可逃避者也。有所顾恋，有所爱惜，终不能成。

破坏主义何以可贵？曰凡人之情，莫不恋旧，而此恋旧之性质，实阻碍进步之一大根源也。当进步之动力既发动之时，则此性质不能遏之，虽稍参用，足以调和而不致暴乱，盖亦未尝无小补焉。至其未发动之时，则此性质者，可以堵其原、阁其机，而使之经数十年、数百年不能进一步，盖其可畏可恨至于如此也。快刀断乱麻，一拳碎黄鹤，使百千万亿蠕蠕恋旧之徒，瞠目结舌，一旦尽丧其根据之地，虽欲恋而无可恋，然后驱之以上进步之途，与天下万国驰骤于大剧场，其庶乎其可也。

欧洲近世医国之国手不下数十家。吾视其方最适于今日之中国者，其惟卢梭先生之《民约论》乎！是方也，当前世纪及今世纪之上半，施之于欧洲全洲而效；当明治六七年至十五六年之间，施之于日本而效。今先生于欧洲与日本，既已功成而身退矣。精灵未沫，吾道其东；大旗觥觥，大鼓咚咚；大潮汹汹，大风蓬蓬；卷土挟浪，飞沙走石；杂以闪电，趋以万马。尚其来东！呜呼！《民约论》，尚其来东！东方大陆，文明之母，神灵之宫。惟今世纪，地球万国，国国自主，人人独立，尚余此一土，以殿诸邦。此土一通，时乃大同。呜呼！《民约论》兮，尚其来东！大同大同兮，时汝之功！

自信力

任天下者当有自信力，但其事当行者，即断然行之。嗷嗷嚅嚅，瞻前顾后，是小丈夫之所为也。日本明治初年，伊藤、大隈二人谋设东海道铁路，井上馨、涩泽荣一以时机尚早止之，不听。遽建议于太政官，借洋债以兴之，朝议噤噤不谓然，或问其办法如何，或问其工费如何，伊、隈二人相顾呆然，不知所对，乃曰：“其详细章程，俟诸明日。”退而访前岛密氏，托其拟章程，并作豫算表。前岛亦毫不知铁路之事，虽然，二人固乞不已，前岛乃算其大概，草一稿，名曰《横滨京都铁路臆测书》，翌日二人携之以示于朝，议遂决。

当时政府之财力甚薄弱，无资本以经营此等新事业，又未知公债之法。会英人有姓讷耳逊名里者，自香港、上海至日本，当时东京未有西洋大客寓，故寓英使馆中，以英使之介绍而来谒伊、隈二人。曰：“闻诸公欲设铁路而无资力，若果有所命，仆当效

力。”二人未

知阿里为何如人，以为必英

国史上著名海军提督讷耳逊（即前篇所论者）

之族也，又见其寓使馆中，以英使之介绍而来，谓必是贵族，今其人肯贷金与我，真天赐也。乃遽与贷一百万磅，计利九分，以横滨海关税作抵。伊藤、大隈当时未知洋债之性质如何，以为必讷耳逊里以己之资本而贷之也。其后伦敦《泰晤士报》来，忽见登有告白，招人购买日本公债票，二人惊愕失措。盖初时以为借金之事必秘密无人知，今忽揭于新报上，恐政府之守旧党见之，骂为卖国也。乃急遣前岛密、上野景范二人往英国，将收回借券作罢论。二人到伦敦，则见公债票早散布已尽。而其所谓阿里者，实与伟人讷耳逊毫无瓜葛，不过一经纪卖买之人耳。二人大惊，无法收回借券，乃议出金买回已散出之债票，其事一旦传布市上，日本公债忽每百磅腾价二三磅，不得已，仍以所借债归，卒以成京滨铁路。

饮冰子曰：伊藤、大隈，铁路之办法不知，铁路之经费不知，公债之性质不知，贾人之情态不知，何其陋也！不知而贸然倡办之，贸然订借之，何其卤莽也！虽然，使待其一知之然后办之，则京滨铁路恐无成之一日。而彼技师岸贾，于此等事一一知之者何限。然其事必待成于伊、隈之手而不成于此辈，何也？有自信力也。苟信此事之不可不办，斯办之矣。陋也，卤莽也，固可以败事，然事事而办之，败者虽九，而成者犹有一矣。事事而不办之，则并此一成者而无有焉。然则孰为败而孰为成矣乎。吾记二公轶事，使人知日本赫赫如二公者，其陋也，卤莽也，固如此矣。苟能有其自信力，天下事何有焉？虽千万人吾往矣。

善变之豪杰

吉田松阴，初时主公武合体之论

（公者王室也，武

者武门也，即指大将军也，当时日本

通行语），其后乃专主尊王讨幕（幕府者，大将军也）

，非首鼠两端也。其心为一国之独立起见，苟无伤于平和，而可以保独立，则无宁勿伤也。既而深察其腐败之已极，虽欲已而无可已，乃决然冲破其罗网，摧坏其基础，以更造之。其

方法虽变，然其所以爱国者未尝变也

。加布儿

（意大利之伟人。近

人所译《泰西新史揽要》称为嘉富洱者）

初时入秘密党，倡革命下狱，其后佐撒的尼亚王为大宰相，卒成大功，统一意国，非反覆变节也。其心为一国之独立起见，既主权者无可与语，不得不投身激湍以图之；既而见撒王之可以为善，而乘时藉势，可以行其所志，为同胞造无量之福，故不惜改弦以应之。其方法虽变，然其所以爱国者未尝变也。语曰：“君子之过也，如日月之食焉，人皆见之；及其更也，人皆仰之。”大丈夫行事磊磊落落，行吾心之所志，必求至而后已焉。若夫其方法，随时与境而变，又随吾脑识之发达而变。百变不离其宗，但有所宗，斯变而非变矣。此乃所以磊磊落落也。

加布儿与诸葛孔明

伟哉加布儿！吾求诸中国数千年历史上之豪杰，可与仿佛颉颃者，其惟诸葛孔明乎？刘备以屡败屡陷漂泊无所依之势，而诸葛挟之以取益州，卒成三分之局，南面称帝。加布儿挟撒的尼亚蓂尔之小朝廷，而创意大利统一之业，其地位与时势，皆有相若者。诸葛之遇先主，犹加布儿之遇维克杜尔王也。加布儿既相，毅然以国家安危自任，整顿内治，首理财政，兴工业，盛教育。此孔明治蜀之成规，而陈寿所最称者也。其与法国拿破仑第三相结以抗奥国，一孔明结孙权以图魏之成算也。弱小新造之国，而欲与强国为难，非助之外交之敏腕，不能为功也。其使全国民皆为兵，日日磨炼而鼓舞之，即孔明欲为北征而先入南之政略也。虽然，诸葛出师未捷，赍志以亡，加布儿卒能成功，辉意大利之国威于天壤。殆诸葛之才不及加布儿耶？非也！刘备非维克杜尔王之比也。

加布儿之大政略在联法，诸葛之大政略在和吴，而刘备不能用诸葛之谋，所以败也。凡天下一事之成，必有许多事与之相因，然后成焉。如机器然，合全机以成体，既废其一，则他与俱败矣。吾读加布儿之传，而不能不重为孔明悲也。抑犹有一义焉，加布儿谋意大利一统，未竟而卒，卒后而一统之业终成；诸葛谋弱汉之一统，未竟而卒，卒后而汉遂亡。此其故何欤？蜀汉之国民，又非意大利国民之比也，意大利之企画一统者，全国之国民也，而蜀汉之企画一统者，诸葛一人而已。凡事而专属于一人者，此一人去而大事皆去矣。故善谋国者，必自养国民之气，开国民之智始。

论强权

一 强权之界说

强权云者，强者之权利之义也。英语云THE RIGHT OF THE STRONG EST，此语未经出现于东方，加藤氏译为今名。何云乎强者之权利，谓强者对于弱者而所施之权力也。自吾辈人类及一切生物世界乃至无机物世界，皆此强权之所行。故得以一言蔽之曰：天下无所谓权利，只有权力而已，权力即权利也。

凡动植物世界及人类世界，当强弱二者大相悬隔之时，则强者对于弱者之权力，自不得不强大。因强大之故，自不得不暴猛，譬之兽类，虎、狮其最强者，故其于弱兽任意自由而捕食之，是狮、虎之权力，所以大而猛也，惟强故也。于人类亦然，昔者野蛮世界，强大之民族对于弱小之民族，其所施之权力必大而猛，又同一民族之中，强者对于弱者，其所施之权力，必大而猛。不宁惟是，文明人民对于半开及野蛮之人民，其所施之权力，必大而猛，是无他故，皆自强弱之悬隔而生。强也弱也，是其因也，权力之大小，是其果也。其悬隔愈远者，其权力愈大而猛，此实天演之公例也。

在动物至野蛮世

界，其所谓强者全属体力之强也

。至半文半野世界（又有称为半开世界）

，所谓强者体力与智力互相胜也。文明世界，所谓强者即全属知力之强也。自文明人以观半开野蛮之人，其强者对于弱者所施权力之大而猛，实有可惊者。如酋长、国王之制其人民也，贵族之制平民也，男子之制女子也。其权力所行，殆非同类相待之所宜有，是无他，其悬隔大故也。至文明人民，则治者与被治者之间，贵族与平民之间，男子与女子之间，其强弱之悬隔不甚大，以故治者对于被治者之权力，贵族对于平民，男子对于女子之权力，不得行其暴猛，渐改而就温良。是盖由强弱之悬隔不甚远，其昔之所谓强者，不得任意振其权力。譬如以狮遇羊，则其权力必大至无限；以狮遇虎、豹，其权力不能大至无限。然则文明之世，非治者与贵族与男子肯甘心自灭杀其强者之权力也。实则被治者与平民与女子，其智力既已渐进，不复安于前此弱者之地位，而前者之强者，遂不得不变其暴猛之权力而为温良之权力。然则直谓前此之弱者渐出其强权

（因弱者已渐为强，故有强权）

，以压制前此之强者，使不得不稍弱，殆无不可也。

由此观之，强权有两种：一曰大而猛者，一曰温而良者。虽然，等之为强权也。寻常学者骤闻“强权”二字，辄以为专属于大而猛者，而不包有其温而良者，此实误也。猛大与温良，视乎他力与本力相对之强弱，而本力所现之象，随而异云尔，若本力之原质，则固非有异也。此吾所以统括猛大与温良两种之权力，而概名之为强

权也。

二 论强权与自由权之关系

曰强权，曰权力，闻者莫不憎而厌之，谓此乃上位施于下位，无道之举动也，人群之蠹贼也。曰自由权，曰人权，闻者莫不爱而贵之，谓此乃人民抗拒在上之压制，当然之职分也，人群之祥云也。虽然，就前章界说之定义言之，而知强权与自由权，其本体必非二物也，其名虽相异，要之，其所主者在排除他力之妨碍，以得己之所欲，此则无毫厘之异者也。不过因其所遇之他力而异其状，因以异其名云尔。彼野蛮与半开之国，统治者之知识，远优于被治者，其驾驭被治者也甚易，故其权力势不得不猛大，至文明国则被治者之智识，不劣于统治者。于是伸张其权力以应统治者，两力相遇，殆将平均，于是各皆不得不出于温良，若是者谓之自由。

昔康德氏最知此义，其言曰：“统治者对于被治者等，贵族对于贱族，所施之权力，即自由权也。”盖康氏之意以为野蛮之国，惟统治者得有自由。古代希腊、罗马，则统治者与贵族得有自由；今日之文明国，则一切人民皆得有自由。又李拔尔氏之说，亦大略相同。其意谓专制国之君主，与自由国之人民，皆热心贪望自由权者也，故自由权可谓全为私利计耳云云。康氏、李氏皆日耳曼大儒也。其论如此，可谓中时矣。要而论之，前此惟在上位者有自由权，今则在下位者亦有自由权；前此惟在上位者有强权，今则在下位者亦有强权，然则强权与自由权，决非二物昭昭然矣。若其原因，则由前此惟在上位者乃为强者，今则在下位者亦为强者耳。故或有见人民伸其自由权以拒压制之强权，以为此强弱迭代也，不知乃两强相遇，两权并行，因两强相消，故两权平等，故谓自由权与强权同一物。骤闻之似甚可骇，细思之实无可疑也。

诸君熟思此义，则知自由云者，平等云者，非如理想家所谓天生人而人人畀以自由平等之权利云也。我辈人类与动植物同，必非天特与人以自由平等也。康南海昔为强学会序有云：“天道无亲，常佑强者。”至哉言乎！世界之中，只有强权，别无他力，强者常制弱者，实天演之第一大公例也。然则欲得自由权者，无他道焉，惟当先自求为强者而已。欲自由其一身，不可不先强其身，欲自由其一国，不可不先强其国。强权乎，强权乎，人人脑质中不可不印此二字也。

三 论强权之发达

凡一切有机之生物，因其内界之遗传与外界之境遇，而其体质心性，生强弱优劣之差，此休质互异之各物，并生存于世界中，而各谋利己，即不得不相竞争，此自然之势也。若是者名之为生存竞争，因竞争之故，于是彼遗传与境遇，优而强者，遂常占胜利，劣而弱者，遂常至失败，此亦当然之事也，若是者名之为优胜劣败。

生存竞争，优胜劣败，此强权之所由起也。生存竞争与天地而俱来，然则强权亦与天地俱来，固不待言。虽然，其发达之次序，亦有可言焉。在禽兽世界，其强权之所施，惟在此种属与他之种属之间

（如虎与羊、猫与鼠之间是也）

而已，若其同一种属之间，则其强权不甚发达。野蛮人亦然，当草昧未开之时，同一人群内之竞争，而出其强权者甚希，其始惟人类对于动植物而施其强权，其继则此群对于彼群而施其强权，其后乃一群之中之各人，甲对于乙，乙对于丙而有强权。盖由人群进步发达，而生存竞争之趋向，日渐增加，而强者之权利乃日渐加大。于何证之？如一人群之初立，其统治者与被治者之差别殆无有，故君主对于人民之强权，亦几于无有，是为第一界，亦谓之据乱世。其后差别日积日显，而其强权亦次第发达，贵族之对于平民亦然，男子之对于妇人亦然，是为第二界，亦谓之升平世。至世运愈进步，人智愈发达，而被治者与平民与妇人，昔之所谓弱者亦渐有其强权与昔之强者抗，而至于平等，使猛大之强权变为温和之强权，是为强权发达之极则，是为第三界，亦谓之太平世。

或问曰：既已相消矣，既已平等矣，则世界无复有强权之迹。谓之为强权消灭则可矣，谓之为强权发达何耶？且此第三界者与第一界何以异乎？答之曰：不然。第一界之时，人人皆无强权（惟对于他族而有之耳）

，故平等。第二界之时，有有强权者，有无强权者，故不平等。第三界之时，人人皆有强权，故复平等。要之，以强权之有无多寡，以定其位置之高下文野，百不失一。如专制主义，自今日视之，诚为可笑可憎，然要之彼一群之中，尚有有强权者若干人，则胜于前此之绝无强权者矣。贵族政治，神官政治，亦其有权强之人日渐加增之征验也。近世经一次革命，则有强权之人必增多若干，而人群之文明必进一级。前此经过者如宗教革命、政治革命皆是也。今日欧洲各国，有强权之人，增于二百年前不知凡几矣。然则今日西人之强权发达已极乎？曰未也。今日资本家之对于劳力者，男子之对于妇人，其阶级尚未去，故资本家与男子之强权，视劳力者与妇人尚甚远焉。故他日尚必有

不可避之二事，曰资生革命（日本所谓经济革命）

，曰女权革命。经此二革命，然后人人皆有强权，斯为强权发达之极，是之谓太平。虽然，此就一群之中言之耳，若此群对于他群，而所施之强权之大小，又必视两群之强弱以为差，必待群群之强相等，然后群群之权相等，夫是谓太平之太平。

豪杰之公脑

世界者何？豪杰而已矣，舍豪杰则无有世界。一国虽大，其同时并生之豪杰，不过数十人乃至数百人止矣。其余四万万人，皆随此数十人若数百人之风潮而转移奔走趋附者也。此数十人若数百人，能合为一点，则其力非常之大，莫之与敌也；若分为数点，则因其各点所占数之多寡以为成败比例差，两虎相斗，必有一毙。夫一毙何足惜，而此并时而生者，只有此数十数百人，而毙其半焉，或毙其三之一焉，则此世界之元气既已斫丧不知几许，而世界之幸福所灭既已多矣。然则求免其斗可乎？曰：是必不能。盖生存竞争，天下万物之公理也，既竞争则优者必胜，劣者必败。此又有生以来不可避之公例也。夫既曰豪杰矣，则必各有其特质，各有其专长，各有其独立自由不肯依傍门户之气概，夫孰肯舍己以从人者。若是夫此数十数百之豪杰，其终无合一之时乎？其终始相斗以共毙矣乎？信如是也，此世界之孽罪未尽劫，而黑暗之运未知所终极也。吾每一念及此，未尝不呕血拊心而长歎也。

合豪杰终有道乎？曰：有。豪杰者，服公理者也，达时势者也。苟不服公理，不达时势，则必不能侧身于此数十人数百人之列，有之不足多，无之不为少也。既服公理矣，达时势矣，则公理与时势即为联合诸群之媒，虽有万马背驰之力，可以铁锁链之，使结不解也。是故善谋国者，必求得一目的，适合于公理与其时势，沁之于豪杰人人之脑膜中，而皆有养养然不能自己者存，夫然后全国之豪杰可以归于一点，而事乃有成。法国人之言自由平等也，意大利人之言统一独立也，日本人之言尊王攘夷也。一国之豪杰，其流品不一，其性情不一，其遭际不一，然皆风起水涌，云合雾集，不谋而自同，不招而自来，以立于成此一目的之旗下。若是者谓之豪杰之公脑。豪杰有公脑，则数十数百人如一人，且豪杰之公脑即国民之公脑也，国民有公脑，则千百亿万人如一人，千百亿万人如一人，天下事未有不济者也！

谭浏阳遗墨

浏阳之学，出乎天天，入乎人人，其大端具于《仁学》一书，我支那四千年未有之盛业，不待论矣。其零墨碎金，散于人间者，随时裒录之，以广其传。下三则为同志书箴之语也，其书在著《仁学》之后。

静观断念，动成匠心。静观断念者何也？业识流注，念念相续，惟余般若，无不能缘。由此之彼，因牛及马，如树分枝，枝又成干，忽遇崎挠，中立亭亭，悬挂无薄，是名暂断，乘此微隙，视其如何复续，若竟不复续，意识断矣。动成匠心者何也？道绝言思，遇识成境，境无违顺，遇心成理，闻歌起乐，见泣生悲，非歌泣之足凭，有为悲乐之主者也。然则苟变其主，必得立地改观，所谓三界惟心，即匠心也。

曾重伯言：“舟中闻桨击水，心之知识，即逐声而往，桨自桨，水自水，声自声，心自心，何以遽相凑泊？”因有悟于中阴入胎之理。余谓中阴凑泊之机，信是如此，所可惧者，非具甚深智慧。转世之后，德业一时坠失，何其无记性也。及重思之，知识本来无记性，后境而思前境，今日而思昔日，似有记性矣。然必置此思彼而后得，非不待更端而同时并得也。然则知中识中，仅能容得一事，其余皆谓之遗忘可也。生人知识，有体魄之可寄，尚自无有记性，复何论于凭虚无著之中阴，此成大圆镜智者。所以无后无前，无今无昔，容则并容，得则同得，一多无碍，不在两时。

夫万善之首必曰信，万恶之首必曰不信。于耳目所不及接而生疑想者，是为不信；于过去未来而生久远想者，是为不信；于大小长短多寡而生容积想者，是为不信；于一念顷而自放逸者，是为不信；于常精进而生退转想者，是为不信；于少有所得而生自足想者，是为不信；于一乘中而生二想者，是为不信。广说虽累大万不能尽也，譬如盲人而与说日，彼终不信。以不信故，虽佛盛神力，终无能使彼知日。

精神教育者，自由教育也

陆羯南语任公曰：君等今热心于教育之事，其目的所在，有不可不熟审者，勿徒谓文明之可贵而已。即如我日本之大学，谓模仿文明成效卓著，但自其表面观之则然尔，至于里面，其腐败有不可胜言者。当局者一依德国主义，其所以为教者，则以服从政府为之精神也。遂使全国少年缺独立自重之气，成卑污劣下之俗。夫孰知假文明之名，以行焚书坑儒之术者，其祸更惨于秦政十倍乎！

任公瞿然曰：有是哉！此吾畴昔所以深慨痛恨于我中国，而不意日本之犹未能免是也。以日本教育之进步，比诸吾中国，其相去何啻千万。而日本爱国之士，犹以比诸秦政之坑焚，然则如吾中国者，又将何拟也。法国大儒孟德斯鸠曰：“凡半开专制君主之国，其教育之目的，惟在使人服从而已。”日本大儒福泽谕吉曰：“支那旧教，莫重于礼乐。礼者所以使人柔顺屈从也，乐者所以调和民间勃郁不平之气，使之恭顺于民贼之下也。”任公曰：此二氏之言，然耶？否耶？我国民试一自省之。呜呼！亡天下者，岂必八股？岂必楷法？岂必考据？岂必词章？苟无精神，虽日手西书，口西法，其腐败天下，自速灭亡，或更有甚焉耳！

中国自数年以来，学校之议蜂起，或官立，或私立，各省所在多有。虽然，吾不知其所以设校之意，将以智之乎？抑以愚之乎？将欲养之使为国家御侮之用乎？抑将为此僿僿衿缨，谋他日衣食富贵之路乎？彼设校者，岂不曰：吾将智之，使为国家御侮之用也。虽然，吾见彼入学者，日益以愚，而叩其来学之心，有不为他日一身之衣食富贵而来者，殆万中不得其一也。以此言之，学堂其有愈于书院乎？西学其有愈于八股乎？吾乌从而言之。

凡一统专制之国，值承平无事之时，但求辑和其民，使无反侧，而政府之能事毕矣。若是者以服从为教可也。若夫处于万马奔逸，万流激湍，斗智斗力之世界，立于千钧一发、孤注一掷、累卵岌岌之地位，非浚一国之智，鼓一国之力，则奄奄残喘，岂复有救！夫所以浚之鼓之之具何也？自由是也。自由者，精神发生之原力也。呜呼！日本之国家教育，尚未克语于此，吾于中国更何责焉！

虽然，以日本之教育，于泰西文明之事物，几于具体而微，而有识之士其忧之也，犹且如是。况吾中国者，固无精神，并无形质，而举世所谓志士者，以此不完不具无可比拟之事，以相夸耀，若以此为尽我维新之天职者。然彼靡靡肉食者，自甘为奴隶，又欲奴隶我民，固不足责矣。顾我国民其终不悟耶？其终不悟耶！

祈战死

冬腊之间，日本兵营士卒，休憩瓜代之时，余偶信步游上野。满街红白之标帜相接，有题曰欢迎某师团步兵某君，某队骑兵某君者，有题曰送某步兵某君，某炮兵某君入营者。盖兵卒入营出营之时，亲友宗族相与迎送之，以为光宠者也。大率每一兵多者十余标，少者亦四五标。其本人服兵服，昂然行于道，标则先后之，亲友宗族从之者率数十人。其为荣耀，则虽我中国入学中举簪花时不是过也。其标上仅书欢迎某君送某君等字样，无甚赞颂祝祷之语。余于就中见二三标，乃送入营者，题曰“祈战死”三字。余见之矍然肃然，流连而不能去。

日本国俗与中国国俗有大相异者一端，曰尚武与右文是也。中国历代诗歌皆言从军苦，日本之诗歌无不言从军乐。吾尝见甲午、乙未间，日本报章所载赠人从军诗，皆祝其勿生还者也。杜甫《兵车行》：“车辚辚，马萧萧，行人弓箭各在腰。爷娘妻子走相送，尘埃不见咸阳桥。牵衣顿足拦道哭，哭声直上干云霄。”以视此标上所谓“祈战死”者，何相反之甚耶！

中国魂安在乎

日本人之恒言，有所谓日本魂者，有所谓武士道者。又曰日本魂者何？武士道是也。日本之所以能立国维新，果以是也。吾因之以求我所谓中国魂者，皇皇然大索之于四百余州，而杳不可得。吁嗟乎伤哉！天下岂有无魂之国哉？吾为此惧。

或曰：尚武之风，由激励而成也。朝廷以此为荣途，民间以此为习惯，于是武士道出焉。吾中国向来薄视军士，其兵卒不啻奴隶，则谓从军苦也固宜。自由主人曰：此固一义也，然犹有未尽者。尚武之风，由人民之爱国心与自爱心，两者和合而成也。人人皆有性命财产，国家之设兵以保人人之性命财产，故民之为兵者，不啻各自为其性命财产而战也。以此为战，战犹不勇者，未之闻也。不观两乡之械斗者乎？其子弟相率冲锋陷阵，其老弱相率馈饮食，虽欲禁之而不能焉。彼固各自为其剥肤之利害与切己之荣辱也。故吾观于械斗，而知吾中国所谓武士道之种子，在于是矣。

今中国之有兵也，所以钐制其民也。夺民之性命财产，私为己有，惧民之知之而复之也，于是乎有兵。故政府之视民也如盗贼，民之视政府亦如盗贼；兵之待民也如草芥，民之待兵也亦如草芥。似此者，虽日日激励之，奖荣之，以求成所谓武士道者，必不可得矣。尔来当道者知兵之不可以已也，相率而讲之练之，奖之劝之，荣禄、张之洞之徒，则其人也。吾见其每年糜数千万之饷，而兵之不可用如故也。何也？方且相视以盗贼、相待以草芥，虽欲振之，孰从而振之？夫是之谓无魂之兵。无魂之兵者，犹无兵也。

今日所最要者，则制造中国魂是也。中国魂者何？兵魂是也。有有魂之兵，斯为有魂之国。夫所谓爱国心与自爱心者，则兵之魂也。而将欲制造之，则不可无其药料，与其机器。人民以国家为己之国家，则制造国魂之药料也；使国家成为人民之国家，则制造国魂之机器也。

答客难

客难任公曰：子非祖述“《春秋》无义战”，墨子“非攻”之学者乎？今之言何其不类也！任公曰：有世界主义，有国家主义。无义战、非攻者，世界主义也；尚武敌忾者，国家主义也。世界主义属于理想，国家主义属于事实；世界主义属于将来，国家主义属于现在。今中国岌岌不可终日，非我辈谈将来、道理想之时矣。故坐吾前此以清谈误国之罪，所不敢辞也；谓吾今日思想退步，亦不敢辞也。谨谢客。

抑吾中国人之国家主义，则虽谓之世界主义可也。何也？今日世界之事，无有大于中国之强弱兴亡者。天下万国大政治家所来往于胸中之第一大问题，即支那问题是也。故支那问题，即不啻世界问题；支那人言国家主义，即不啻言世界主义。然则吾今日之思想决非退步也。谨谢客。

不宁惟是，吾之所言兵，与荣禄、张之洞所言兵，有大异之点。彼所言者，民贼之兵也；吾所言者，国民之兵也。民贼之兵足以亡国，国民之兵足以兴国。吾特谓兴国之兵之不可以已云尔。若夫亡国之兵，则吾之恶之如故也，与吾前数年所论实无矛盾。谨谢客。

忧国与爱国

有忧国者，有爱国者。爱国者语忧国者曰：汝曷为好言国民之所短？曰：吾惟忧之之故。忧国者语爱国者曰：汝曷为好言国民之所长？曰：吾惟爱之之故。忧国之言，使人作愤激之气，爱国之言，使人厉进取之心，此其所长也；忧国之言，使人堕颓放之志，爱国之言，使人生保守之思，此其所短也。朱子曰：“教学者如扶醉人，扶得东来西又倒。”用之不得其当，虽善言亦足以误天下。为报馆主笔者，于此中消息，不可不留意焉。

今天下之可忧者莫中国若，天下之可爱者亦莫中国若。吾愈益忧之，则愈益爱之，愈益爱之，则愈益忧之，既欲哭之，又欲歌之。吾哭矣，谁坎踊者？吾歌矣，谁坎和者？

日本青年有问任公者曰：支那人皆视欧人如蛇蝎，虽有识之士亦不免，虽公亦不免，何也？任公曰：视欧人如蛇蝎者，惟昔为然耳，今则反是。视欧人如神明，崇之、拜之、献媚之、乞怜之，若是者比比皆然，而号称有识之士者益甚。昔惟人人以为蛇蝎，吾故不敢不言其可爱；今惟人人以为神明，吾故不敢不言其可嫉。若语其实，则欧人非神明非蛇蝎，亦神明亦蛇蝎，即神明即蛇蝎。虽然，此不过就客观的言之耳。若自主观的言之，则我中国苟能自立也，神明将奈何？蛇蝎又将奈何？苟不能自立也，非神明将奈何？非蛇蝎又将奈何？

保全支那

欧人、日本人动曰保全支那，吾生平最不喜闻此言。支那而须藉他人之保全也，则必不能保全；支那而可以保全也，则必不藉他人之保全。

言保全人者，是谓侵人自由；望人之保全我者，是谓放弃自由。

或问曰：孟子者，中国民权之鼻祖也。敢问孟子所言民政，与今日泰西学者所言民政，同乎？异乎？曰：异哉异哉！孟子所言民政者，谓保民也，牧民也，故曰“若保赤子”，曰“天生民而立之君，使司牧之”。保民者，以民为婴也；牧民者，以民为畜也。故谓之保赤政体，又谓之牧羊政体。以保牧民者，比之于暴民者，其手段与用心虽不同，然其为侵民自由权则一也。民也者，贵独立者也，重权利者也，非可以干预者也。惟国亦然。曰保全支那者，何以异是？

传播文明三利器

犬养木堂语余曰：日本维新以来，文明普及之法有三：一曰学校，二曰报纸，三曰演说。大抵国民识字多者，当利用报纸，国民识字少者，当利用演说。日本演说之风，创于福泽谕吉氏

（按：福泽氏，日本西学第一之先锋也，今尚生存，为一时之泰斗）

。在其所设之庆应义塾开之，当时目为怪物云。此后有嚶鸣社者，专以演说为事，风气既开，今日凡有集会，无不演说者矣。虽至数人相集饌饮，亦必有起演者，斯实助文明进化一大力也。我中国近年以来，于学校报纸之利益，多有知之者，于演说之利益，则知者极鲜。去年湖南之南学会，京师之保国会，皆西人演说会之意也。湖南风气骤进，实赖此力，惜行之未久而遂废也。今日有志之士，仍当著力于是。

自强学会之后，三年以来，各省倡立会名者，所在皆是，可谓极一时之盛。然不知外国人所谓会者，有种种之类别，故将学会与政党与协会与演说会混而为一，因宗旨不定，条理错杂，故办之难有成效，而守旧媚嫉之徒，又视之与秘密结社同类，故一举而芟蕘之矣。实则此数者之间，自有绝异之形式，一望可分识者，中国此风，正在萌芽，亦无怪其然也。

于日本维新之运有大功者，小说亦其一端也。明治十五六年间，民权自由之声遍满国中，于是西洋小说中，言法国、罗马革命之事者，陆续译出，有题为自由者，有题为自由之灯者，次第登于新报中，自是译泰西小说者日新月异。其最著者则织田纯一郎氏之《花柳春话》，关直彦氏之《春莺啭》，藤田鸣鹤氏之《系思谈》《春窗绮话》《梅蕾余薰》《经世伟观》等，其原书多英国近代历史小说家之作也。翻译既盛，而政治小说之著述亦渐起。如柴东海之《佳人奇遇》，末广铁肠之《花间莺》《雪

中梅》，藤田鸣鹤之《文明东渐史》，矢野龙溪之《经国美谈》

（矢野氏今为中国公使，日本文学界之泰斗，进步党之魁杰也）

等，著书之人，皆一时之大政论家，寄托书中之人物，以写自己之政见，固不得专以小说目之。而其浸润于国民脑质最有力者，则《经国美谈》《佳人奇遇》两书为最云。呜呼！吾安所得如施耐庵其人者，日夕促膝对坐，相与指天画地，雌黄今古，吐纳欧亚，出其胸中所怀硃礪磅礴、错综繁杂者，而一一熔铸之，以质于天下健者哉！

傀儡说

优孟之场，有所谓傀儡者焉。其奏伎也，设帷以蔽场，帷之上有似人形者，官体毕肖，衣服毕备。有人居帷下，傚傚焉持而舞之，啁哳焉为之歌，此剧场中最劣下而最暧昧者也。人而傀儡，时曰不人；国而傀儡，时曰不国。哀时客曰：呜呼！夫何使我国至于此极也！八月六日以后，圣主幽废，国既无君，然录京抄则仍曰恭奉上谕，上奏折则仍曰皇上圣鉴。我皇上口之所言，不能如其心，身之所行，不能以自主，然而引见召见，朝仪依然，如丝如纶，王言仍旧，是西后以皇上为傀儡也。西后不过一妇人，所耽者娱乐耳，非必篡位幽主然后快于心也。荣禄蓄异志，觊非常，惮于动天下之兵，乃藉后势以钳人口。其实所颁伪诏，未必皆西后之言，所行暴政，未必尽西后之意。荣禄自积操、莽之威，而西后代任牛马之劳，是荣禄以西后为傀儡也。俄人以甘言啖旧党，嗾之使糜烂其民，助之使斫丧其国。彼等有恃无恐，顽固之气益壮，革新之机益绝，迨于鱼烂已极，而俄人收渔人之利。自寻斧柯，为人驱除，是俄人以中国政府为傀儡也。呜呼！国之不振，谁不得而侮之！今之以我为傀儡者，岂独一国而已！全国关税握于人手，关道关督一傀儡也；全国铁路握于人手，铁路大臣、铁路公司一傀儡也；全国矿务握于人手，矿务大臣一傀儡也；沿江厘金握于人手，委员一傀儡也；洋操训练握于人手，将弁一傀儡也；无端而胶州割，无端而旅、大割，无端而威海、广湾割，无端而海门湾又将割，土地之权一傀儡也；一言而刘秉璋免，一言而李秉衡黜，一言而董福祥退，用人之权一傀儡也。嗟夫！今之灭国者与古异。古者灭人国，则渚其官，虏其君。今也不然，傀儡其君，傀儡其吏，傀儡其民，傀儡其国。英人之灭印度，土酋世其职者尚百数十年，傀儡其土酋也。六国之胁突厥，突厥之政府不废，傀儡其政府也。埃及傀儡于英，越南傀儡于法，高丽傀儡于俄。中国者，傀儡之顽而硕者也，一人之力不足以举之，则相率而共傀儡之。此蚩蚩者犹曰我国尚存我国尚存。而岂知彼眈眈者，已落其实而取其材，吸其精而盪其脑，官体虽具，衣冠虽备，岂得目之曰人也哉？嗟呼！必自傀儡，然后人傀儡之。中国之傀儡固已久矣，及今不思自救，犹复傀儡其君，傀儡其民，竭忠尽谋，为他人效死力，于是我二万方里之地，竟将为一大傀儡场矣。夫目人以傀儡，未有不色然怒者；今坐视君父之傀儡于奸贼，国土之傀儡于强邻，还顾我躬，亦已成一似人形而傚傚于帷间者。此之不羞，此之不愤，尚得为有人心哉？尚得为有人心哉！

动物谈

梁启超隐几而卧，邻室有甲、乙、丙、丁四人者，咄咄为动物谈，乃倾耳而听之。甲曰：吾昔游日本之北海道，与捕鲸者为伍。鲸之体不知其若干里也，其背之凸者，暴露于海面，面积且方三里。捕鲸者刳其背以为居，食于斯，寝于斯，日割其肉以为膳，夜然其油以为烛，如是者殆五六家焉。此外鱼虾蟹虫贝蛤，缘之噉之者，又不下千计。而彼鲸者冥然不自知，以游以泳，偃然自以为海王也。余语渔者：是惟大故，故旦旦伐之，而曾无所于损，是将与北海比寿哉？渔者语余：是惟无脑气筋故，故旦旦伐之，而曾无所于觉。是不及五日，将陈于吾肆矣。乙曰：吾昔游意大利，意大利之历脾多山有巨壑，厥名曰兀丕。壑黑暗，不通天日。有积水方十数里，其中有盲鱼，孳乳充斥。生物学大儒达尔文氏解之曰：此鱼之种，非生而盲者。盖其壑之地，本与外湖相连，后因火山迸裂，坼而为壑，沟绝而不通。其湖鱼之生于壑中者，因黑暗之故，目力无所用，其性质传于子孙，日积日远，其目遂废。自十数年前，以开矿故，湖壑之界忽通。盲鱼与不盲者复相杂处，生存竞争之力不足以相敌，盲种始将绝矣。丙曰：吾昔游于巴黎之市，有屠羊为业者。其屠羊也，不以刀俎，不以苙缚，置电机，以电气吸群羊。羊一一自入于机之此端，少顷自彼端出，则已伐毛洗髓，批籖析理，头、胃、皮、肉、骨、角分类而列于机矣。旁观者无不为群羊怜，而彼羊者前追后逐，雍容雅步，以入于机，意甚自得，不知其死期之已至也。丁曰：吾昔游伦敦，伦敦博物院，有人制之怪物焉，状若狮子，然偃卧无生动气。或语余曰：子无轻视此物，其内有机焉，一拨捩之，则张牙舞爪，以搏以噬，千人之力，未之敌也。余询其名。其人曰：英语谓之佛兰金仙。昔支那公使曾侯纪泽，译其名谓之睡狮，又谓之先睡后醒之巨物。余试拨其机，则动力未发，而机忽坼，螫吾手焉。盖其机废置已久，既就锈蚀，而又有他物梗之者。非更易新机，则此佛兰金仙者，将长睡不醒矣。惜哉！梁启超历历备闻其言，默然以思，愀然以悲，瞿然以兴，曰：呜呼！是可以为我四万万人告矣。

惟心

境者，心造也。一切物境皆虚幻，惟心所造之境为真实。同一月夜也，琼筵羽觞，清歌妙舞，绣帘半开，素手相携，则有余乐；劳人思妇，对影独坐，促织鸣壁，枫叶绕船，则有余悲。同一风雨也，三两知己，围炉茅屋，谈今道故，饮酒击剑，则有余兴；独客远行，马头郎当，峭寒侵肌，流潦妨毂，则有余闷。“月上柳梢头，人约黄昏后”，与“杜宇声声不忍闻，欲黄昏，雨打梨花深闭门”，同一黄昏也，而一为欢憨，一为愁惨，其境绝异。“桃花流水杳然去，别有天地非人间”，与“人面不知何处去，桃花依旧笑春风”，同一桃花也，而一为清静，一为爱恋，其境绝异。“舳舻千里，旌旗蔽空，酺酒临江，横槊赋诗”，与“浔阳江头夜送客，枫叶荻花秋瑟瑟。主人下马客在船，举酒欲饮无管弦”，同一江也，同一舟也，同一酒也，而一为雄壮，一为冷落，其境绝异。然则天下岂有物境哉？但有心境而已。戴绿眼镜者所见物一切皆绿，戴黄眼镜者所见物一切皆黄；口含黄连者所食物一切皆苦，口含蜜饯者所食物一切皆甜。一切物果绿耶、果黄耶、果苦耶、果甜耶？一切物非绿、非黄、非苦、非甜，一切物亦绿、亦黄、亦苦、亦甜，一切物即绿、即黄、即苦、即甜。然则绿也、黄也、苦也、甜也，其分别不在物而在于我。故曰三界惟心。

有二僧因风扬刹幡，相与对论。一僧曰风动，一僧曰幡动，往复辨难无所决。六祖大师曰：“非风动，非幡动，仁者心自动。”任公曰：三界惟心之真理，此一语道破矣。天地间之物一而万、万而一者也。山自山，川自川，春自春，秋自秋，风自风，月自月，花自花，鸟自鸟，万古不变，无地不同。然有百人于此，同受此山、此川、此春、此秋、此风、此月、此花、此鸟之感触，而其心境所现者百焉；千人同受此感触，而其心境所现者千焉。亿万人乃至无量数人同受此感触，而其心境所现者亿万焉，乃至无量数焉。然则欲言物境之果为何状，将谁氏之从乎？仁者见之谓之仁，智者见之谓之智，忧者见之谓之忧，乐者见之谓之乐。吾之所见者，即吾所受之境之真实相也。故曰惟心所造之境为真实。

然则欲讲养心之学者，可以知所从事矣。三家村学究，得一第则惊喜失度，自世胄子弟视之何有焉？乞儿获百金于路，则挟持以骄人，自富豪家视之何有焉？飞弹掠面而过，常人变色，自百战老将视之何有焉？“一簞食，一瓢饮，在陋巷，人不堪其忧”，自有道之士视之何有焉？天下之境，无一非可乐、可忧、可惊、可喜者，实无一可乐、可忧、可惊、可喜者。乐之、忧之、惊之、喜之，全在人心。所谓“天下本无事，庸人自扰之”，境则一也，而我忽然而乐，忽然而忧，无端而惊，无端而喜，果胡为者？如蝇见纸窗而竞钻，如猫捕树影而跳掷，如犬闻风声而狂吠，扰扰焉送一生于惊喜忧乐之中，果胡为者？若是者谓之知有物而不知有我；知有物而不知有我，谓之我为物役，亦名曰心中之奴隶。

是以豪杰之士，无大惊，无大喜，无大苦，无大乐，无大忧，无大惧。其所以能如

此者，岂有他术哉？亦明三界唯心之真理而已，除心中之奴隶而已。苟知此义，则人人皆可以为豪杰。

慧观

同一书也，考据家读之，所触者无一非考据之材料；词章家读之，所触者无一非词章之材料；好作灯谜酒令之人读之，所触者无一非灯谜酒令之材料；经世家读之，所触者无一非经世之材料。同一社会也（即人群）

，商贾家入之，所遇者无一非锱铢什一之人；江湖名士入之，所遇者无一非咬文嚼字之人；求宦达者入之，所遇者无一非谄上凌下、衣冠优孟之人；怀不平者入之，所遇者无一非陇畔辍耕、东门倚啸之人。各自占一世界，而各自谓世界之大，已尽于是，此外千形万态，非所见也，非所闻也。昔有白昼攫金于齐市者，吏捕而诘之曰：“众目共视之地，汝攫金不畏人耶？”其人曰：“吾彼时只见有金，不见有人。”夫一市之人之多，非若秋毫之末之难察也，而攫金者不知之，此其故何哉？昔有佣一蠢仆执爨役者，使购求食物于市，归而曰：“市中无食物。”主人曰：“嘻！鱼也、豕肉也、芥也、姜也，何一不可食者？”于是仆适市购辄得之。既而亘一月，朝朝夕夕所食者，皆鱼也、豕肉也、芥也、姜也。主人曰：“嘻！盍易他味？”仆曰：“市中除鱼与豕肉与芥与姜之外，无有他物。”夫一市之物之多，非若水中微虫，必待显微镜然后能睹也，而蠢仆不知之，此其故何哉？

任公曰：吾观世人所谓智者，其所见与彼之攫金人与此之蠢仆相去几何矣？李白、杜甫满地，而衣袂褰、携锄犁者必不知之；计然、范蠡满地，而摹禹行、效舜趋者必不知之；陈涉、吴广满地，而飧五鼎、鸣八驺者必不知之。其不知也，则直谓世界中无有此等人也，虽日日以此等人环集于其旁，而彼之视为无有固自若也。不此之笑，而惟笑彼之攫金者与此之蠢仆，何其蔽欤？

人谁不见苹果之坠地，而因以悟重力之原理者，惟有一奈端；人谁不见沸水之腾气，而因以悟汽机之作用者，惟有一瓦特；人谁不见海藻之漂岸，而因以觅得新大陆者，惟有一哥伦布；人谁不见男女之恋爱，而因以看取人情之大动机者，惟有一瑟士丕亚。无名之野花，田夫刈之，牧童蹈之，而窝儿哲窝士于此中见造化之微妙焉；海滩之僵石，渔者所淘余，潮雨所狼藉，而达尔文于此中悟进化之大理焉。故学莫要于善观。善观者，观滴水而知大海，观一指而知全身，不以其所已知蔽其所未知，而常以其所已知推其所未知，是之谓慧观。

无名之英雄

日本德富苏峰所著《静思余录》中有文一篇，题曰《无名之英雄》者，余甚爱之，今摘译一二以实我《自由书》。其文曰：

余今尚记忆，余儿时常伴亲属出乡赴熊本，于其途间，忽见巍城耸空，有睥睨天地之概。余惊喜欲狂，当时余惟知其高大耳，问其何以高大之由，不能知也。

余今尚记忆，余昔在学校，爱英雄，仰英雄，梦英雄，心醉英雄。当时余惟信英雄之为英雄耳，问英雄之何以得为英雄，不能知也。

嗟乎！余乃今始有所悟，彼一片之石虽大，不足以筑高城；一个之人物虽伟，不足以为英雄。使高城如彼其高者，有无名之础石为之也；使英雄如彼其大者，有无名之英雄为之也。尔勿以英雄之事业为一人一个之事业，又岂直事业而已。即彼英雄之自身，亦非一人一个所得而成也。城楼之耸于霄，据楼下无数之础石而耸，彼高城者，代表此无名之础石云尔。英雄之秀出世界，赖无数绝不知名之英雄而秀，彼英雄者，代表此无名之英雄云尔。

华盛顿，英雄也，使彼为宇宙一闲人，果能成就十三州之独立乎？格林挖，英雄也，使彼不在于清教徒之社会，果能奏英国革命之绩乎？路得，英雄也，使彼不立于十六世纪欧洲之中心，则宗教之改革果成于彼之手乎？是决不可。是故华盛顿之下，有无名之华盛顿无量数焉；格林挖之下，有无名之格林挖无量数焉；路得之下，有无名之路得无量数焉。彼英雄者，恰如金刚石，看来虽仅一块，分析之则实由多数之同质同角度同分子的阿屯体而成者也。人孰不曰造天下者英雄也。虽然，造英雄者谁乎？若以彼英雄为世界之恩人，然则英雄之恩人谁乎？曰：是非赖此无名之英雄不可。

有一英雄，必有一无名之英雄扛而负之，有一无名之英雄，又必有他无名之英雄扛而负之。譬之一水车之大轮，必与他之小轮合力而动。而动此大小车轮之水势，又自何处来乎？今日汹汹转磨千万匹马力之水，即昨日深山幽谷中流觞咽石游鱼清浅之水也。由此观之，世界之运动真不可思议，其运动者在于此处，而运动此运动者却在于彼处。然则世界之大动机，果在何处乎？吾知其在于世界，而不知其在于世界之何处。彼之耸立于世界上而建大旄、擂大鼓、捉大风、弄大潮者，皆所谓有名之英雄也。若无名之英雄何有焉？彼无名者非惟人不知我，即我亦不自知，夫是之谓真无名。

不观尔怀中之时辰表乎？自外面观之，不过长短二针，转去转来，其简单也如彼。自里面窥之，则有如毛发之螺线，如比栳之小轮，其繁杂也如此。世界运动之机关，亦若是焉耳。

立于表面者不过二三之英雄。虽然，世界之事业，即英雄之事业也，英雄者不过其长短二针而已。若论事业为英雄独力所能至，是无异谓时表为长短针独力所能行，不亦僭乎？夫彼之造英雄运动英雄者，即隐于世界中之农夫、职工、役人、商贾、兵卒、小学教师、老翁、寡妇、孤儿等恒河沙数之无名英雄也。彼等固非欲驱使英雄，虽然，世之英雄，未有不甘心下气俯首而愿受其驱使者，莫或为之，若或致之，所谓无冠之皇帝，非此辈而谁？

嗟乎！彼等者，国之生命也，世之光也，平和之泉也，福之源也，世界之大恩人也。世若有爱英雄之人，请先爱此无名之英雄；若有欲顶礼于英雄脚下之人，请先顶礼此无名英雄之脚下；若有望英雄出世之人，请先望此无名英雄之出世。岂不闻一株之树虽大，不足以成森林；一片之石虽崇，不足以为山岳。无名之英雄，真英雄哉！

饮冰子曰：德富氏此论，所谓时势造英雄之说也。今日中国之所以不振，患在无英雄，此义人人能知之、能言之。而所以无英雄之故，患在无无名之英雄，此义则能知之、能言之者盖寡矣。夫我中国今日果有英雄乎？无英雄乎？吾不得而断之。浸假有一二之英雄焉，有三数之英雄焉，而全国之人能许其卒成英雄与否？非吾之所敢言也。譬之一军于此，其能成大功者系乎将帅，然使将帅能成大功者，又系乎兵卒，虽以拿破仑、惠灵吞之能，而使之率中国之绿营防勇，吾知其必无能为役也。一军如是，一国亦何莫不然？国也者，非一二人之国，千万人之国也；国事也者，非一二人之事，千万人之事也。以一国之人，治一国之事，事罔不治；若欲以一二人而治一国之事，其余千万人皆委之而去，或从掎龥之，虽圣贤未有能治者也。世有望治者乎，愿勿望诸一二人，而望诸千万人。质而言之，即勿望诸他人，而望诸自己云尔。勿曰我不能为英雄，我虽不能为有名之英雄，未必不能为无名之英雄，天下人人皆为无名之英雄，则有名之英雄必于是出焉矣。

虽然，时势固造英雄，英雄亦造时势，助将帅之成功者兵卒也，而训练此兵卒使能为我助者，又在将帅也。世有欲为英雄者乎？盍先用力以造出此无名之英雄哉！

志士箴言

一昨读某报，有文一首，题曰《志士箴言》，吾读之肃然正襟，流汗浹背，深自愧，抑不敢不自厉也。因亟写一通置诸座右，并以谗我同志，咸使自愧自厉，以冀不负作者棒喝之苦心焉。原稿自隐姓名，秋水蒹葭，徒使我想望不尽，惆怅何极。若作者不以某为不可教而辱觐之，请惠一短简，自述踪迹，许其纳交，是又某之所愿望也。谨录其文曰：

天下事至易莫如死，一得其死，则万世有生气矣。天下事至难莫如死，一言及死，则尽人有馁心矣。今设执四万万人以问之，果有死而复死者乎？无有也。又试执四万万人以问之，果有终至不死者乎？无有也。然则此呱呱坠地之时，即有渺渺还空之日，梦梦数十寒暑间，为圣贤，为豪杰，为庸愚，为污贱，为大奸巨滑，为志士仁人，无不同归于尽。但其所以尽而不尽，与尽而即尽，直至与恒河沙数，同作野马也，尘埃也，蜕此臭皮囊，还诸大地，而大地之中，遂永不知有是人也。此其中非有他故也，人人有必死之日，而人人偏有畏死之心。终日徼幸于有生不死，而绝不思夫虽死犹生，以故生则未可知，而死则竟死。平心而论，留此数十年枉立天地有憾生成无称孙子之身，以朝斯夕斯，饕斯粥斯，直待老病死疾以至泯然渐灭，并其形影姓名，概归诸无何有之乡、旷漠之野，自顾与朝菌蝼蛄为伍，则亦无事深论矣。俨然以觉世救民开化进步之豪杰自命，乃于生死之故，尚不洞明，一遇疾风板荡，而即局促如辕驹，无声如反舌，低眉如菩萨，衰颓如屈子。即有百炼之钢，竟化为绕指之柔，荆轲之气，亦变作舞阳之面，彼其人者，岂真易其素志悔其初心，而大失本来之面目哉？毋亦曰畏死之情胜，遂不惜屈心抑志，遵时养晦，以待天日重见，风云复会，而留身命以有待耳。嗟乎！成则任掀天动地之美名，败则惟天昏地黑之坐视。脱令大局终穷，长此终古，其将佯狂以没世欤，抑别立功名以自见欤？姓名虽未树党人之碑，罪名已入爰书之券。发迹飞腾之有日，终必与刀锯褫革为缘。今之所谓志士仁人，其终穷也必矣，与其除著作等身垂空文以自见外，别无可传可法之名，何若行吾初服，再起而为四百兆同胞力争身家性命之大权？不济则以死继之，一死不足，则群起而引颈就之，剖心明之，但使令天下万世，咸知为吾种吾教起见，而并非为一身之富贵利达计，则今日以身命为牺牲之人，必他年享牺牲而永不死之人也。况各国文明之治，无不从流血而成，有志者类能言之。今以四万万人，丧元者不过六人，流血者不及十步，乃欲翻数千年之旧根，振二十一省之新象，窃恐死者为其易而易者自易，生者为其难而难者终难耳。东南数省，热心时变者，号称数万人，若为茅焦，若为豫让，若为刘章，若为敬业，若为聂政，若为朱亥，若为铁铉，若为景清，若为朱云，若为陈东，争之，抗之，摧之，撼之，挟之，声罪而致讨之。一波未平，一波复起，前者伏诛，后者执简，缺彼菜市之刀，而再接再厉，丛叠稿街之首，而亦步亦趋。彼党虽素称极顽、极固、极狠、极凶，而其下手愈辣者，人心愈不平。人心愈不平，则天下莫不欲饮刃于其腹。此日本长野君所谓舍身命以作牺牲，即忠之谓也，勇之谓也。今以忠君自命勇于变法之人，而即未尽其忠、未见其勇若此，为程婴者既难其人，为杵臼者岂易偿其志也？昔张巡

被执，谓南霁云曰：“南八，男儿死耳，不可为不义屈。”每诵斯言，未尝不凛凛有生气，谓其得死所而绝无馁心矣。今一摧败而即群焉皆馁，莫敢再兴，天下事宁有转机乎。嗟嗟！生遇圣明，不才见弃，德行不登诸里巷，姓名未达乎天听，引镜窥形，头颅空负。乃欲以仰首伸眉，论列是非，固已自惭不类耳，而复以不谅之意，妄惋惜乎豪杰有志之流。呜呼，不重滋之戚欤！

朝从屠沽游，夕拉驹卒饮。此意不可道，有若茹大鲠，传闻智勇人。惊心自鞭影。蹉跎复蹉跎，黄金满虚牝。匣中龙光剑，一鸣四壁静。夜夜辄一鸣，负汝汝难忍。出门何茫茫，天心牖其逞。既窥豫让桥，复瞰轵深井；长跪奠一卮，风云扑人冷。此龚自珍氏之诗也，吾录《志士箴言》已，感慨终夕，更录此以写我心。

天下无无价之物

西谚曰：“天谓众生曰：一切物皆以畀汝，但汝须出其价钱。”可谓至言。

任公乃自呵曰：革新者，天下之伟业也。汝欲就此伟业，而可以无价得之乎？余一斗之粟，尚须若干之价值；捕一尾之鱼，尚须若干之苦劳。汝视邦家革新之大事，其所值曾一斗粟、一尾鱼之不若乎？嘻！

舌下无英雄，笔底无奇士

吾之爱友韩孔庵有诗曰：“庆忌焚七族，要离沉妻子。人生苟虚生，不如其死矣。举目览八荒，谁为真男子？舌下无英雄，笔底无奇士。”吾每诵其言。

乃复自呵曰：汝俨然为此四百兆神明种族之一人，汝之责任何在乎？今日之世界何？铁血世界也。而可以笔舌了汝责任乎？汝以笔舌浪窃虚名，汝有何功德于世界，而腴然被人呼汝为先觉乎？虚名日高一日，则责任日重一日，而汝曾不自知乎？笔乎舌乎，其遂断送汝一生乎？嘻！

呜呼！蹉跎髀肉，惊中岁之催人；如此头颅，求天涯之善价。志士乎，志士乎，胡不自箴？

世界最小之民主国

国于世界之两半球者，其数何限？虽然，有庞然拥数千万里之地、数千百兆之人，而不能谓之为国者；亦有眇然地不满十里、人不满足百数，而不能不谓之为国者。何也？国也者，对于内而有完备之行政机关，对于外而有无缺之独立主权者也。苟二者不备，国虽大，犹谓之无国；苟二者具备，国虽小，犹谓之有国。今列举世界最小之民主国数四，以供觐国者之考鉴焉，不徒为茶余酒后之谈资而已。

一、达窝拉拉国。在撒尔尼亚（即意大利之母国）

之西北，长五英里，广不及半英里，亭然一岛国也。居民合计不及六十人，每六年公举大统领一名，议官六名，皆不受俸银，报效国事。选举之际，举国男女皆有投票之权。自1886年，成为独立国以来，国内静谧，从无选举纷争之事。西人称为南欧之一大乐土云。此国之历史，自1836年，撒尔尼亚王封其亲族某氏为岛主，未及五十年，岛民厌君主政体，经数次之战争，至1886年，遂制定宪法，为一个之民主国。尔来著著改进国政，意大利首认之，列国相继认之，遂成为完全无缺之独立国。此国民之生业，以渔业为重，农业次之，其生计极丰裕，无外敌之虞。虽无海陆之军备，一朝有事，六十名之国民皆为兵云。

二、俄德尔国。在法国之南，皮历尼山之巅，面积仅方一英里半，人口仅百四十。

以幅员论，为世界最小之国也。然其行民主政体，实在美国之前。当1648年，既经法国及西班牙之承认，俨然为欧洲中一个独立国。其大统领自元老官中推选，元老官凡十二名，皆国内之老农也。每十二年改选一次，大统领兼收税吏、行政官、裁判官之职，若其所裁决之事不惬民望，则人民下山而请西班牙之僧正处决之云。

三、加郎撒布国。在美国北方，卡罗利拿之西部，国内分为二州。虽除英国之外，未有他国认其独立，然其行政自由自主，不受他国辖治。其位置在于谷地，面积八十英方里，土地最为肥沃。大统领四年一任，每年受五百元之薪俸，议员半之，其政府有国务大臣三名，每人民百口举议员一名云。

四、桑玛里国。在意大利中部，而世界民主国中最有名者也。面积有三十三英方里，人口八千五百，其京都在距海面二千英尺之高地。京都人口约一千二百，风景绝佳，世界列国罕见其比。其法律由立法院议员所制定。议员凡六十名，皆终身任期，又自此议员中选十二人为议官，裁决各种之问题。此议官中又二人为国务卿，代表国家统率内务、外务、大藏等诸大臣。兵额有九百五十名，财政年年皆有预算表。此国与意大利订条约，凡自意国入口货物收关税，自本国出口而往意国之货物则免之。

维新图说

蓬蓬哉，郁郁哉！数月以来，“维新云”“维新云”之语，弥漫磅礴于国中。无论为帝、为后、为吏、为士、为绅、为商，但使稍有脑气筋者，苟上以“守旧鬼”三字之徽号，度无不瞋目相视，断断然鼓舌以自辨其非。呜呼！以视去年今日，何其异也。其所以得此者非他，乃谭嗣同、杨深秀、杨锐、刘光第、康广仁、林旭、唐才常、林圭、裕禄、毓贤、启秀、徐承煜、赵舒翹、英年，德公使，日本书记生，与夫千数之自立会员、千数之义和团党、千数之外国教士、中国教民之血，相注射、相掺杂成一种不赀之价值而购得之者也。举事不成而非不成，流血无益而非无益。呜呼噫嘻！吾欲为中国贺。

虽然，吾昔见中国言维新者之少也而惊，吾今见中国言维新者之多也而益惊。试略举维新者之种类：有欲奉西后以维新者，有欲奉今上以维新者，有欲倾满洲以维新者，有欲缓缓以维新者，有欲急急以维新者，有欲用温和手段以维新者，有欲用激烈手段以维新者，有欲行全国集权之维新者，有欲行分立自治之维新者，有排外以行维新者，有媚外以行维新者，有为保朝廷之基业而不得不维新者，有为保国民之权利而不得不维新者，有为保一己之权势声名富贵而不得不维新者。其种类千差万别，而又非一人归一种类，大抵参伍错综，掺杂淆乱，而各具一奇异之色相。试列图以明之：

以上八图，略举大概，虽不足以尽其形相，虽然，亦既已繁赜淆杂，千声万色矣。吾以为其种别如何不必问，其党派如何不必问，其目的如何不必问，其办法如何不必问，其主义如何不必问，其动力如何不必问，乃至其变相如何亦不必问。所最当辩者，惟心术而已。使其心而为国民也，公也，无论何种别，何党派，何目的，何办法，何主义，何动力，何变相，而必终归于一。使其心而为一姓也，自以为公而实私也，其志愈诚，其行愈勇，而其病天下也愈甚。使其心而为一己也，私也，且假公以济其私也，吾宁愿举四百兆人皆为“守旧鬼”，而必不愿我国有此等人也。呜呼噫嘻！蓬蓬哉，郁郁哉！数月以来，“维新云”“维新云”之语，弥漫磅礴于国中，吾欲以第八图鉴天下之言维新者，且欲吾侪言维新者之一自鉴也。呜呼噫嘻！吾其贺耶？吾其吊耶？

十九世纪之欧洲与二十世纪之中国

十八世纪之末，法国大革命起，血腥模糊，哭声匍匐，戳破欧洲之中心点；加以拿破仑旷代英雄乘之而起，遂至劳全欧之联军，仅制其焰，而自由之空气，遂遍播荡于欧洲。动力与反动力，互相起伏，互相射薄，小退大进，而卒有今日。读近百年来之西史，何其壮也！何其快也！十九世纪之末，中国义和团起，血腥模糊，哭声匍匐，戳破亚洲之中心点；亦既已劳全欧之联军，仅制其焰，而拿破仑果安在耶？而亚洲大陆自由之空气，何以沉沉噎噎而至今无端倪耶？吾欲我国民一思其故。汉之季也，八俊、八顾、八厨、八及，名士遍天下，爱国者皆属望焉，顾无救于汉之亡；而崎岖山谷，存汉腊数十年者，乃一当时无名之诸葛亮。明之季也，东林、复社，名士遍天下，爱国者皆属望焉，顾无救于明之亡；而飘蓬海岛，存明朔数十年者，乃一当时无名之郑成功。即法国大革命之始，民党名士星罗棋布，风驰电掣，只能破坏法国，不能成就法国，而成就之者，乃一当时无名之拿破仑。意者中国之拿破仑，今犹未出世耶？吾愿爱国之士，其勿以中国再造之业，望诸今日有名之维新党。彼真英雄固不可以名求也，抑所谓今日有名之维新党者，其勿自尊大，亦勿自暴弃，惟尽其责任，以为将来出世之拿破仑前驱先导，或者二十世纪之亚陆，其未必多让于十九世纪之欧陆耶！

前驱亦有道乎？曰有。彼法国之能破坏，非革命党独力破坏之也，有破坏之前驱也；法国之能成就，亦非拿破仑独力成就之也，有成就之前驱也。大革命之戳欧洲，与义和团之戳亚洲，其形迹略同，而结果乃大异者，盖结果之来，必与原因成比例，盖亦观两者之原因相去何如矣！承前此如此之原因，而欲求将来如彼之结果，是何异

磨砖作镜

、炊沙为饭也。西

人有言：“十八世纪者，十九世纪之母也。”（专指欧洲言）

故吾愿今日自命维新党者，勿遽求为欧洲十九世纪之人物，而先求为欧洲十八世纪之人物，吾亚其将有瘳。

西人亦有言：“革新之机，如转巨石于危崖，不动则已，动则其机势不可遏，必赴壑而后止。故最要者莫过于动力。有动力必有反动力，有反动力又必有其反动力之反动力，

反反相续，动动不

已，而大业成焉。”试征诸欧洲。法

国大革命（1789年），其原动力也；神圣同盟（1814年）

，其反动力也；七月革命（1830年）

，又神

圣同盟之反动

力也；其后各国之镇压政策，又其反动力也；二月革命（1848年），又其镇压政策之反动力也；卒至帝王同盟散，梅特涅（奥国宰相）逃，然后全欧之国民主义，乃定基础焉。其波澜之俶诡往复，历百数十年，未尝一日停顿宁息，而卒达其目的也如此。我中国戊戌之役，可谓原动力也；八月政变，其反动力也；义和团，反动力之极点也；今年之竞言维新，又义和团之反动力。盖四年之间，而动力之往复者已三次矣。凡力之动也，其抛线之圈，愈扩而愈大。故第一次之反动力，其现象必更剧于原动力；而第二次之反动力（即反动力之反动力，与原动力同物者），其现象又必更剧于原反动力（即第一次反动力）。以次递进，皆循兹轨。故见反动力之来，勿惧勿患，当知其第二次加大反动力之来，必不远矣。吾中国动机，今始发轫，此后反动，其必四次、五次乃至六、七、八、九、十次而未有已。譬之所谓危崖转巨石，其崖千仞，而其石今始坠数寻，前途辽哉，岂有艾乎？虽然，夫亦安得而遏之？吾意今世纪之中国，其波澜俶诡，五光十色，必更有壮奇于前世纪之欧洲者。哲者请拭目以观壮剧，勇者请挺身以登舞台。

问者曰：自今以往，第四次之反动力，何自而生乎？曰：不见夫俄罗斯乎？亚历山大第二未改革以前，俄罗斯民党之势力阒如也；其以后则磅礴郁积，至于今日，而几不可复制。夫帝者改革，宜可以消民间维新党不平之气矣。亚历山大第二之改革，其事业亦不可谓不洪大矣。而反为导引民党之火线者何也？盖革新者危崖转巨石，非达其终点而决不能中止者也。譬有异味，不尝则已，尝则必欲饱啖焉，必非可以染指分杯而餍其欲也。俄罗斯之民，前此不知有所谓平等主义、自由思想者，故相与习而安焉，谓为固然，虽经百数十年不动可也。及经一度改革之后，如十年幽窗之人忽开片扇，睹一线之曙光，恍然见天地万象，如此其可爱，其始不甘以幽窗老也。此所以改革为动力之大原也。其动力之圈，必甚于未动以前；其反动力之圈，又如例加大。反反相续，动动不已，自今以往，俄罗斯终不能不行欧洲大陆之政体，此全世界有识者所同料也。吾中国亦若是而已。新党乎！新党乎！厚集尔动力，以为将来出世英雄驱除，二十世纪新中国，其将赖之！

俄人之自由思想

于二十世纪中，有可以左右世界之力量者，三国焉：曰俄国，曰美国，曰中国是已。而此三国者，又必将大变其前此之情状，然后可成其大业。变之之道奈何？则美国由共和主义而变为帝国主义，俄国、中国由专制主义而变为自由主义是已。中国与俄国相类似之点颇多，其国土之广漠也相类，其人民之坚苦也相类，其君权之宏大而积久也相类。故今日为中国谋，莫善于鉴俄。

倭儿可士鸠者，俄国革命党之巨子也。英京伦敦有俄罗斯自由同志会，而倭氏实为其会报主笔，于今年二十世纪之初开幕，著录阅论一篇，名曰《俄人之自由思想》。今译录之，俾我国民知俄国之舆情，及其将来变迁之种子，而因以自择焉。其言曰：

俄罗斯国民之改革思想，五年以来，进化甚骤。盖初时国民之希望，全注于新皇之一身，今则逐渐迁移，而国民中有新智识者，渐为一国之代表焉。不观夫俄国之学问家与学生乎？其自重之态度，不屈之精神，真有令人起敬者。今皇尼古刺之初即位也，有非常之人望，盖俄国国民未知新君之主义若何，人物若何，故抱各种之希望，以欢喜热心而迎之。此其故何欤？盖先帝亚力山第三，压制之化身也，其十四年间之政治，使国民疲倦，殆如经半世纪憔悴于虐政者，故亚力山第三得“大鞭挞者”之绰号，非偶然也。此大鞭挞者一旦崩殂，国民之眼咸注于二十六岁之新皇，以为此年少英敏之君，必能贵自由，顺民望，行宽大之政。故当时俄民如释重负，虽然，闻丧而喜，恐伤新帝之感情也。故其欢喜之情，隐秘而不敢发露。大行之归丧于莫斯科也，葬仪之盛，前古罕闻，悉索赋税，民不堪命。虽然，俄民不敢怨焉，盖将忍其困难，以达来者之希望云尔。

吾俄无国会，其代表民意之机关，惟有州会（XEMSTUOS）而已，此举世之所闻知也。故新帝即位之际，州会为民代表上书，表其忠义之心以悼先帝，又以最谦恭之语，沥述民情，请准以后俄国人民，得以所欲所苦直达朝廷，不经官吏之手。此其所请，可谓不失于礼，不悖于理，最平和正当之请求也。使新皇而有几微之新思想，不以家畜视人民，则此等上书，必无害其感情，有断然者。

1895年1月17日，行即位及大婚礼。市邑、军队、州会及各种团体之代表者六百人集于殿前，举行祝典，皇帝尼古刺乃宣言曰：“今全国各阶级之代表者，为表白忠爱之心，咸集此处，朕之所深喜也。古来俄国臣民，皆抱至诚之忠义心，故今日卿等之所表，朕深信之。虽然，顷者州会联名上书，欲得全国人民参与国事之权。朕今有不得不质言者，朕于国民有益之事，必以全力赴之。虽然，至于先帝所行独裁主义，朕必率由之，罔敢或坠。一言以蔽之，则朕之政治，一无以异于先帝之政治也。”云云。此演说一出，全国人民不胜失望，实则人民之所希望者，非欲限制君权，乃欲求得真正之独裁政治而已。彼等于先帝在位之历年，恶官吏之跋扈，不能堪

其残忍暴戾，而欲以君主一人之直接据法律以施政治，其义甚正，而其情亦甚诚。其奈新皇不悟此意，反因沿前皇腐败之业，以左袒官吏。此则俄国民所为意外失望者也。

虽然，彼等无聊之极思，终恋恋然有余望，以为皇帝不过少年少阅历，而思想混杂未决定云尔。待至加冕之时，或更示其真意以利我民，未可知也。故当时全国国民之声，莫不企踵以望曰：加冕期至矣，加冕期至矣。乃自此后，而国民之失望，有更甚于前者，加冕一役，其费用为俄国建国以来未有之巨额。而庆祝之日，警察失职，至使人民来祝者，死四千余人。尸血狼藉，遍于莫斯科之野，而皇帝曾无一毫哀悼之色，欣欣然以赴跳舞会。于是人民不胜愤慨，遂冲乘舆之前卫，投石于皇帝之马车，毁跳舞会场之陈设，暴言暴行，不一而足，虽警察官极力镇之，不能禁也。呜呼！吾俄人民非故与帝室为仇也，其所以至此者，谁之过欤？谁之过欤！

使皇帝自经此役以后，知民暴之可畏，察官吏之无状，则补牢顾兔，犹未为迟。乃人民出种种方法，诉其疾苦，皇帝一无所顾，而束缚驰骤，殆更甚焉。民有所请，则辄以下吏议，彼官吏者，人民之蠹贼，盗憎主人，古今通例，欲行民政而下吏议，是何异与虎谋其皮也。于是人民所请，不惟无效，而反以此获罪官吏，罹法网者道相属焉。迨乎今年，学生之骚动起，皇帝乃使压制党首领威安挪鸠将军案验其事，更下严诏以胁学生，谓以后复有此等举动，当以严法使服兵役。于是乎俄国人民几度之希望，于兹尽矣。

外国人不知俄国之真相，惟俄国之炯眼而能知之。新皇自倡万国平和会议之后，声望隆隆日上，洋溢寰宇，而俄国人民则窃窃然笑之以鼻。不见乎口血未干，而俄政府已先自破其誓，违背宪法，而强芬兰人使服兵役，使负担加重之经费乎。昔林肯有言：“汝欲愚弄一时之人民可也，欲愚弄一部分之人民可也。若欲时时永远愚弄全部分之人民，恐其不可。”呜呼！凡为君主者，为国民者，皆不可不深鉴此言也。

吾今欲为我俄民进一言。自古未有倚赖一二人，而能成国家维新之业者，全国人民知前所倚赖者之一无足恃，是即吾国民政治发达之期至矣。

俄罗斯人，大可自重之国民也。虽合多数之种族以成国，其间言语不通，习俗不同，然其实皆同出于斯拉夫之总族，共建此国以求文明之进步。俄国之起源，在第九世纪，远后于欧洲列国，加以建国后仅四百年，为蒙古所侵掠，濒于灭亡。虽然，我强健之人种，终克大敌，驱而放之，以势力而自发达，故就外面观之，俄国民于政治上，于社会上，虽视列国有逊色，然其实际必非劣于他之文明国。试观其文学界，其艺术界，其音乐、诗歌、科学之社会，决不在英德诸国之下。至俄人之繁殖力，及其采用文明之速，凡稍解俄国内情者，所共知也。且俄国人之政治社会，所以进步迟迟者，非我国民不适于文明之政治、文明之社会也，实由吾国今日之境遇

，全为官吏所压抑，而破坏其本有之良性也。使一旦除其丰蔀，去其羁绊，任俄民以自然之力自图进步，则其成效之速，必有耸全球之观听者。呜呼！我国民与压制政体相战，既非一日，四十年前青年革命之事，其若何勇敢，若何壮剧，世之所闻也。彼等之血不虚流，今者机会殆将熟矣！

尔来因工商社会之变动，工价下落，工人愈加困难，不平之气愈益增长。1896年，圣彼得堡之同盟罢工起，凡三万五千人之劳动者，倡议制限每日劳动时刻，而十万人之土木工作应援之，其势力浩大，遂使政府不得不于翌年而发布新法律。

此次之同盟罢工，其所得虽少，然其结果实有重且大者。何则？以民意而使政府改作法律，实起点于兹役也。彼工人所以能结此大团队，而为文明之运动者，实由有学识之人士为之尽力，而大学生实其中心点也。全国之法律家及报馆主笔，凡有识之青年，走集而助之。为之草章程，为之作捐启，为之通声气于外国之同志者，声援既厚，组织既完，乃始发手。故能成得未曾有之功。自兹以往，俄国各大都会，皆有工人同盟，至1898年，合各都会之同盟为一大同盟，称为“俄国共和党”。其范围若何之广，其势力若何之强，虽可不计，然俄政府虽极力与之战，而不能灭之。

民智既开，则专制政治自不得不颠覆。故愚民之术，凡专制政府一定之方针也。虽然，时势者常动者也，日进者也，俄政府虽有万钧之力，亦安能与时势敌？故政府虽出种种方法以禁窒民智，而民间亦自有种种方法以开通之。即如著述一道，政府之压制愈烈，而言论亦愈盛。凡俄国民之曾受教育者，政治思想大发达，革命精神蓬蓬勃勃，而近者学生同盟罢业，其最显著者也。本年2月20日，圣彼得堡大学纪念会之日也，校中学生之一队，以嫌疑而受警察官之凌辱。此事一起，凡全都中之大学生，及稍有学识之人士，咸大激昂，处处集会，为政治上之运动，于是大学生共议，向于政府有所要求，所求不遂，则相率不受业于大学。既而海军士官四十人，首与此学生通殷勤，既而医学校之生徒，亦同盟罢业，既而全都诸种高等学校、女学校凡十七所之学生，咸加盟焉。同时又派密使于全国诸学校，凡各大都会之学生，尽与首都桴鼓相应，全国学校之教室，几键户阒无一人矣。

要而论之，凡国民之自由思想，必藉抑压之势力而后能勃兴，所谓压力不甚，则跃力不高，此古今万国所循之常轨也。我俄国何莫不然？今日竞争剧烈之世界，苟民智不进步，社会不发达，则必不能保其地处于列雄之间。虽然，进步与发达，专制政治之敌也。此二者终不能两立。吾俄国之宗教、道德、学术皆有精华美妙之芽，含蕊而未展，一旦除去政治之桎梏，则满园秾艳，可立而待矣！

二十世纪之新鬼

二十世纪之开幕，至今凡三百日有奇，世界之巨人，死于是者五人焉。一曰英国女王域多利亞，二曰日本政友会首领、前递信大臣星亨，三曰伊大利左党首领、前宰相格里士比，四曰美国合众党首领、原任大总统麦坚尼，五曰中国议和全权大臣、直隶总督李鸿章。杨朱有言：“生则尧舜，死则腐骨；生则桀纣，死则腐骨。”虽复穷尊极贵，殊俊奇杰，亦岂能有与天地长久者耶？环瀛万里，各自撒手，四时之运，成功者去，碧落黄泉，颇不寂寞。

以权势地位论之，则域多利亞与麦坚尼为一类；以声名之久、福命之高论之，则域多利亞与李鸿章为一类；以民间之压力论之，则星亨、格里士比、麦坚尼为一类；以战功之显著、外交之敏活论之，则格里士比与李鸿章为一类；以早年之艰辛被窘被逐于官吏论之，则星亨、格里士比为一类；以晚年唾骂之多论之，则星亨与李鸿章为一类；以现时当权一举一动为世界所注目论之，则李鸿章与麦坚尼为一类；以享寿之高论之，则域多利亞、格里士比、李鸿章为一类；以赍志未竟、死事惨酷论之，则星亨与麦坚尼为一类。

域多利亞、麦坚尼、李鸿章之事实，吾邦人多能知之，兹不俱述。请略叙星亨与格里士比之所经历。

星亨，日本近来政界之雄也。明治五年，尝为横滨税关长，以误称英皇为英王，触英公使之怒，不肯自屈，罢职而游学英国。明治十年，归为政府附属律师，未几自由党兴，彼以后进入党，峥嵘倔强，为先辈所器重，卒乃握自由党中独一无二之权力。星亨一生之历史，实日本自由党始末历史也。当明治十五六年间，彼率党人攻击政府，鏖战不遗余力，遂以明治十八年下狱，二十年被放逐于外，二十三年议院既开，举为议员，旋任下议院议长。因与改进党相敌，夺议长之职，削议员之籍。

明治二十九年，复任

美国公使，三十二年，任满归。值宪政党

（即进步、自由两党合并改名者）

政府之末运，彼直挥大刀阔斧，散内阁，散宪政党。三十三年，改自由党为立宪政友会，未几政友会得政，组织内阁，星亨为递信省大臣。星亨为人雄才大略，有不可一世之概，胆智冠世，日日与其政敌鏖战，所向披靡，遂赫然为日本现世第一人物。而生平不谨小节，好货赂，大为国人所诟病，为大臣不数月，以旧赃事牵连辞职，然犹居议院，指挥最多数之政党焉。本年七月，为一侠客所刺，卒于市会议场。

格里士比，以1819年生于伊大利之西西里岛，早岁为律师，1848年，伊大利革命之役，格氏实为其有力者，事败，遁于法兰西。既又被逐，窜于英国。飘蓬海岛，无以为生，时或冻饿经旬，卖文于各报馆，仅得充饘粥，如是者凡十余年。至1860年

，始从革命军大将雅里巴治入于西西里岛，西西里遂自立。及伊大利一统之业成，举为议员，寻任下议院议长，屡为政府大臣，尝两度为宰相。伊大利有左、右党，而格氏实左党之首领也。其内治政策，恒与教会极力相反对，其外交政策，务亲德意志以抑法兰西，欧洲三国同盟（德、奥、伊三国），格氏最有功焉。后以事为反对党所扼，遂于1896年辞职，自脱于政海之风波，优游林下以终余年。伊大利建国之日虽尚浅，而能屹然立于欧洲居一等国之位置，实格氏与嘉富尔、雅里巴治三雄之功居多云。以本年八月卒，年八十有三。

呜呼！若星氏、格氏，可不谓旷世之豪杰也哉，此五人者，于其国皆有绝大之关系。除域多利亞为立宪政治国之君主，君主无责任，不必论断外，若格里士比，若麦坚尼，皆使其国一新焉，若星亨则欲新之而未能竟其志者也。以此论之，则李鸿章之视彼三人，有惭德矣。李鸿章每自解曰：吾被举国所掣肘，有志而未逮也。斯固然也。虽然，以视星亨、格里士比之冒万险、忍万辱、排万难以卒达其目的者何如？夫真英雄恒不假他之势力，而常能自造势力，彼星氏、格氏之势力，皆自造者也。若李鸿章则安富尊荣于一政府之下而已，苟其以强国利民为志也，岂有以四十年之勋臣耆宿，而不能结民望以战胜旧党者。惜哉！李鸿章之学识不能如星亨，其热诚不能如格里士比，所凭藉者十倍于彼等，而所成就乃远出彼等下也。质而言之，则李鸿章实一无学识无热诚之人也。虽然，以中国之大，其人之有学识有热诚，能愈于李鸿章者几何？十九世纪列国皆有英雄，而我国独无一英雄，则吾辈亦安得不指鹿为马，聊自解嘲，翹李鸿章以示于世界曰：此我国之英雄也。呜呼！适成为我国之英雄而已矣，亦适成为我国十九世纪以前之英雄而已矣。域多利亞之君英国也，六十余年，李鸿章之相中国也，四十余年。以一身而当国之久，近世中未有及此两人者也。虽然，域多利亞六十年中，英国扩土遍于五洲，遂至有“THE SUN CONTINUALLY SHINES ON OUR BRITISH FLAG”

（译言：太阳常照我

英国旗也。意谓英国属土遍于两半球也）

之骄语，何其荣也！李鸿章四十年中，中国日蹙百里，试一披亚细亚东部舆图，其改渲颜色者殆十余处矣，何其耻也。夫英国之荣，固不能为域多利亞一人功，中国之耻，亦不能为李鸿章一人罪。呜呼！十九世纪往矣，而二十世纪方将来。曾国藩常言：“已往种种，譬如昨日死；未来种种，譬如今日生。”吾辈于十九世纪之代表人无歆焉无责焉，亦视二十世纪之新人何如耳？

麦坚尼非十九世纪美国之代表人，而二十世纪美国之代表人也。美国自华盛顿创业，门罗昌言，皆务保疆，不务攻取，经营美洲，不及他洲。自麦坚尼就任以来，一举而县古巴，再举而吞夏威夷，三举而攘菲律宾，共和主义一变为帝国主义，遂使西半球新世界，与东亚大陆忽相接近。自今以往，美国将突飞五洲，主盟群雄，而中美之交亦自此多事，是皆麦坚尼所以贻后人也。李鸿章结旧中国之终，而麦坚尼开新美国之始。麦坚尼死，而将来为麦坚尼继志者，当不止千万；李鸿章死，而将

来为李鸿章干蛊者谁耶？

嗟夫！望八荒之寥廓，何地无才；送九原之沉冥，问天不语。陈陈代谢，去日疏而来日亲；咄咄逼人，后视今犹今视昔。青灯有味，逝水无情；聊附长吟，以代信史。

“旗
翻日所出
入处，功到天为歌
泣时。五大洋中海水静，群龙齐呖挽歌诗。”（上一首域多利亚）

“一生自猎知无敌，百中争能耻下鞬（用杜老咏鹰句）
。今日江山忽寂寞，飞鹰衔箭坠寒秋。”（上一首星亨）

“累累六度苏子印，咽咽十
载吴市箫。国自少年吾老矣
（格氏尝与玛志尼创一会名曰“少年伊大利”），菟裘人去雨潇潇。”（上一首格里士比）

“壮夫生夺门罗席
（门罗，前美国总统，尝宣言美国不干预他洲之事，他洲亦不得干预美洲之事，世称“门罗主义”），雄鬼死傍林肯坟
（林肯，
前美国总统，为放
黑奴，开南北美之战。战后继任，被
刺卒者）。无赖商风海西警，半旗蔽地吊天民。”（上一首麦坚尼）

“阳
秋未定盖
棺论，病国能成竖子名。如此江山且休去，夕阳黄叶送君行。”（上一首李鸿章）

难乎为民上者

民气弱之国，为民上者最易，而国恒替；民气昌之国，为民上者最难，而国恒强。故今日为文明之首长者，既不可无非常之勇气，常立于战场，冒险决死以伸政策，尤不可不以非常之公心，顺揣輿情，著著为公利公益著想，乃可以安其位保其身。吁，其难哉！

星亨与麦坚尼，皆死于刺客者也。而星与麦之所以遇刺者不同，麦则全由敌党之忌嫉，而星则不尔。星则多由于平昔之自取，而麦则不尔。要之各难其难则一也。日本之兴，侠客与有功焉，所谓武士道，所谓大和魂，皆拔剑击柱一瞑不视之徒也。井伊直弼死于是，大久保利通死于是，森有礼死于是，今星亨复死于是。虽曰害社会之秩序，而旱地霹雳，往往使天地为之昭苏者。日本之精神，其在是欤。

若夫欧洲十九世纪各国首长，遭此厄者尤数见不鲜。以俄国论之，1801年保罗帝被杀，1881年亚历山大第二为炸药所毙，而先帝亚历山大第三，自言终日若在幽囚，一夕九迁，曾靡宁息。今皇尼古刺第一当游日本时，亦几不免矣。俄罗斯为地球第一专制之国，其现状若此，无足怪者。

至于美国，则1865年大统领林肯遇害，1881年大统领雅里非儿遇害，至本年麦坚尼复蹈前轨焉，即最近三十六年间，大统领之死于毒手者三人矣。夫以专制政体出产地（即俄国）之帝王之生命，与自由政体出产地（即美国）之统领之生命，两者比较，孰危孰安，似不待问。即向人寿燕梳公司买保险，则其价率自当俄增而美减，固其当也。乃其比较之实际如此，岂有他哉。民气愈昌之国，为民上者愈难，此公例之不可逃者也。

吾为此言，吾非左袒无政府党也。无政府党者，不问为专制国，为自由国，而惟以杀其首长为务，彼等之目的，在破坏秩序，若夫专制秩序与自由秩序，皆非所问也。彼等秩序之敌也，文明之敌也。虽然，必有文明，然后有文明之敌，故民气弱之国，非惟求文明不可得，即求文明之敌亦不可得也。

呜呼！使移今日中国之为民上者以居欧美日本，吾见星亨、麦坚尼之事，月接于目，而日触于耳矣！

烟士披里纯

(INSPIRATION) 【灵感】

人常欲语其胸中之秘密，或有欲语而语之者，或有欲勿语而语之者。虽有有心、无心之差别，而要之胸中之秘密，决不长隐伏于胸中，不显于口，则显于举动，不显于举动，则显于容貌。《记》曰：“夫微之显，诚之不可掩，如此乎！”吁！可畏哉！盖人有四肢五官，皆所以显人心中之秘密，即肢官者，人心之间谍也，告白也，招牌也，其额蹙蹙，其容悴悴者，虽强为欢笑，吾知其有忧；其笑在涡，其轩在眉者，虽口说无聊，吾知其有乐。盖其胸中之秘密，有欲自抑而不能抑，直透出此等之机关以表白于大庭广众者。述怀何必三寸之舌？写情何必七寸之管？乃至眼之一闪，颜之一动，手之一触，体之一运，无一而非导隐念述幽怀之绝大文章也。

西儒哈弥尔顿曰：“世界莫大于人，人莫大于心。”谅哉言乎！而此心又有突如其来，莫之为而为，莫之致而至者。若是者我自忘其为我，无以名之，名之曰：烟士披里纯（INSPIRATION）。烟士披里纯者，发于思想感情最高潮之一刹那顷，而千古之英雄豪杰、孝子烈妇、忠臣义士以至热心之宗教家、美术家、探险家，所以能为惊天地、泣鬼神之事业，皆起于此一刹那顷，为此烟士披里纯之所鼓动。故此一刹那间不识不知之所成就，有远过于数十年矜心作意以为之者。尝读《史记·李广列传》云：“广出猎，见草中石，以为虎。射之，中石，没羽。视之，石也。因复更射之，终不能复入石矣。”由此观之，射石没羽，非李将军平生之惯技，不过此一刹那间，如电如火，莫或使之，若或使之，曰惟烟士披里纯之故。马丁·路得云：“我于怒时，最善祈祷，最善演说。”至如玄奘法师之一钵一锡，越葱岭，犯毒瘴，以达印度；哥仑布之一帆一楫，凌洪涛，赌生命，以寻美洲；俄儿士蔑之唱俚谣，弹琵琶以乞食于南欧；摩西之斗蛮族，逐水草，以徘徊于沙漠。虽所求不同，所成不同，而要之皆一旦为烟士披里纯所感动所驱使，而求达其目的而已。卢梭尝自书其《忏悔记》后曰：“余当孤筇单步旅行于世界之时，未尝知我之为我。凡旅行中所遇百事百物，皆一一鼓舞发挥我之思想，余体动，余心亦因之而动。余惟饥而食，饱而行，当时所存于余之心目中者，惟始终有一新天国，余日日思之，日日求之而已。而余一生之得力，实在于此。”云云。呜呼！以卢梭心力之大，所谓放火于欧洲亿万人心之火种，而其所成就，乃自行脚中之烟士披里纯得来！烟士披里纯之动力，诚不可思议哉！

世之历史家、议论家往往曰：英雄笼络人。而其所谓笼络者，用若何之手段，若何之言论，若何之颜色，一若有一定之格式，可以器械造而印板行者。果尔，则其术既有定，所以传习其术者亦必有定，如就冶师而学锻冶，就土工而学抔埴。果尔，则习其术以学为英雄，固自易易；果尔，则英雄当车载斗量，充塞天壤。而彼刻画英雄之形状，传述英雄之伎俩者，何以自身不能为英雄？噫嘻！英雄之果为笼络人与否，吾不能知之。藉曰笼络，而其所谓笼络者，决非假权术，非如器械造而印板

行，盖必有所谓烟土披里纯者。其接于人也，如电气之触物，如磁石之引铁，有欲离而不能离者焉。赵瓯北《二十二史札记》论刘备曰：“观其三顾诸葛，咨以大计，独有傅岩爰立之风。关、张、赵云自少结契，终身奉以周旋，即羁旅奔逃，寄人篱下，无寸土可以立业，而数人者患难相随，别无贰志。此固数人者之忠义，而备亦必有深结其隐微而不可解者矣。”岂惟刘备？虽曹操，虽孙权，虽华盛顿，虽拿破仑，虽哥郎威儿，虽格兰斯顿，莫不皆然。彼寻常人刻画英雄之行状，下种种呆板之评论者，恰如冬烘学究之批评古文，以自家之胸臆，立一定之准绳。一若韩、柳诸大家作文，皆有定规，若者为双关法，若者为单提法，若者为抑扬顿挫法，若者为波澜擒纵法，自识者视之，安有不喷饭者耶？彼古人岂尝执笔学为如此之文哉？其气充乎其中，而溢乎其貌，动乎其言，而见乎其文，而不自知也，曰惟烟土披里纯之故。

然则养此烟土披里纯亦有道乎？曰：烟土披里纯之来也如风，人不能捕之；其生也如云，人不能攫之。虽然，有可以得之之道一焉，曰至诚而已矣。更详言之，则捐弃百事，而专注于一目的，忠纯专一，终身以事之也。《记》曰：“至诚所感，金石为开。”精神一到，何事不成？西儒姚哥氏有言：“妇人弱也，而为母则强。”

(WOMAN IS WEAK, BUT MOTHER IS STRONG) 夫弱妇何以能为强母？唯其爱儿至诚之一念，则虽平日娇不胜衣，情如小鸟，而以其儿之故，可以独往独来于千山万壑之中，虎狼吼咻，魍魉出没，而无所于恐，无所于避。盖至诚者，人之真面目而通于神明者也。当生死呼吸之顷，弱者忽强，愚者忽智，无用者忽而有用。失火之家，其主妇运千钧之笥，若拾芥然。法国奇女若安，以眇眇一田舍春春之弱质，而能退英国十万之大军。曰惟烟土披里纯之故。

使人之处世也，常如在火宅，如在敌围，则烟土披里纯日与相随，虽百千阻力，何所可畏？虽擎天事业，何所不成？孟子曰：“至诚而不动者未之有也，不诚未有能动者也。”书此铭诸终身，以自警戒，自鞭策，且以告天下之同志者。

无欲与多欲

顷读日本《国民新闻》，有德富苏峰氏所著论，题曰《无欲与多欲》，其论颇有精深透拔者，故录之而演其义。

苏峰子曰：人无无欲者。或好色，或好货，或好名，或好学，要之无有欲者。即如禅寂之徒，以槁木死灰自命，然终不免有槁木死灰之欲。浅见者流，往往谓彼多欲也，此无欲也，皆妄生差别相而已。

近世之豪杰，如西乡南洲者，殆可谓无欲人矣。其诗云：“吾家遗法君知否，不为儿孙买美田。”世俗之欲，殆皆净尽。虽然，彼一旦闻萨儿之暴发，忽牺牲其一身，甘与其子弟为情死，遂歌曰：“白发衰颜非所意，壮心横剑愧无勋。”盖彼视其一身轻如鸿毛，而以不能立盖世之功为一生大憾事。果然，则南洲可谓全无欲乎？

吾以为世俗之所谓无欲者，未必无欲；所谓多欲者，未必多欲。要而论之，则欲之有无多少，惟视其所欲之性质与种类何如耳。彼西乡南洲之眼中，或以平沼专藏辈为无欲之极，亦未可知也。贪夫徇财，烈士徇名，哲人徇道。其趋向不同，则其欲念之所生亦自不同耳。

人莫不欲其最上之物。若以美人为最上之物，则美人以外，一切屏弃以求之，不惜焉；若以金钱为最上之物，则金钱以外，一切屏弃以求之，不惜焉。以至他物他事，莫不例是。是故吾人不必求无欲，无欲者决非吾人之所能及也。无宁先自审择决定，以何物为最上，而集注一切之欲念以向之。究之无欲云者，无世俗之欲云尔。彼之所欲者，视世俗之欲，有加高焉，有加大焉。以此之故，故无暇日以顾俗欲。然则无欲云者，虽谓之以大欲克小欲，以高欲克卑欲，以清欲克浊欲焉，可也。

饮冰子曰：《孟子》曰：“养心莫善于寡欲。”《荀子》曰：“凡人所欲多，其可用必多。”斯二者各明一义，有并行而不相悖者焉。物质上之欲，惟患其多；精神上之欲，惟患其少。而欲求减物质上之欲，则非增精神上之欲，不能为功。其消息之间，殆有一定之比例。释迦所以舍净饭太子之贵而苦行六年，摩西所以弃埃及职官之安而漂流万里，路得所以辞教皇不次之赏而对簿大廷，哥伦布所以抛里井优游之乐而投身遥海，曰惟有欲之故。燕雀乌知鸿鹄志？陈涉莽夫，犹能为此言，而况于亘古万国之圣贤豪杰乎！

孔子不云乎：“我欲仁，斯仁至矣。”今试问孔子有欲乎？曰：孔子天下之多欲而大欲者也。故曰：“知之者不如好之者，好之者不如乐之者。”孔子之于救天下利生民也，视之如流俗人之好饮食、好男女、好金钱、好名誉。岂惟孔子，凡古以来之圣贤豪杰，彼其毕生之所经营所贯注，旁观人观之为惊天动地，能人所难，百世之下，震骇之，膜拜之；而返诸彼圣贤豪杰之本心，亦不过视为纵欲之具而已。人

见有男女之为情而死者，辄笑之曰：嘻！抑何其痴！而不知圣贤豪杰之为道而死、为国而死、为民而死，其与彼情死者，分量之大小，关系之重轻，虽有不同，至其专注一欲而断弃他欲，则一而已。夫是之谓至诚。呜呼！安得有以宝玉、黛玉之痴情痴欲以饷于国民者乎？吾将执鞭以从之。

佛弟子问佛曰：“何谓如来种？”佛言：“无明有爱，是如来种。”无明有爱者，多欲之谓也。

说悔

语曰：“君子之作事也无悔。”悔也者，殆非大贤豪杰之所当有乎？虽然，佛教曰忏悔，耶教曰悔改，孔子曰过则勿惮改，凡古今大宗教教育之主旨，无不提倡此义，以为立身进德不二法门，则又何也？

《大易》四动曰：吉、凶、悔、吝。吝者凶之源，而悔者吉之本也。悔何以为吉之本？凡人之性恶也，自无始以来，其无明之种子，久已熏习于藏识中。故当初受生之始，而无量迷妄，既伏于意根矣；及其住世间也，又受现生恶业熏习所成的社会之熏习，彼此相熏，日习日深，虽有善根，而常为恶根所胜，不克伸长，不克成熟。于是乎欲进德者不可不以战胜旧习为第一段工夫。《大学》曰：“作新民。”能去其旧染之污者谓之自新，能去社会旧染之污者谓之新民。若是者非悔末由。悔也者，进步之原动力也。

子张，吴之狙佞也，颜涿聚，鲁之大盗也，而能受学孔子，为大儒，曰惟悔之故；大迦叶，富楼那，皆顽空之外道也，而能深通佛乘，列于十八大弟子之数，曰惟悔之故；保罗，与耶稣为难最力者也，而能转心归依，弘通彼教，功冠宗门，曰惟悔之故。至如卫之贤大夫蘧伯玉，行年五十而知四十九年之非；晋之名士周处，幼年为三害之一，后乃刻厉自新，为世名儒。以子夏大贤，而丧子丧明，恸天痛哭，自诉无罪，及闻曾子之面责，乃投杖而起曰：“吾过矣，吾过矣，吾离群索居亦已久矣。”彼其心地何等磊落，其气象何等俊伟，百世之下，如见其精神焉。下至文章雕虫小技，而扬子云犹称每著一书，悔其少作；曹子建言，好人讥弹其文，有不善者，应时改定。兹事虽小，然彼等所以能在数千年文界卓然占一席者，亦岂不以是耶！魏武帝自言：“曹操做事，从来不悔。”曹操之所以能为英雄者以此，曹操之所以不能为君子者亦以此。悔之时义大矣哉！

悔之发生力有二途：一曰自内，二曰自外。自内发者非有大智慧不能，否则如西语所谓“烟土披里纯”，有神力以为之助也。自外生者，或读书而感动焉，或阅事而感动焉，或听哲人之说法而感动焉，或闻朋友之规谏而感动焉。要之，当其悔也，恒皇然凛然有今是昨非之想，往往中夜瞿省，汗流浹背，自觉其前者所为，不可以立于天地。所谓一念之间，间不容发。非独大贤豪杰有之，即寻常人亦莫不有焉，特视其既悔后之结果何如耳。

凡言悔者，必曰悔悟，又曰悔改。盖不悟则其悔不生，不改则其悔不成。《易》曰：“不远复，无祇悔，元吉。”孔子《系》之辞曰：“颜氏之子，其殆庶几乎？有不善未尝不知，知之未尝复行也。”是故非生其悔之难，而成其悔之难。曾文正曰：“从前种种，譬犹昨日死；从后种种，譬犹今日生。”故真能得力于“悔”字诀者，常如以一新造之人立于世界，《大学》所谓“日日新”者耶。一人如是，则一身进步；国民如是，则一国进步。

悔改之与自信，反对之两极端也。佛法既言忏悔，又言不退转。今欲以悔义施诸教育，得无导人以退转之路耶？抑彼信道不笃，巽懦畏事，半途弃其主义者，岂不有所藉口耶？曰：是又不然。孟子曰：“自反而不缩，虽褐宽博，吾不憚焉；自反而缩，虽千万人，吾往矣。”《大学》曰：“所谓诚其意者，毋自欺也。如恶恶臭，如好好色，此之谓自慊。”凡人之行事，善不善，合于公理不合于公理，彼各人之良心常自告语之，非可以假借者也。是故昔不知其为善而弃之，昔不知其为恶而蹈之，或虽知之而偶不及检，遂从而弃之蹈之，及其既悟也，既悔也，则幡然自新焉，是之谓君子之悔。若乃前既已明知之矣，躬行之矣，而牵于薄俗，怵于利害，溺于私欲，忽然弃去，艾己尤人，是之谓小人之悔。君子之悔，其既悔既改也，常泰然若释重负，神明安恬；小人之悔，其既悔既改也，常腼然若背有芒，夜夜忐忑。君子之悔，一悔而不复再悔；小人之悔，且又将有大悔之在其后也。然则真能悔者，必真能不退转者也。何也？悔也者，进步之谓也，非退步之谓也。

机埃的格言

偶阅德富苏峰所著书，有译机埃的氏格言数则，辄重译之以实《自由书》。

古人所思索之外，亦无足供我辈今日之思索者，我辈惟务反复思之重思之耳。

【苏峰按】“天地间无新事物”一语，实不易之真理，欲举万物万事而自我发明之，盖妄人耳。熟路虽熟，若重来而加以视察，则清新之景，常在目前。

【任按】学者求新知识，固属要事，然于当前陈腐之事物，决不可轻看而吐弃之。吾今日每读中国理学家之书，常觉其于国民教育上有一大部分之关系，每读中国历史，觉其趣味浓深，应接不暇。

淤泥之耀，限于日光所照之间。

【苏峰按】日光不照，则淤泥惟淤泥耳。

【任按】是故人必尝有所独得，不可依附末光。无论任事，无论讲学，皆当尔尔。

善也，美也，不能自知者也。

【苏峰按】善美之所以为善美，惟在不自知其善美而已。若自觉其如是，则善美之香味立即消散。盖无邪者，善美之最要原质也。桃李不言，下自成蹊，其爱绝清绝，在于不自知其芬馥也。

忘恩者，一种之弱性也。吾未见有能之士，不感谢他人也。

【苏峰按】常认识自己之负债，了了不忘者，英雄儿之有真骨头者也。管仲岂忘鲍叔哉？

有爱与己同臭味之人而求之者，有爱与己异臭味之人而寻之者。

【苏峰按】人有种种，世界有种种，以此之故。

【任按】爱同己者，常人之性也；爱异己者，求益之道也。电气必合正负两电而后生力，生物必和阴阳两性而后发荣，人不可不务以反比例之事物，自鉴自进。

吾人当因其性之所近，以讲求世界有形无形之学，世界者常有光明之方面，则有暗黑之方面也。

【苏峰按】乐天家常觉世界为极乐，厌世家常觉世界为极苦，极苦极乐，惟在一心。

【任按】世界无论何等社会，皆含有种种色相，不亲入其社会，不能知也。一旦入之，别有天地，别有国土，一蜂也，一蚁也，一土也，一石也，物理学家终身研究之，不能尽焉。政治社会、宗教社会、学者社会、商业社会、劳动社会、盗贼社会、乞丐社会，苟入其一而以慧眼观察之，无往而不可得最真、最大之原理。虽然，通其一，万事毕。有光明之方面，则黑暗之方面，亦光明矣。生也有涯，知也无涯，故因性之所近，可以知世界。

希望者，失意人之第二灵魂也。

【苏峰按】有希望则可转失意为得意。

【任按】有希望则虽失意亦得意，希望愈远愈大者，无入而不自得也。

热心者最大之价值也，虽然，吾人不为其所驱遣，乃得其真价值。

【苏峰按】人若为热心之奴隶，则热心如狂气一般，其价值复何有焉？

【任按】人莫患为他人之奴隶，尤莫患为自己之奴隶。为人奴隶，犹可解脱，为己奴隶，则永无解脱之时。所谓为己奴隶者，心为形役是也。故吾常言心为形役者，奴隶之魁而最可哀怜者也。据此言，则心为心役，犹且不可，况于形役乎？

无论何人，必不于其仆隶之前逞英雄。无他，惟英雄能识英雄，若施之于仆隶辈，则亦惟得其同辈的仆隶之良月旦耳。

【任按】凡欲博声名于流俗人者，可悬此语为当头棒喝。

智者愚者俱无害，最危险者，惟在半智半愚之人。

【苏峰按】生兵法者，大败之基也。

凡作事，将成功之时，其困难最甚。

【苏峰按】此阅历世途者所无异辞也。

【任按】行百里者半九十，有志当世之务者，不可不戒，不可不勉。

勿以知而自足，宜应用之；勿以欲而自足，宜实行之。

【苏峰按】此乃驱吾人使百尺竿头更进一步之金言也。惟此一步，实人之所以为人也。

富国强兵

有贫国弱兵者，有贫国强兵者，有富国弱兵者，有富国强兵者。若葡萄牙，若希腊，贫国弱兵也。若意大利，若日本，贫国强兵也。若比利时，若荷兰，富国弱兵也。若英吉利，若法兰西，若德意志，富国强兵也。此十九世纪世界舞台之大概也。有可以富国强兵，今则兵虽强而国未富者，俄国是也。有可以富国强兵，今则国虽富而兵未强者，美国是也。有可以富国强兵，今则国亦未富、兵亦未强者，中国是也。此三国者，二十世纪世界舞台第一等重要之国也。

俄国之必将富，美兵之必将强，是可悬定之问题也。中国之将以贫弱终乎否乎？是难定之问题也。中国之地不贫而国贫，中国之民不弱而兵弱，是世界一怪现象也。然则其贫之弱之者，必有一魔鬼实作梗作弄于其间，吾国民但当求得魔鬼所在而拔除之，则二十世纪之舞台，将为吾国民所专有，未可知也。

世界外之世界

诸葛孔明初与石广元、徐元直、孟公威等俱游学，三人务精熟，诸葛独观大略，常抱膝长啸，而谓三人曰：“卿等仕进可至刺史、郡守。”三人问其所至，但笑而不言。日惟躬耕陇亩，好为《梁父吟》。呜呼！此何等心胸，何等气象！彼其于群雄扰攘、四海鼎沸之顷，泊然置其一身于世界外之世界，而放炯眼以照世界，知自己之为何人，知世界之为何状，己与世界有如何之关系，知己在世界当处如何之位置。盖其所以自审自择者，固已夙定，必非欲以苟全性命于乱世终其身也。盖知彼三人者，随时势之人，而已乃造时势之人也。呜呼！真人物，真豪杰，其所养有如此者。

人也者，好群之动物也（此西儒亚里士多德之言）

。近自所亲，远及所未见，相交互而成世界。虽然，日处于城市杂遝之地，受外界之刺激熏染，常不复自识我之为我，故时或独处静观，遁世绝俗，然后我相始可得见。顾所谓遁世绝俗者，其种类亦有数端：一则旁观派者流，伪为坚僻诡异之行，立于世外，玩世嘲俗，以为韵事佳话，所谓俗中笑俗，毫无取焉。次则以热心之极，生一种反动力，抱非常之才，睹一世之瞶瞶，不忍扬波醖醢，乃甘与世绝，不以泯泯污察察，不以骥驥任驽骀。此三闾大夫之徒也，君子哀之，且深敬之。亦有性本恬淡，独禀清淑，不乐与人间世交涉，而放浪形骸之外者。古今高流之诗人，往往有之。如李白之诗，所谓“问余何事栖碧山，笑而不答心自闲。桃花流水杳然去，别有天地非人间”，其天才识想，自相高出于凡俗者。但此等人于世界无甚关系，吾甚爱之，不愿学之。

寻常人能入世界而不能出，高流者能出世界而不能入。最高流者，既入之，复出之，既出之，复入之，即出即入，非出非入，曷哉尚乎！望之似易，行之甚难。虽不可强而致，顾不可不学而勉。无论如何寻常之人，日为寻常界所困，如醉如梦，及其偶遇一人独居更无他事之时，时或有翛然洒然，与天地为伴侣，而生不可思议之思想者。英国某小说所载一段，有足描写此情态者。其言曰：

狄西将军之征埃及也，有一骑士为亚刺伯人所擒，深夜伺隙窃逃，沿尼罗河上流，急鞭疾驱，尽马力所及。马卒疲毙，遂独遗一身于浩浩沙漠之中，欲进不能，欲退不得，惟啜咀椰子以自活。万籁无声，乾坤寂寥，极目一望，渺茫无涯，惟见地平线尽处，如画如缀。绝望之极，抱椰树痛哭。时鼓无聊之勇气，大声而呼，其声惟远消散于沙际，曾无反响。偶觉有之，则惟心所幻造而已。寂寥之余，万感累动，远想故国之天地，车如流水，马如游龙，杂遝繁华之境，历历在目。过此数日，每日必有无量数之新感想，涌起陡落，欲禁而不能自禁。于孤身只影人声全绝之间，忽开出自然之秘密藏，得不可思议之感悟。见太阳之出又没，没又出，觉有无限庄严之象，隐于人界。或见一二怪禽之高翔，数片旱云之掩空，红黄碧绿，种种色相，凡映于眼帘者，则其心藏必缘之而浮一新想。一轮孤月，透破夜色，光闪沙上，

四望灿烂，凉风簸沙，自成波线，动漾无息。时或暴风怒号，峨峨沙柱，挺立寥空者，殆百十数。俄然风息，星斗阑干，爽气顿生，恍如听空中皇裔微妙之天乐。自谓此中乐趣，为生平所未遇。以后欲追之而无计可得，盖其愉快有不足为外人道者。

夫以彼骑士不过寻常一浊物，非能有道心真自得者，而处于此境，尚能发尔许之思想，增尔许之智慧，物之移情，固如是乎？

画师之作画也，往往舐笔伸纸，注全身之力于只手，其心惟在画上，不及其外；然时或退两三步若五六步，凝视之，更执笔向纸如初，如是者数次，而画乃完成。诗家亦然，常有苦思力索，撚断髭茎，终不得就；时而掷笔游想，不见有诗，惟见有我，妙手偶得，佳句斯构。故成连学琴，导之海上；飞卫教射，视虱如轮。天下事固有求之于界线之内而不得，求之于界线之外然后得之者。郑裨谌善谋，谋于野则获，谋于邑则否。无论何人何事，常有此一段境界，善用之者，斯为伟人。

俾士麦稍有休暇，则退舍于田园，或单身入夜，彳亍散步。其所计画国事，多在此时。彼虽非理想家，然其所经营，常超越凡人，不好为规矩所束缚，故常脱羁绊而住于惟我独尊之境。彼尝在福郎克戈寄一短笺于其夫人云：“舟以某日泛来因河。予乘明月，泳乎中流，浮露水面，仅鼻与眼。晁浴时许，直达滨涇。彻夜悄静，循流徐行，仰视惟见月星娟娟，横睇两崖，峦巘重叠，如迎如送，棋布平原，惟古战场。耳根所接，仅有水声，泠然恍兮，乃似幽梦。噫嘻！一年三百六十日，安得时时有此游。”格兰斯顿亦然，退食之暇，屏妻子，去婢仆，一人退于后园，伐木丁丁然。自余大宗教家，更多斯迹。摩哈默德在觅加为商，单身遁于寂寞之地者数次，其悟道也，实在希拉之一浅洞。释迦牟尼苦行六年，乃起于菩提树下。哲人杰士，罔不如是。

何以故？清明在躬，则志气如神。天下固未有昏浊营乱之脑质，而可以决大计立大业者。而凡大人物大豪杰，其所负荷之事愈多愈重，则其与社会交接也愈杂愈繁，非常有一世界外之世界，以养其神明。久而久之，将为寻常人所染，而渐与之同化；即不尔，而脑髓亦炙涸，而智慧亦不得不倒退。故欲学为大人物者，在一生中，不可无数年住世界外之世界；在一年中，不可无数月住世界外之世界；在一日中，不可无数刻住世界外之世界。呜呼！风雨如晦，鸡鸣不已；虽不能至，心向往之。

舆论之母与舆论之仆

凡欲为国民有所尽力者，苟反抗于舆论，必不足以成事。虽然，舆论之所在，未必为公益之所在。舆论者，寻常人所见及者也；而世界贵有豪杰，贵其能见寻常人所不及见，行寻常人所不敢行也。然则豪杰与舆论常不相容，若是，豪杰不其殆乎？然古今尔许之豪杰，能灿然留功名于历史上者踵相接，则何以故？

赫胥黎尝论格兰斯顿曰：“格公诚欧洲最大智力之人。虽然，公不过从国民多数之意见，利用舆论以展其智力而已。

”约翰·摩礼

（英国自由党名士，格公生平第一亲交也）

驳之曰：“不然。格公者，非舆论之仆，而舆论之母也。格公常言：‘大政治家不可不洞察时势之真相，唤起应时之舆论而指导之，以实行我政策。’此实格公一生立功成业之不二法门也。盖格公每欲建一策、行一事，必先造舆论，其事事假借舆论之力，固不诬也；但其所假之舆论，即其所创造者而已。”

饮冰子曰：谓格公为舆论之母也可，谓格公为舆论之仆也亦可。彼其造舆论也，非有所私利也，为国民而已。苟非以此心为鹄，则舆论必不能造成。彼母之所以能母其子者，以其有母之真爱存也。母之真爱其子也，恒愿以身为子之仆。惟其尽为仆之义务，故能享为母之利权。二者相应，不容假借。豪杰之成功，岂有侥幸耶？

古来之豪杰有二种：其一以己身为牺牲，以图人民之利益者；其二以人民为刍狗，以遂一己之功名者。虽然，乙种之豪杰，非豪杰而民贼也。二十世纪以后，此种虎皮蒙马之豪杰，行将绝迹于天壤。故世界愈文明，则豪杰与舆论愈不能相离。然则欲为豪杰者如之何？曰：其始也，当为舆论之敌；其继也，当为舆论之母；其终也，当为舆论之仆。敌舆论者，破坏时代之事业也；母舆论者，过渡时代之事业也；仆舆论者，成立时代之事业也。非大勇不能为敌，非大智不能为母，非大仁不能为仆。具此三德，斯为完人。

文明与英雄之比例

世界果藉英雄而始成立乎？信也。吾读数千年中外之历史，不过以百数十英雄之传记磅礴充塞之，使除出此百数十之英雄，则历史殆黯然无色也。虽然，使其信也，则当十九世纪之末叶，旧英雄已去，新英雄未来，其母乃二十世纪之文明，将随十九世纪之英雄以坠于地。此中消息，有智慧者欲一参之。

试观英国，格兰斯顿去矣，自由党名士中可以继起代兴者谁乎？康拔乎？班拿曼乎？罗士勃雷乎？殆非能也。试观德国，俾士麦去矣，能步其武者，今宰相秘罗乎？抑阿肯罗乎？抑亚那特乎？殆非能也。试观俄国，峨查伋去矣，能与比肩者，谟拉比埃乎？谟拉士德乎？殆非能也。然则今日欧洲之政界，殆冷冷清清地，求如数十年前之大英雄者，渺不可睹。而各国之外交愈敏活，兵制愈整结，财政愈充溢，国势愈进步，则何以故？

吾敢下一转语曰：英雄者，不祥之物也。人群未开化之时代则有之，文明愈开，则英雄将绝迹于天壤。故愈在上古，则英雄愈不世出，而愈见重于时。上古之人之视英雄，如天如神，崇之拜之，以为终非人类之所能及

（中国此风亦不少，如关羽、岳飞之类皆是）

。若此者，谓之英雄专制时代，即世界者，英雄所专有物而已。降及近世，此风稍熄。英雄固亦犹人，人能知之，虽然，常秀出于万人之上，凤毛麟角，为世所珍。夫其所以见珍者，亦岂有侥幸耶？万人愚而一人智，万人不肖而一人贤，夫安得不珍之？后世读史者，啧啧于一英雄之丰功伟烈，殊才奇识，而不知其沉埋于蚩蚩蠕蠕、浑浊黑暗之世界者，不知几何人也。

二十世纪以后将无英雄。何以故？人人皆英雄故。英雄云者，常人所以奉于非常人之徽号也。畴昔所谓非常者，今则常人皆能之，于是乎彼此皆英雄，彼此互消，而英雄之名词，遂可以不出现。夫今之常人，所以能为昔之非常人；而昔之非常人，只能为今之常人者何也？其一由于教育之普及。昔者教法不整，其所教者不足以尽高才人脑筋之用，故往往逸去，奔轶绝尘；今则诸学大备，智慧日平等，平等之英雄多，而独秀之英雄自少。其二由于分业之精繁。昔者一人而兼任数事，兼治数学，中才之人力有不及，不得不让能者以独步焉；今则无论艺术，无论学问，无论政治，皆分劳赴功，其分之日细，则专之者自各出其长，而兼之者自有所不逮，而古来全知全能之英雄，自不可复见。

若是乎，世界之无英雄，实世界进步之征验也。一切众生皆成佛，则无所谓佛；一切常人皆为英雄，则无所谓英雄。古之天下所以一治一乱如循环者何也？恃英雄也。其人存则其政举，其人亡则其政息，即世界藉英雄而始成立之说也。故必到人民

不倚赖英雄之境界，然后为真文明，然后以之立国而国可立，以之平天下而天下可平。

虽然，此在欧美则然耳。若今日之中国，则其思想发达、文物开化之度，不过与四百年前之欧洲相等；不有非常人起，横大刀阔斧，以辟榛莽而开新天地，吾恐其终古如长夜也。英雄乎，英雄乎，吾夙昔梦之！吾顶礼祝之！

干涉与放任

古今言治术者不外两大主义：一曰干涉，二曰放任。干涉主义者，谓当集权于中央，凡百皆以政府之力监督之、助长之，其所重者在秩序。放任主义者，谓当散权于个人，凡百皆听民间自择焉、自治焉、自进焉，其所重者在自由。此两派之学者，各是其所是，非其所非，皆有颠扑不破之学理，以自神明其说。泰西数千年历史，实不过此两主义之迭为胜负而已。于政治界有然，于生计界亦有然。大抵中世史纯为干涉主义之时代，十六七世纪为放任主义与干涉主义竞争时代，十八世纪及十九世纪之上半，为放任主义全胜时代，十九世纪之下半为干涉主义与放任主义竞争时代，二十世纪又将为干涉主义全胜时代。

请言政治界。中世史之时，无所谓政治上之自由也。及南欧市府勃兴，独立自治之风略起。尔后霍布士、陆克诸哲渐倡民约之论，然霍氏犹主张君权。及卢梭兴，而所以掊击干涉主义者，不遗余力，全世界靡然应之，演成十九世纪之局。近儒如约翰·穆勒，如斯宾塞，犹以干涉主义为进化之敌焉。而伯伦知理之国家全权论，亦起于放任主义极盛之际，不数十年已有取而代之之势。畴昔谓国家恃人民而存立，宁牺牲凡百之利益以为人民者，今则谓人民恃国家而存立，宁牺牲凡百之利益以为国家矣。自今以往，帝国主义益大行，有断然也。帝国主义者，干涉主义之别名也。

请言生计界。十六七世纪，重商学派盛行，所谓哥巴政略者，披靡全欧，各国相率仿效之。此为干涉主义之极点。及十八世纪重农学派兴，其立论根据地，与卢梭等天赋人权说同出一源。斯密·亚当出，更取自由政策，发挥而光大之。此后有门治斯达派者，益为放任论之本营矣。而自由竞争之趋势，乃至兼并盛行，富者益富，贫者益贫。于是近世所谓社会主义者出而代之。社会主义者，其外形若纯主放任，其内质则实主干涉者也。将合人群使如一机器然，有总机以纽结而旋掣之，而于不平等中求平等。社会主义，其必将磅礴于二十世纪也明矣。故曰二十世纪为干涉主义全胜时代也。

然则此两主义者，果孰是而孰非耶？孰优而孰劣耶？曰：皆是也。各随其地，各随其时，而异其用。用之而适于其时与其地者则为优，反是则为劣。曰：今日之中国，于此两主义者，当何择乎？曰：今日中国之弊，在宜干涉者而放任，宜放任者而干涉。窃计治今日之中国，其当操干涉主义者十之七，当操放任主义者十之三。至其部分条理，则非片言所能尽也。

不婚之伟人

《老子》曰：“人不婚宦，情欲失半。”此其言殆有至理焉。顷读某报，列举近世不婚之伟人，如史学家之吉朋、谦谟、柏格儿，哲学家之笛卡儿、巴士卡尔、斯宾挪莎、康德、霍布士、陆克、卢梭、边沁、斯宾塞，科学家之奈端、斯密·亚丹，

（此外尚多，不能枚举，举其最知名者耳）

。文豪索士比亚、摆伦，皆有妻，而极言有妻之害，谓天才与妻不能两立者也。而近世大政治家，若格兰斯顿，若俾士麦，若的士黎里，则自谓生平之成功，得于贤内助者居多云。两者孰为正理？吾以为欲以不婚率天下，非可行也。而早婚与多婚二者之陋俗不除，则国民之聪明才力，消沮于是者不知几许，有志改良群治者，其勿以为一私人之事而忽之。

嗜报之国民

今世文明国国民，皆嗜读报纸如食色然，而发达最速者，莫如美国。美国当五十年

（1902年）

有报一万一千二百二十六种，读报者一千五百十万人。五十年前，全国报馆印出报纸总数四万万零二千六百四十万部，今年增至八十一万万零六千八百五十万部；今年统计全国报馆平均支出费用，美银一万万零九千二百四十四万元，内主笔、访事及司理人等，共二万七千五百余名，支出薪俸美银二千七百万，职工共九万四千人，支出薪俸美银五千万元。其余机器、纸料、杂费等，支出美银五千万元。全国报馆平均收入金，美银二万万零二千三百万元，收支相消，实每年赢余总额美银三千万元。据美国最近人口统计，凡七千六百五十余万人，以此比例，是六人中必有一人读报者也。中国民数五倍美国，以此比例，应有读报人八千万有奇，每年印出报纸总数，当在四百五十三万万零四千万有奇。呜呼！吾中国何日始能有此盛况乎？不禁慨叹。然美国五十年中，增率二十倍有奇，安知中国五十年后，其盛大不有更惊人耳目者乎？是在造时势之英雄焉矣！

以今日金值计之，美银一元，当中国口岸通用银二元，是美国全国报馆每年总支出数，将近四万万元，其总收入数，将近四万万零五千万。视今日中国国帑出入总数，且三倍矣。呜呼！人之度量相越乃至如是耶。

奴隶学

偶读《颜氏家训》有云：“齐朝一士夫，尝谓吾曰：‘我有一儿，年已十七，颇晓书疏。教其鲜卑语，及弹琵琶，稍欲通解，以此伏事公卿，无不宠爱。’吾时俯而不答。”呜呼！今之学英语、法语者，其得毋鲜卑语之类耶？今之学普通学、专门学者，其得毋弹琵琶之类耶？吾欲操此业者一自省焉，毋为颜之推所笑。

希望与失望

希望者，灵魂之粮也，而希望常与失望相乘，失望者，希望之魔也。

今日我国民全陷落于失望时代。希望政府，政府失望；希望疆吏，疆吏失望；希望民党，民党失望；希望渐进，渐进失望；希望暴动，暴动失望；希望自力，自力失望；希望他力，他力失望。忧国之士，溢其热血，绞其脑浆，于彼乎，于此乎，皇皇求索者有年，而无一路之可通，而心血为之倒行，而脑筋为之瞽乱。今日青年界中多少连犴俶诡之现象，其起因殆皆在失望。

失望之恶果有二：其希望而不甚诚者，及其失望也，则退转；其希望而甚诚者，及其失望也，则发狂。今之志士，由前之说者十而七，由后之说者十而三。

国民之自杀

发狂之极，其结果乃至于自杀。自杀之种类不一，而要之皆以生命殉希望者也。故凡能自杀者，必至诚之人也。

一私人有自杀，一国民亦有自杀。何谓国民之自杀？明知其道之足以亡国，而必欲由之，是也。夫人苟非有爱国心，则胡不饱食而嬉焉，而何必日以国事与我脑相萦？故凡自杀之国民，必其爱国之度，达于极点者也。既爱之则曷为杀之？彼私人之自杀者，固未有不爱其身者。惟所爱之目的不得达，故发愤而殉之。痛哉自杀！苦哉自杀！

一私人之自杀，于道德上、法律上皆谓之有罪；私人且然，况乃一国。死者不可复生，断者不可复续。呜呼！我国民其毋自杀！

不自由毋宁死，固也。虽然，当以死易自由，不当以死谢自由。自杀者，志行薄弱之表征也。呜呼！我强毅之国民，其毋自杀！

有无意识之自杀，有有意识之自杀。今举国行尸走肉辈，皆冥冥中日操刃以杀吾国者也，故惟恃彼辈以外之人，庶几拯之。浸假别出一途以实行自杀主义，是我与彼辈同罪也。呜呼！我有意识之国民，其毋自杀！

成败

吾于五年前始为《自由书》，而以“成败章”托始焉。今吾将复论成败。

天下无必成之事，而有必败之事。治事者量其事之必成而后为之，则终无一事之可治也；若量其事之必败而故为之，则治事亦更何取也？孔子曰：“必也临事而惧，好谋而成。”呜呼！阅历稍久之后，其必有感于斯言矣。吾昔持无成无败之理想，以谓造一因必有一果，而其结果之迟速远近，非浅见者所得论定。由今思之，吾为一事而诚能造出一因以冀百数十年以后若数千万里以外之结果者，则固谓之成，不谓之败焉矣。而天下事固有糜多少之日力，绞多少之脑浆，及其一败涂地，乃如烟消云散，渺然无复微痕薄迹之可寻。问于将来世界有丝毫影响乎？共事一二人，和血吞而已，而他更何有也？伤哉失败！

且持虽败不败之理想者，少年初入世、初任事之人，类多能之。虽然，此不过客气耳。失败者最易堕人志气也。一败再败之后，而最初一往无前之概，已萎丧而无复存。吾见此者数矣。非其人之中变，而根器实有所不任也。上等根器，固非磨涅之所能惧；其余芸芸众生，具中等以下之根器者，十而七八也。呜呼！此其所以往而不返也欤！

问者曰：子为此言，其阻人办事之心，不亦甚乎？答之曰：不然。办事者有成有败者也，而不办事则全败者也。知成败之义者，其必知所择矣。惟当其办事也，虽不能要以必成，而必尽其智力所及以期于可成；虽不能保其不败，而必谋定后动而毋或立于必败。此岂徒为达救世之目的而已，抑亦自养其气勿使夭绝之一法门也。曾文正曰：“多条理而少大言。”又曰：“扎硬寨，打死仗。”善哉善哉！吾师夫，吾师夫。虽然，天下岂有终身不经失败之人哉！粤谚有之：“做过不如错过，错过不如错得多。”失败者，实天惠之学校也，能受此天惠与否，则亦视其人也已矣。

加藤博士《天则百话》

日本文学博士加藤弘之，德国学派之泰斗也。专主进化论，以爱己心为道德法律之标准，其言固多偏激有流弊，然持之有故，言之成理。故其影响及于日本学界者甚大焉。余夙爱读其书，故不欲介绍其学术于中国，盖虑所益不足偿所损也。虽然，今日学术思想勃兴之时代，终非可以人力阻止某种学派，不使输入我国，苟强阻止之，是又与顽固之甚者也。况能成一家之言者，必自有其根柢条理。苟其能理会其全体，而不藉口其一端，则不论何学派而皆有裨于群治。且天下之方术多矣，择而从焉，淘而弃焉，岂不在我？故今取其《天则百话》，谨译以谗同学焉。虽东鳞西爪，而博士学术之大概，亦在是矣。

实学空理之辨。（原话一）

论者或以直接有效用于实业之学科，谓之实学，反此者谓之空理空论。如机器制造、矿学、电学工程等应用科学，最有益于实业者，谓之实学。其他物理学、化学者，虽纯正科学，然以其为应用学之根柢，故亦谓之实学。至如哲学、心理学、群学等专主理论，不依物质者，则动谓为空理空论，此实谬见也。学科之虚实真伪，不在其所研究之客体，而在其能研究之主体

（按：主、客、能、所等字乃佛典通用语，日人亦常用之。此处原文不如此，特因其措词复杂，故以此二语译意代之）。

若哲学、心学、群学者，并所研究之客体，而亦非空也。虽然，此等无形之学科，其发明真理，固自不易，以故前此之治此业者，其所持论，自往往类于空漠无朕，然其中含真理者，亦已不鲜矣。况在今日思想勃兴，治此等学科者，必非空构揣测而自满足，往往依严格的科学法式，以求其是。然则论者之妄生分别，其陋亦甚矣，群治开化，决非徒恃有形之物质也。而更赖无形之精神，无形有形，相需为用，而始得完全圆满之真文明，征诸今日之欧洲，有彰明较著者矣。

自由研究。（原话十三）

人群一切之事物，与天然界一切之事物，同皆缘物竞天择、优胜劣败之作用，逐渐进化。虽学问、宗教，亦循此天则而不可逃避者也。故无论言学言教，皆宜一听研究者之自由，毫无他界以为之束缚，然后教学乃可以发达。释迦脱婆罗门之束缚而兴佛教，耶稣脱犹太教之束缚而兴景教，欧洲近世诸硕学，脱景教之束缚而兴新学问，皆其明效大验矣。惟其研究之自由也，故能排其旧者以兴其新者。一兴一废之间，皆天演学所谓自然淘汰之作用也，苟无此作用，则学问、宗教终不得作用进步。

乃或既用自由研究之力，排他人以自立矣。及其既立之后，又怙自己之势力，转以

妨害他人之自由，是所不可解也。若耶稣教徒是也。耶氏之所以能立新政，岂不赖此自由力乎哉？迨势既成，又用世俗的权力，以侵来者之自由，何其不思也。虽然，耶教之迂腐虚妄，固终不可抵抗新学问，至于今日势力渐坠，固已不得不竖降幡新学界之辕门矣。夫彼迷信宗教之徒，固执法诚，惟其教祖之忠仆，犹可言也。若乃教门以外之人，犹或设种种口实，以压制思想自由，识见之陋劣，实可惊矣。如伦理道德一科，盖最受其毒者也。俗论者流，动谓古昔相传之伦理道德，必非容后人之拟议其得失，雌黄其是非者也。苟其有此，则害名教也，坏风俗也，设此等种种虚漠之口实，而曾不能依学理以相辨难。呜呼！持论不依于学理，而欲学问之进步，亦难矣。

我辈九百九十年前之祖宗。（原话十四）

人莫不有父母，是曰双亲。父亦有其父母，母亦有其父母，是为吾之祖父母者，其数四人。祖父亦有其父母，祖母亦有其父母，是为吾之曾祖父母者，其数八人，曾祖父母亦各有其父母，是为吾之高祖父母者，其数十六人。如是递推之，而三十二人，六十四人，百二十八人，祖先之数，逐渐加增，至不可思议。今试以三十年为一代计之，积三十三代，九百九十年，则其祖宗祖之多，有令人失惊者。其表如下：

父母二，祖父母四，曾祖父母八，高祖父母十六，第五祖三十二，第六祖六十四，第七祖一百二十八，第八祖二百五十六，第九祖五百十二，第十祖千零二十四。

以上凡三百年。

第十一祖二千零四十八，第十二祖四千零九十六，第十三祖八千一百九十二，第十四祖一万六千三百八十四，第十五祖三万二千七百六十八，第十六祖六万五千五百三十六，第十七祖十三万一千零七十二，第十八祖二十六万二千一百四十四，第十九祖五十二万四千二百八十八，第二十祖一百零四万八千五百七十六。

以上凡六百年。

第二十一祖二百零九万七千五百十二，第二十二祖四百十九万四千三百零四，第二十三祖八百三十八万八千六百零八，第二十四祖一千六百七十七万七千二百十六，第二十五祖三千三百五十五万四千四百三十二，第二十六祖六千七百一十万八千八百六十四，第二十七祖一亿三千四百二十一万七千七百廿八，第二十八祖二亿六千八百四十三万五千四百五十六，第二十九祖五亿三千六百八十七万零九百一十二，第三十祖十亿七千三百七十四万一千八百二十四。

以上凡九百年。

第三十一祖廿一亿四千七百四十八万三千六百四十八，第三十二祖四十二亿九千四百九十六万七千二百九十六，第三十三祖八十五亿八千五百九十三万四千五百九十二。

以上九百九十年。

然则十代三百年间祖先之数，应有千零二十四人，二十代六百年间，应有一百零四万八千五百七十六人，三十代九百年间，应有十万万零七千三百七十四万一千八百二十四人，再加三代，共三十三代，九百九十年间，应有八十五万万八千八百九十三万四千五百九十二人。表而出之，实有令人可惊可笑者。虽然，此就亲族血统不相婚

嫁者言之

耳。然古来亲族间

婚嫁，实繁有徒，故其实数，并不若

是其夥也（按：此条无关实学，不过以其有趣，译之资谈助耳）。

利己心之三种。（原话九十四）

自昔学者皆谓人类有利人利己两心，同立并存，吾以为为此说者，皆由其眼光局促，未能及于人类以外者也。自昔学者皆以人为一种特别之生物，本为万物之灵，故其研究种种性质，眼界全限于人类范围之内，而不能及于其外。至于今日进化之学理大明，人类由动物进变之说，既已若铁案之不可动，故研究人类身心之现象，皆不可不并下等动物而研究之，此近世学者所同认矣。故吾今日论利己、利人两心，亦不得不推本于是。

试观下等动物之心性，则惟见其有利己心耳，无更所谓利他心者存。舍己之欲，以为他谋，概乎未有闻也。其渐进步而为高等动物，稍带群性，则于自利之外，亦微有利他之意，但不能真为他谋也，不过不妄害他而已。盖既相聚以为生存，则专谋自己之利者，终不可保自己之安全，故不利他而亦不敢妄害他，此既利他心之发端也。

进化以至人类，则无论若何野蛮种族，其合群之性，综比诸高等动物，愈加确固，故利他之行为，亦随而进步，及至大文明大开化之社会，而利他心亦更盛大矣。此实天演大圈转移变化之情状也。夫论一人身心之现象，不可不征其遗传于父母，然则论人群身心之现象，亦不可不征其遗传于远祖之动物明矣。而自昔学者，未尝能依此例以为论据焉，此所以误认后起之利他心，以为固与利己心并存而俱来也。

由是言之，则利他心，不过为利己心之一变体明矣。吾今得区利己心为三种类。

第一“无限纯全之利己心”，第二“有限纯全之利己心”，第三“变形之利己心”。所谓无限纯全之利己心者，即下等动物之利己心，惟尽己力所及，以谋自利，毫不顾其他者也。所谓有限纯全之利己心者，即稍带群性之高等动物，虽谋自利而稍有限制，不妄害其他者也。所谓变形之利己心者，即寻常人所称为利他心者也。此种利己心，高等动物虽稍有之，然至人类界而始进步。盖其目的本非为他人计，但欲自谋真实之利（或利于身，或利于心），则非先谋他人之利不可。其利他也，不过其一利己之手段也，故谓之变形之利己心。

此三种之利己心，自有高下之别，显而易见者也。即第一种行于普通动物界，第二种行于高等动物界，第三种行于人类界也。虽然，人类者，又兼此三种而有之也。大抵第二种其最通行，人人同俱者也；至于第一、第三两种，则因各人特别之性质而有所偏，而偏于第一种者甚多。

第三种之利己心（即利他心）

，其别亦有二：一曰唯物的，二曰唯心的。谋他人之利，而我因得物质上实益之报偿，所谓唯物的也。谋他人之利，而我之本心因以愉快焉，顺适焉，所谓唯心的也。此二者，其利害竟归于我，故名为利他心，而实则为利己心，无可疑矣。凡人于其所亲爱之人，视之每如与己之同体，若父子、兄弟、夫妇、朋友之间，往往形异体同，几无复彼我之别。故相互视其幸福，而忧其灾害，以寻常论之，此可谓利他心，全非由利己心而出者也。虽然，实乃不然，彼以其一体同情之故，见彼之幸福，而我已不胜愉快，见彼之灾害，而我已不堪其痛苦。此其中殆有莫之为而为，莫之致而至者焉，故其利他也，毕竟自为心上之利益谋也。然此等心在本人，亦并不见其利己计也者。故以意识论，可谓之利他，以本源论，实仍为利己也。夫利益之高等者，不在躯壳之乐而在心魂之乐，故此种心，实利己心中之最高尚、最优美者也。

（译者按：唯物的利己心，本文未有明说。博士别有所著《道德法律进化之理》一书，言之最详，他日当择译之。参观《边沁学说》之按语亦见其概）

宗教家言，道德家言，常教人以利他之为务。此乃利用吾人心性上之快乐，以使人勉为善人，为君子，为孝子，为名妇者也。吾人但从其教，则可以得此美名，而吾心亦以大快，此实普度众生之妙法门也。而溯其本源，乃不出于利己心之外，苟无利己之心，则虽圣贤，亦无从施其教也。然则利他心，亦非能离利己心而自发生也明矣。虽然，此种高尚之利己心，自吾人之意识自观之，则已为利他而非利己也。故此种意识渐遗传于子孙，而日以发达，久而久之，则若与生俱来者然。学者所以误认利他心为离利己心而能独立者，皆坐此焉耳。由此观之，则利己心必非可恶可贱者，若其第三种、第二种，实人类生存所不可缺之具也。唯第一种之利己心，则害群莫大焉。苟仅有此一而无彼二者，是则非人而禽兽也。

【译者按】此加藤博士学说之要点也。其他种著述发明此义，动累万言，反复详尽

，盛水不漏。日人推尊之者，以为发泰西学者未发之蕴，其反对之者，则以为正义之公敌，人道之蠹贼。盖日本学界诸先辈中，其受毁誉最剧烈者，未有若加藤氏甚者也。平心论之，则所谓爱他心者，乃人群所以成立之大原，日培植而滋长之，犹惧其不殖，而何必抹而杀之，使并为利己心之附庸。倡此说者，是不啻恐人类之不知自私自利，而复教猱升木也。故此等学理，最不宜行于今日之中国。虽然，加藤氏之意，则亦有在焉。彼见夫今日之人类，其于利他之事业，终不能安而行之也。故与其逆而节焉，不如顺而道焉。大发明欲利己不可不先利他之义，以为卿等所谓利，非真利也。苟其真欲自利，则请求之于自利之外，此加藤氏所以虽蒙一国之非难，而卒坚持其说，不少变也

（
吾于
日本各报
中，见他人攻难加
藤，及加藤答客难之论文，已不下百
数十通）

。夫人苟能将其“唯心的变形爱己心”，扩充而光大之，则始焉视一家所亲为一体者，浸假而视一乡为一体矣，浸假而视一国为一体焉可矣，浸假而视天下为一体焉可矣，浸假

而视一切众生为一体焉

可矣。此特视其以太之感觉力何如耳

（此其义浏阳《仁学》发之最透）

？夫既视一乡、一国、天下众生皆为一体，将见其苦，则吾无端而忽生大苦；见其乐，则吾无端而忽生大乐。《易》所谓“吉凶与民同患”，《维摩经》所谓“众生病，是故我病”。审如是也，则吾不欲利己则已，苟欲利己，则吾不可不为一乡、一国、天下众生，思所以去其苦而生其乐，盖不如是，则吾将痛苦而无极也。审如是也，虽利己何病，加藤氏立论之本意，虽未必有得于是，然吾人读其书者，不可不作如是观也。大抵凡成一家之言者，其中必含有真理者存，苟善读之，无不可以为进德之助。孔子不云乎，“三人行，必有我师焉。”而何以加藤氏之言之为病也！若夫耳食其一二，而因以之自恣焉，抱持彼第一等禽兽利己心，而自托于加藤之徒，即加藤亦有不任受者矣。

记斯宾塞论日本宪法语

日本近出之杂志《太阳》有一文，题曰《故斯宾塞氏与日本宪法》者，博士金子坚太郎所撰，自述其十五年前斯氏对话之语。斯氏曾与彼约，谓当生前不许宣布，故金子氏之笔记，藏之篋中者十五年，今斯氏既逝，乃发表云。此亦有一读之价值也。

金子氏记初见斯氏时，以伊藤博文所撰《日本宪法义解》赠彼，乞其批评。

斯氏未读其书，先发问曰：“余有所最疑者一事，宪法之为物，始自英国，美国继之，其后各国又继之，大率皆由国民要求逼迫，或购之以血，而始得制定。独日本者，建国以来，一系相承，为专制独裁之国体，民乐其化，未闻有要挟强逼之事。今乃平地涌现，生出此宪法，其故何由？”金子氏乃详告以日本建国以来之历史，更及明治维新以后之事，若何而废积年沿习之封建制，若何而采舆论为改制之方针，以定开国之国是，若何而于太政官之下置三职八局，若何而设待诏院诸机关，若何而置元老院、大审院以画行政、司法之范围，若何而开地方官会议以启自治之端绪。如是者既二十年，而乃有宪法之成立，决非突然而生者云云。斯氏乃曰：“得之矣，得之矣。吾向以此问题质诸贵国多人，莫能答也。今闻吾子言，吾知其与进化公例不谬矣。”越数日，斯氏读《宪法义解》卒业，乃函招金子氏于其家，有所语，其言如下：

余以为一国之宪法及其附属法律，必须与本国之历史及国体有同一之精神、同一之性质。苟不尔者，则当其宪法法律实施之时，其困难必不可思议，终不能达立宪之目的而已。余怀此意见既久，故曩者曾与驻英之日本公使森有礼氏有所语，谓日本若欲制定宪法，必当采渐进保守主义，以本国之历史习惯为基础，而旁采欧美各国之所长，使日本遗传之政体与欧美立宪主义相调和，此其最要也。若破坏旧体，而创设新制，则殊非我之所望。何则？以物质界论之，凡赍外国之草木以移殖于本国者，势不能与外国结同一之花实，此植物学之原理也。惟宪法亦然，欧美诸国之宪法，各各因其国体历史及习惯而成立，决非取他国之法文，翻译之而执行之也。余当时所以语森氏者若此。今见足下所示之日本宪法，读其注解，如一本于日本古来之历史习惯，以渐进保守主义为宗。此余之所最赞成也。顾吾更有一言，欲为日本政府告者，则将来实行此宪法，比于制定宪法时，尤为困难，此不可不深察也。定宪法者，不过以少数人士之精勤而可以成就，若实行宪法，则国民全体之大事业，其难有什伯倍于其初者。试以美国之实例证明之，美国宪法之精神在人民平等，上下皆有同一之权利，乃行之数十年，而美之宪法政治，渐集于政党之掌握中，其政党亦多由政治家之利己主义，良民不胜其苦。质而言之，美国人于宪法之空文上，得有平等之权利，其在事实上，乃不得享之也。

以政治学之原理论之，政府之事业当渐次轻减，使人民各以个人自营之，故政府最

终之目的，则放任主义也。此论为余生平所最主张，君之所知也。虽然，以今日社会之实际，未足语于是。放任主义者，不过立乎今日以指将来，谓具足圆满之世界当如是耳。故论政府权力范围之广狭，必使国民人人皆养成自立自动之精神，无需政府之诱导，而自能各守其义务，又无须政府之禁遏，而自能不侵他人之权利，不害社会之安宁。夫如是，则政府之事业，可以缩至极狭隘之区域，于是乎政治学之原理，乃可实行。诚以埃及金字塔譬之，则未开化国之政府，犹塔之初阶也，余所主张放任主义之政府，犹塔之绝顶也。政治之进路，由初阶渐次以达绝顶，其进步程度，一依其国民智、德、力之程度以为定，欲不经初级、二级、三级之顺序，一跃而达于绝顶，势固不可得达，即达矣亦随而蹶耳。故吾所望于贵国政府者，依此学理而熟察日本国现时之地位，在金字塔之第几级，据现在所立之地而渐升焉。苟欲为躐等之进步，不特于宪法之实行诸多窒碍，而其不利于国家及国民者，更远且大也。（下略）

【按】斯氏所论，可谓博深切明。昔天演学者通用语，皆曰物竞天择，优胜劣败。而斯氏则好用“适者生存”一语，诚以天下事无所为优，无所为劣，其不适于我也，虽优亦劣，其适于我也，虽劣亦优。夏之裘，冬之葛，美非不美，而服之皆足以生病，则不适之为害也。不解此义，而以之掌持议论国家事，其危亦甚矣。斯氏所忠告于日本政府者，曰自审其国民地位在第几级，吾以为凡自爱其国者，皆不可不三复斯言矣。斯氏又断断然以本国之历史习惯为言，毋亦以进化之公例，从无突然发生之物，皆循其遗传而递变焉。经若干年，而其状态乃大异耶。然则吾国民之所以爱吾国者，其亦有道矣，苟不审吾之历史若何，习惯若何，而曰是物者，现时各国行之而最优者也，吾攫而取之。夫如是，则吾亦可以自侧于优胜之林。岂知一切事物，固有在彼为优，而在我反为劣者耶？乃知不健全之理想，非徒无益，而又害之，吾愿我政论家平心静气以一听前贤之遗训也。

中国之社会主义

社会主义者，近百年来世界之特产物也。櫟括其最要之义，不过曰土地归公，资本归公，专以劳力为百物价值之源泉。

麦喀士曰：“现今之经济社会，实少数人掠夺多数人之土地而组成之者也。”拉士梭尔曰：“凡田主与资本家皆窃也，盗也。”此等言论颇耸听闻。

虽然，吾中国固夙有之。王莽始建国元年下令曰：“汉氏减轻田租，三十而税一，而豪民侵凌，分田劫假，厥名三十税一，实十税五也。父子夫妇终年耕耘，所得不足以自存，故富者犬马余菽粟，骄而为邪，贫者不厌糟糠，穷而为奸。”所谓“分田劫假”者，注云：“分田，谓贫者无田，取富人之田耕种，共分其所收。假者，如贫人赁富人之田也。劫者，富人劫夺其税，欺凌之也。”此即以田主资本家为劫盗之义也。

又宋苏洵曰：“自井田废，田非耕者之所有，而有田者不耕也。耕者之田，资于富民。富民之家，地大业广，阡陌连接，募召浮客，分耕其中，鞭笞驱役，视以奴仆，安坐四顾指麾于其间。而役属之民，夏耨秋获，无有一人违其节度以嬉。而田之所入，已得其半，耕者得其半。有田者一人，而耕者十人，是以田主日累其半以至于富强，耕者日食其半以至于穷饿而无告。”此等言论，与1866年万国劳力党同盟之宣言书，何其口吻之逼肖耶！

中国古代井田制度，正与近世之社会主义同一立脚点，近人多能言之矣，此不缕缕。

记日本一政党领袖之言

某日某与吾友某某，会日本某政党领袖某君于某所，叩以政党初立时之情形，所言有深足令我辈感动者，归而记之。

某君曰：我日本之有政党，本起于维新时代。萨、长、土、肥四藩及东北人士咸有功于王室，而萨、长二藩凭藉尤厚，遂据要津，行藩阀专制政治。盖武门秉政，实我日本八百年来历史之遗传性，旦夕未能骤革也。于是土佐及东北人士咸怀不平，思起而抗之。此政党所由起也。

某君曰：时则福泽谕吉先生，其德性最与平民主义相近，虽一度受幕府命，游历欧美。及归，则不复宦游，而惟设一庆应义塾于三田，专鼓吹英国学风，国中不平之民，咸就学焉。庆应义塾者，实政党之制造场也。

某君曰：政党与藩阀战，已卅余年，至今未休，而初期之战尤烈。当时藩阀握政府之全权，政党无丝毫势力，无一寸立足之地，而政府之所以对我者，其严辣之手段，至今言之犹有余痛也。政府之侦探，至密且严，凡民党中有力之人，一举一动，一言一话，皆纤悉侦之，而一一报告于当道，若起居注焉。数人密室之会谈，被侦得者十而七八也。茶亭饭店，无所容议论之地，无论矣。乃至私宅赁舟，一无所逃。尝有政府所派侦探，自匿于某家叠敷

（日本席地坐其室中之席名曰叠）之下，七日夜，持辨当

（日本有以小

薄木匣盛冷饭宿馔以备旅行

，及工人用者，名曰辨当）

以充饥，探听隐事，洪纤不遗者。我辈又尝荡舟中流，密议大计，自谓天神之外，莫余觉也。乃壮语方酣，忽有突起水中而捕缚余者，则政府警吏，鳧以相随，其伏我舷侧，诃我于水中者，盖已半日也。其他手段，大率类是。

某君曰：某尝与党员某某至横滨，同购炸药，已购得，归而密度之待用，乃笑相语曰：“警吏手段，精矣密矣，而犹未也。使我辈为政府，必将置一摄影器于贩卖炸药者之室，使往购者无术以逃其影，则我辈今日，不已殆乎。”方睥睨自鸣得意，乃翌日而政府逮捕之命下。引至法庭，法吏笑语曰：“吾侪不如公等能为摄影器，顾吾之摄声器，亦足以代耶。”其他手段，大率类是。

某君曰：当时政府及民党，皆各务蓄养壮士，狭路相逢，动辄决斗。故吾侪出入，必以剑自随。

某君曰：政府务绝我辈经济之来源，欲使我坐困。凡我辈或以团体之资格，或以私人之资格，欲营一实业者，政府必多方以破坏之，使不能自存。不宁惟是。凡地方

实业家稍与我辈往来，形迹嫌疑者，政府亦必以对付吾党之手段对付之，故有力者避我辈惟恐不远，惧其浼己也。我辈亦不欲累人，茹荼嚼雪，期以自力贯彻之而已。内之既须蓄养壮士，外之复为运动之费，而全党皆若涸辙之鲋焉，其苦况岂复能以言语形容者。勿论他人，即如鄙人者，当时同志寄居舍下以十数，往往欲寄一信，而主客十余人欲共凑两钱购一邮政票而不可得，一人出门，则其他不得不居守。何也？主客十余人，而帽惟一、带惟一、裙惟一、履惟一也。明治二十三年国会开，鄙人被举于议员，而出席时所被之一礼服，犹十余人共醖之也。

某君曰：政府之阳恶，既若是矣，其阴谋之可畏，则更甚焉。吾党既在直接间接压制之下，无以谋生，逼于饥寒，政府矐其至窘之顷，则阴遣人贷以金钱，订期偿还，及期而拶逼之，不稍假借，矐其益窘也。又阴遣人别贷之，及期拶逼又如之，而其目的要在有所诱胁以迫之使改节，或初贷时诱胁焉，或再贷三贷时诱胁焉。虽有铁汉，不堕其彀者鲜矣。呜呼！此吾党最吃亏之一端也。

某君曰：计当时政府专为对付民党，其警察、侦探、壮士乃至种种阴谋所费，盖岁六百万金云。浪掷国民膏血，其罪犹小，而其摧坏国民志气，堕落国民名节，至使今日政党中犹带腐败之气。其影响及于全国民之道德，则吾至今言之犹有余痛也。

某君曰：今者吾党之对于藩阀政府，以三十年血战之结果，虽未可云已获全胜，顾吾党之目的，其已达者则什八九矣。终局之全胜，在我不在彼，又国人所同信也。

某君语竟，某乃退而与吾友相语曰：呜呼！我国民党志节之委靡，能力之脆薄，有以夫，有以夫！《孟子》曰：“其操心也危，其虑患也深。”故达今之志士，燕居谈笑而道革命，酒食征逐而言破坏，无惑乎其心不细，机不警，志不卓，行不坚，运动不进而条理不立也。以若斯脆弱之政府，吾党犹不能动其毫发，吾党尚何颜以语国事耶？使吾党处于日本政党初立时之地位，将若何也？虽然，能力以相搏而后炼成，使吾党处于日本政党初立时之地位，则吾党之能力，或将有进乎？吾未能决之。

记越南亡人之言

年月日，主人兀坐丈室，正读日本有贺长雄氏之《满洲委任统治论》，忽有以中国式名刺来谒者，曰□□□，且以一书自我介绍，其发端自述云：“吾齐亡人，南海遗族，日与豺狼鹰鹵为命，每磨眼望天，拔剑斫地，辄郁郁格格不欲生。噫！吾且死矣，吾不知有生人之趣矣。”次乃述其愿见之诚，曰：“吾必一见此人而后死，吾必一见此人而后死无憾。”且为言曰：“落地一声哭，即已相知，读书十年眼，遂成通家。”援此义以自信其无因至前之不为唐突也，得刺及书，遽肃入，则一从者俱。从者盖间关于两粤二十年，粗解粤语者也。客容憔悴，而中含俊伟之态，望而知为异人也。相将笔谈数刻，以座客杂，不能尽其辞。盖门弟子辈见有异客，咸欲一睹其言论丰采，侍左右者以十数也。更订密会后期行。越二日，复见于所约地，盖横滨山椒临太平洋之一小酒楼也，海天空阔，风日丽美，自由春气充溢室内外，而恶知其中乃有眼泪洗面之人在。坐定，叩客行程，客曰：自越之亡，法政府严海禁，私越境者罪且死，减等亦锢诸昆仑

（按：昆仑，越之南岸一小岛也，名见《瀛涯胜览》）

。乃若仆者，为敌忌滋甚，欲乞一通涉国内之关津券，且不可得，遑论出境。仆之行，改华服，冒华籍，伪为旅越华商之佣仆者，仅乃得脱耳。然一人逃亡，五族絜夷，仆盖茹痛饮恨，奉母以终其天年。母之既亡，乃遣妻寄子于僻陋氓隶，乃今始得自效于外。余曰：伤哉君也！客曰：岂惟鄙人，国中贵族长老，惨厄且倍蓰。乃解贴怀小革囊，出一物相视，视之则其畿外侯乞给通行券之文也。文曰：

东宫□□□□□皇太子□□□□□侯□□稟为乞文批事缘：卑窃闻贵国有□□□□
□□□□□□□□□□□□□□□□□□等因卑窃揆，卑系初生，未识□□□□
□如何事体。兹卑乞带随家人二名，一往恭瞻□□以委微情，并便反回□□□□□
□收拾□□□骸骨，□□埋葬，庶免漂流伏乞住。

京贵钦使大臣恤及文批许，卑便执通行以防别碍今肃。禀。成泰□□年□月□□日。

其纸用法政府印税纸，法总督署名签印焉。余读一过，泫然不知涕之承睫也。曰：伤哉伤哉！腰下宝玦青珊瑚，可怜王孙泣路隅。问之不肯道姓名，但道困苦乞为奴。亡国之贵胄，其现状乃如此哉。宋代之称侄称子，犹天上矣。时则客泪如堕糜，谈纸湿渍。

余曰：客哀止，愿毕其词。且吾闻越尚有君，今何如矣？客曰：乙酉之役，法人迁我君咸宜帝于南非洲之阿尔热城，禁绝南人，毋得通问讯，于兹二十年，生死谁卜？今君号曰成泰，昔之亲王，而法所拥立也。即位时才十龄，盖不利吾有长君，是以置此，岁受俸六千，木居士焉尔。赏自从九品以上，罚自杖十以上，皆关白法吏

，贅虱于其间，奚为也？余曰：余诚哀客，诚敬客。顾贵邑中志客之志者，几何人矣？抑相率奴隶于法人，保一时残喘以自适也。客曰：弟子沐甚风，栉甚雨，间关奔走国中，垂二十年，山陬海澨，所攀结殆遍。今矢天日，不敢为谏言以欺长者。簿计国人，可分五等：乔木世臣，衣被国恩，即数百祀，怀子房报韩之志，有三户亡秦之戚；此中膏粱纨绔，固其本性，然铮铮佼佼，盖非绝无一二巨室，为世所宗。乘云易尊，则亦有焉，其可谋者，二十得一。若乃羽林孤儿，丹穴孽子，在昔乙酉之难，勤王诏下，

薄海云涌，父安、河静、北宁、山西诸辖（按：越南省名也）

，飞蛾赴火，惊蜂恋巢，倡义最多，拒持最久，事后弥雍亦最烈。今虽穷蹙贴屈，而怨毒积心，公仇私仇，有触即发。此辈无丝毫势力，而猛鸷之气，遇死当坏，举国之中，十有二焉。次则生计路绝，哀鸿嗷嗷，不乐其生，求死无路，渴望胜广，有如云霓，绝无远谋，有呼斯应，其若此者，十人而五。上则承学之子，悲悯是与，东驰西越，餐血饮泪，宁与国俱死，不与敌同生，所感非恩，所愤非仇，惟以血诚立于天地，似此落落，固无几人；然受创日深，求伸日急，鸡鸣风雨，声闻于天，百人之中，亦一二焉。以上四派，其在国中，占十之八。此外为伧为狐，盖十一二，但齷齪猥琐，全无才智，彼宁忠于法，忠于衣食耳。一旦有事，亦法内蠹也。

余曰：哀哉，伟哉！客言信耶！果尔尔者，我国其犹惭诸，有人如此，国其能终亡。客曰：当国之未夷也，为之怅者，将谓有私利也，从而导之。其一则天主教徒，其一则通寄之辈也。宁知君俘社屋，鸟尽弓藏，法之视彼，与常奴等耳。前此未亡以前，所予以特别利益，剥夺靡孑遗，而西来教僧，益束缚鱼肉之，故景教之徒怨毒逾倍。十年以前，曾有私邀英舰，欲图泄忿，机露被逮，火戮者百数焉，皆教徒而昔之鹰犬也。若其佣于官署为舆台者，初则假以词色，以为功狗，猎弋所获，俾餽其余，及其将盈，则一举而攫之。彼辈直法虏之扑满耳，奴颜婢膝二十年，所赢者亦仅免冻馁，他于何有？彼辈即冥顽，今亦知悔矣，但噬脐而已。余闻而抚然有间，不复能置答，窃自默念曰：安得使我满洲山东人闻此言？安得使我举国人闻此言？

客曰：安南之国，面积二十六万三千英方里，与日本埒。全国人口，据法人所籍身税搜银丁簿云二十五兆，盖西贡十兆，东京、顺京及诸省共十五兆云，实则不止此数。盖搜银（按：此税则之名称，指口算也）

甚重，掩匿甚多，法人行政法，实非能密，惟西贡为大吏所驻，搜括逾密，所簿籍殆得实数。西贡以外，当尚三四十兆，全国则四五十兆近之。人数宁下于日本？有豪杰抚而用之，亦霸王之资矣。自兹以往，余与客诘难应对甚详，余有固守秘密之义务，不能宣也。惟中间客言法兵驻越者，实数不逾五千，而所练越兵殆四十万，守御之役，一任越兵耳。苟得间，则遂人歼齐，指顾间也。余曰：法人究以何道能夷然晏坐，使四十万越兵戢戢受范？客曰：无外援而暴动，能歼之于内，不能拒之于外，此奚待蓍龟者？且前此既屡试矣，事蹶之后，株及邻保，夷及宗族，岂无义愤？不成则独身坐，无足吝者，如父母丘墓何？盖法人所恃以钳制吾越者，无他道

，族诛也

（如进士宋维新以举义旗拒法，全家被

戮），发冢也

（如进士潘廷逢入山聚义十一年，其父尚书潘廷选、伯父潘廷通之冢及母坟，俱被

。以东方野蛮之法律，还治东方之人，如斯而已。余矍然曰：有是哉！以世界第一等专制之中国，近古以来，此种野蛮法律，且几废不用。曾是眴然以文明、人道自命之法兰西，而有是耶？而有是耶！呜呼！今世之所谓文明，所谓人道，吾知之矣。

余曰：贵国人心，愤发若是，亦曾有组织团体以图光复者乎？抑客言贵国民气有余，民智不足？公等志士，曾亦思所以遣子弟游学海外，为自树立之远计者乎？客曰：昔晋惠帝闻民有饥者，咄之曰：“何不食肉糜？”先生之言，母乃类是。吾越今法律，苟非一户眷属。敢有四人集于一室，则缇骑且至，而尚何组织团体之可言？人民在国中由此省适彼省，犹须乞政府之许可，由舟而车，由车而舟，皆易凭照以为符信，不则以奸谍论。往往行百里而易券且至三四也，而遑论适异国以游学也。即有一二欲冒险凿空以出，而父母为戮，坟墓暴骨。谁非人子，其能安焉？呜呼越南，从兹已耳。

客又曰：法人之所以朘削越南者，无所不用其极。其口算之率，初每人岁一元，十年前增倍之，今且三之。人民住宅，梁有税，窗有税，户有税，室增一窗一户，则税率随之。其它城市者，葺一

椽，易一瓦，鸣鼓一声

（按：越人以铜鼓为宗教

品最重之典也，故法吏限制之）

，讌客一度，皆关白山谭所，乞取免許状，不则以违宪论。山谭所者，警察署之称也。免許状，则税十分圆之三也。畜牛一岁税金五，豕一岁税金二三，狗一岁税金一，猫亦如之，鸡则半猫狗之税。盐者，南人所最嗜也，需要之额，殆半于华人。法人既征盐地，又征盐市，前此盐一升值铜货三四十文，今非银货三四元，不能得也。人民之生产者，纳初丁税二元，死亡者纳官验税五元，一户之中，生死稍频繁，遂足以破产，他更何论矣。结婚者例以贄入教堂，号曰“栏街银”，分三等征之：上者二百元，次百元，而下者亦五十也。若乃普通生计，若茶、桂、牙、角以至林木药品（砂仁、豆蔻之类）

，凡一切地货与酒米诸通行品，皆法人掌之，南人莫得营业，有所需则稟呈政府乞买而已。一言蔽之，则法人之立法，使吾越人除量腹而食之外，更无一丝一粟之赢余，然后为快也。呜呼！知我如此，不如无生，彼苍者天，何生此五十兆之僇民为哉？

客又曰：往事不可追矣。吾侪固不敢怨法政府，盖吾越人亦有自取亡之道焉。但使法人务开民智，滋民力，为吾越扫百年腐败政教，使有余地可以自振拔，则百年后，有英雄起而复之，未晚也。其奈既困之，又愚之。呜呼！更数四年，越人必亡者半，更十余年，越无遗类矣。此非过忧，彼诚不以人道视吾族也。客语至此，汨汨不能抑。

饮冰室主人曰：吾与客语，自辰迄酉，笔无停辍。今掇其所述安南现状之一部分者记之如上，顾以吾写哀之笔，未能殫其什一也。呜呼！近世忧愤之士，往往悬拟亡国惨状，播诸诗歌，诤诸说部，冀以耸天下之耳目。岂知此情此景，固非理想所能构，更非笔舌所能摹。谁谓荼苦，其甘如荠。今日吾辈所谓若何若何之惨酷者，彼越南人犹望之如天上也。我哀越南耶？越南哀我耶？请君且勿喧。贱子进一言，我不自哀，岂待十年，自有哀我者耳。

饮冰室主人又曰：今欧洲各国文明，皆滥觞罗马。罗马全盛时代，即略夺其殖民地人民之生命财产，以庄严其都会，以颐使其左右。罗马文明，实无数人类之冤血之苦泪所构结晶体也。天道无亲，惟佑强者。而罗马之声誉，遂数千岁照耀天壤。彼其嗣统之国，若今世所谓欧洲某强某强者，受其心法，以鸱张于大地，施者岂惟一法兰西，受者岂惟一越南？滔滔者天下皆是也。自美国独立以后，而所谓殖民政策者，其形式略一变，前此以殖民地脂膏供母国挥霍者，今略知其非计矣。故英属之澳洲之加拿大，其人民权利义务，与百年前之美国，既大有所异。虽然，此其同种者为然耳。若美之红夷，澳之黑蛮，则何有焉？吾未至印度，不知印度人之权利义务，视越南何如也。若乃日本之在台湾，其操术又皆与此异，彼之计画，盖欲使十年以后，举台湾人而皆同化于日本人也。故恒思所以噢咻之，除其患害而结其欢心，则吾国古代所谓仁政者是也。台湾、越南，同一易主，以表面论，则台湾若天上人矣，但今之越南人，求死不得死。而将来世界上，或犹有越南人，今之台湾人，熙熙焉乐其生，而十年以后，世界上无复台湾人。孰祸孰福？吾亦乌从知之。抑庄生有言：“彼不材之木也，无所可用，故能若是之寿。”台湾区区数十万人，海贼山番，十七八焉。日本之力，足以吞吐融化之而有余，其假借之而被纳之宜尔。若越南以五十兆半开化之国民，其在内者既有可畏之实，然则岂惟法人，任取一国易地以处，其所以抚之者亦如是矣。夫宁不见一年来日本之所以待朝鲜耶？今战争且未集，而第二越南之现象已将见矣。同一日本，而待台湾与待朝鲜，何以异焉？其故可思也。越南且然，朝鲜且然，况乃其可畏什伯于越南、朝鲜者，又何如矣？

饮冰室主人又曰：罗马蛮律，中世史之僵石。自今以往，世界进化之运日新月异，其或不许此种披毛戴角之伪文明种，横行噬人于光天化日下。吾观越南人心而信之，吾观越南人才而信之。

张勤果公佚事

张勤果公曜，立功咸同间，为中兴名将，勋名赫然，然其佚事，少有知者。公少贫，为人赁舂，有奇力，负米累数石。性刚侠，闻不平事，怒眦欲裂。一日负米出，见众围观一少妇，哭欲求死，询之，则夫死不肯嫁，而姑逼之也。公奋曰：“天下岂有此事理者！”时姑方在旁，公即以所负米压其上，毙之，众哄然大快。公乘间遁，亡命河南。时河南捻寇起，民都团结自保，公以武勇为众所服，推为团长。群以行次呼之曰“张大哥”。张大哥之名著汴、宋间。适捻围固始，其令某，儒者也，有女美而才，度城且破，随死无益，乃榜于众曰：“有能守此城者，吾以女妻之。”当是时，寇张甚，咸莫敢应，以推张大哥，且曰：“此艳福非张大哥无可消受者。”公笑而起，进谒令，筹守御，阴念贼众我寡，非出奇，不足取胜。乃以壮士三百，出伏城外，夜三鼓，突起潜袭贼营，城上鸣鼓角应之，呼声震天地，贼大惊溃，终夜汹汹不绝。时忠亲王僧格林沁方以大军来援，未至数里，遥见火光中公往来搏战甚力，惊曰：“是何壮士？”及至劳问，乃公也。大加叹异，因奏署县事，并为公作伐。令遂以女归公，即夫人也。夫人博通古今，娴吏事，为公阅案牒，批窍导要，惊其老吏。公固不知书，任河南布政时，御史刘毓楠劾公目不识丁，遂改总兵。公愤甚，就夫人学，执业如弟子。夫人时诃骂之，公怡然也。后遂通知文史。公自改官，颇不平，数偃蹇朝命。左文襄督师剿回，奏请公领兵，公不应，时严旨趣公，门下客多方说公，皆不应。夫人乃谓公曰：“汝以功自负，数逆上命，将谓朝廷不能杀汝耶？”公闻言蹶起，即往从左公。昨曰：“夫人言可畏，夫人言可畏。”文襄复奏改公文职，后遂巡抚山东，对属吏辄言其夫人之能，且曰：“汝等畏妻否？”或答以不畏者，公正色曰：“汝好胆大，妻乃敢不畏耶？”盖公之畏夫人甚也。

孙文正公饰终之典

宣统元年十月，大学士寿州孙公家鼐薨于位，特旨予谥文正，饰终之典，备极哀荣。国朝谥文正者，自睢州汤公斌，诸城刘公统勋，大兴朱公珪，歙县曹公振鏞，滨州杜公受田，湘乡曾公国藩，高阳李公鸿藻，并寿州而八矣。考宋代而谥文正者，仅得三人，曰王曾，曰范仲淹，曰司马光。明则仅得二人，曰李东阳，曰谢迁。国朝之盛，盖远过之。是八人者，睢州未登揆席，且没后数十年始追谥；湘乡丰功，本应谥文成，以敬避宣宗尊谥，乃改作正；诸城未尝为师傅，是皆与寿州异撰者；自余五公，大兴为仁宗师，歙县为宣宗师，滨州为文宗师，高阳为穆宗师，寿州则德宗师也。重规叠矩，衣钵相承，朝廷所以追崇论恩典学之臣者，殆以文正为备礼耶？顾尝论之，朱、杜、李三相国，皆当宫府危疑之际，具有维持调护之勋，其事甚秘，人间不能详其始末，身后易名之典，所以特从优渥者。夫固有所自来。歙县则值升平暇豫之日，身事长君，无奇节可言，而造膝密谟，殆有为外廷所不及悉者。恭读宣庙赐恤诏书，有“献替不避嫌怨，朕深倚赖而人不知”之语，则其得君之专，固别有在矣。寿州之入侍讲幄也，同列共四人，常熟翁相国同龢实为领袖，其余二人则鄞县张侍郎家骧、钱唐孙侍郎诒经也。鄞县早丧，钱唐以他故罢直，始终其事者惟翁、孙二人。常熟恩遇最深，后沃亦最深，密勿之谋，上常舍寿州而咨常熟，故党人嫉妒者，憾常熟切骨，而于寿州稍恕焉。方德宗亲政之初，即罢毓庆宫而使常熟入军机。盖军机虽日日入觐，恒与同列偕，不比毓庆宫独对，得以从容坐论，重之适所以疏之也。自此危疑日甚，常熟卒放归田里以至削职，而寿州亦以甘盘旧臣，常为忌者所不懌，遂乞骸骨。旋值六飞西狩，不忍君父之难，而自偷安，乃奔诣行在供职，遂正揆席。而数年来卒不获居枢要，仅以闲曹，累进累退，此中消息，非谙于三十年来掌故者，莫能道其详也。今身后而优异之，其亦足以稍慰崇陵在天之灵耶？然以视常熟，则有幸有不幸矣。

苏彝士运河故道

附 岁晚读书录

苏彝士运河故道

同治八年，法人李涉之开苏彝士运河，全世界共诧为不朽之盛业，不知此乃古人之陈迹也。埃及第十九朝第二代之王曰西德者，谋开一运河以沟通于尼罗河与红海之间，未成而殁。其子拉密士继之，遂卒其业。洎第二十六朝第二代之王匿克时故道已湮，匿克踵而修之，广深皆过于昔，凡役工徒十二万人，欲使当时之三橦战舰，可以通航，偶因战乱，遂尔中止。后七十余年，波斯王大流士修之，工遂竣，时希腊史家海罗多德目击之。据其所记，则彼运河所在，距今之苏彝士一英里有半，西北行以沟接于尼罗东部之支流，全径九十二英里，其成于人力者六十四英里云，厥后为土砂所淤。至西历纪元后200年，罗马皇帝沙里查再兴之，亦不久而淤。纪元后六百余年，亚刺伯人征服埃及，其酋阿蛮再兴之，百余年而淤，遂不复开，以迄于李涉。由此言之，今世欧人所诧为掀天震地之伟烈者，数千年前之先民已行之，且不止一再焉。古今人何遽不相及耶？但其地承非洲沙漠之尾闾，淤塞最易，此前代之伟迹，所以不能永其传于后也。即今之苏彝士，亦常以此为患，则李涉之名，能与此河共不朽与否，正未可知耳。今世机器之用大进，人力可以胜天，然则李涉其或遂不朽也。

民兵与佣兵之得失

兵制之于人国，亦重矣哉！其兵为义务而战者，兵愈多则愈强，其兵为报酬而战者，兵愈多则愈弱。此可于吾中国唐府兵与彍骑征之，可于近世英德两国陆军之比较征之，可于古代罗马与加达治之胜败征之。而先例之最古而最显著者，尤莫如埃及。埃及自攘斥牧王、光复旧物以后，四征八讨，不戢其武，而服兵役者皆国中望族。当是时，盖常有胜兵五十万，遂孕出武族之一阶级，其位势优异于齐民，论者或以此为埃及固塞之一原因。斯固然也。然埃及之所以伯九有，亦实在是。及第二十六朝以后，（当我战国间）

希腊人之侨于埃及者日众，埃王广募以为兵，本国武族不胜愤懣，相率而去国者数万人，埃及遂自兹不复振，展转以夷于附庸。谓希腊军人之资格不逮埃及耶？彼希人固以此时代电扫三洲，莫之能御矣。然自为战则勇，而为埃及人战则怯，岂有他哉？吾弟则爱之，秦人之弟则不爱也。此真古今得失之林也。

治具与治道

太史公曰：“法令者，治之具，而非制治清浊之源也。”可谓至言。近世之立宪国，学者亦称之为法治国。吾国人慕其名，津津然道之，一若彼国中舍法之外，即无所以为治者。不知法乃其治具，而所以能用此具者，别有其道焉。苟无其道，则虽法如牛毛，亦不过充架之空文而已。故全世界中立宪国以数十计，而其声光烂然日进无疆者，仅数国也。道者何？曰官方，曰士习，曰民风而已。此其言虽若老生常谈，闻者鲜不以为迂。然舍此以外，则实无可以厝国于不拔之途。真欲救国者，可能无急哉！贾子亦曰：“今世以侈靡相竞，弃礼仪捐廉耻日甚，可谓月异而岁不同矣。而大臣特以簿书不报期会之间，以为大故，至于俗流失，世坏败，因恬而不知怪。夫移风易俗，使天下回心而乡道，类非俗吏之所能为也。俗吏之所务，在于刀笔筐篋，而不知大体。”呜呼！是不啻为今日言之矣。

学问与禄利之路

太史公作《儒林列传》曰：“余读功令，至于广厉学官之路，未尝不废书而叹也。”读者不得其解，谓是史公叹美当时儒学之盛，此误也。《史记》一书，凡称“废书而叹”者三：其一则《十二诸侯年表》称读《春秋》历谱牒至周厉王；其二则《孟子荀卿列传》称读《孟子》书至梁惠王问何以利吾国；并此文而三。皆以叹息于世运升降之大原也。盖古之学者，为学而学，自广厉学官之制兴，于是学者始为官而学。为官而学，学自此湮矣。故史公既历举六国及楚汉之交，齐鲁儒生之抱道自重，复举叔孙通、公孙弘以后公卿士夫之趋时承流，两两比较，而无限感慨，系于言外。班孟坚深知其意，故直揭曰：“禄利之路然。”诚耻之诚伤之也。日人后藤新平，治台有声，吾尝询以台湾教育之状，答曰：台人非欲仕进者，则不愿就学；欲教育之普及，殊非易易。吾闻其言而欷歔不能自禁。夫台人此种思想，受诸故国者也。而全国中此等思想，则自汉开禄利之路以后，相传以迄今日，而痼疾中于膏肓者也。故科举一废，而举国几无复向学之人。学堂及外国留学生所以不绝者，恃变形之科举以维持之耳。欧美、日本，几于无人不学，而应文官试验者，不及百之一。此正乃学之所以盛也。我中国若不能将学问与禄利分为二事，吾恐学之绝可计日而待矣。

不悦学之弊

左氏昭十八年《传》：鲁人有见周原伯者，与之语，不说学，归以语闵子马。闵子曰：“周其乱乎！夫必多有是说。而后及其大人，大人患失而惑。”又曰：“可以无学，无学不害，不害而不学，则苟而可。于是乎下凌上替，能无乱乎？”呜呼！何其言之似为今日言之也。我国数千年来不悦学之风，殆未有甚于今日者。《六经》束阁，《论语》当薪，循此更阅十年，则千圣百王之学，精华糟粕，举扫地以尽矣。或曰：今者新学方兴，则旧学之消沉，亦非得已。日本明治初年，其前事也。虽然，日本前此之骛新学，则真能悦之而以所学名其家与传其人者辈出焉。日本之有今日，盖学者之功最高。我则何有？治新学者，以之为应举之敲门砖而已。门辟而砖旋弃，其用恰与前此之帖括无以异。夫前此学子虽罔不困于帖括，而帖括以外，必尚有其所学者。其所学之致用与否勿俱论，要之，舍肉欲外，更有此以供精神上之愉快，于以维系士夫之人格，毋使堕落太甚，而国家元气，无形中往往受其赐。今也旧学则视为无用而唾弃之矣，至其所谓有用之新学，其价值乃仅得比于帖括。吾国需此变形之帖括，何为也哉？《孟子》曰：“上无礼，下无学，丧无日矣。”是岂可不为寒心也。

警偷

左氏文十七年《传》：襄仲如齐，复曰：“臣闻齐人将食鲁之麦，以臣观之，将不能。”齐君之语偷，臧文仲有言曰：“民主偷必死。”明年，齐人弑其君商人。昭元年《传》：天王使刘定公劳赵孟于颖。刘子曰：“子盍远绩禹功而大庇民。”对曰：“老夫罪戾是惧，焉能恤远？吾侪偷食，朝不谋夕，何其长也。”刘子归，以语王曰：“赵孟将死矣。为晋正卿以主诸侯，而侪于隶人，朝不谋夕，弃神人矣。”是年冬，赵孟卒。夫于言语之间，而以悬断人寿命短长之数，其理若甚幽眇不可凭。实乃不然，人之所以托命于天地者，则精神为之君。偷也者，苟且图安于旦夕，而不恤其后者也。后之不恤，其精神衰哉耗矣，精神耗而营魄能存，未之闻也。此心理与生理相属之至道也。岂惟个人心理有之，即社会心理亦然。举国人而有偷食朝不谋夕之心，国未有不亡者也。故吴季札听郑乐而卜其先亡，锡西罗于西罗马之末叶，而决其不可救，亦于其人民之心理察之而已，故孔子以民不偷为贵。今吾国内治之艰巨，外侮之凭凌，壹不足惧，而惟君民上下之习于偷为足惧。苟不思警，其何以十稔？

雪浪和尚语录二则

梅长公问和尚：“如此世界坏极，人心坏极。佛菩萨以何慈悲方便救济，请明白提出，勿以机锋见示。”和尚以手作圆相曰：“国初之时，如一锭大元宝相似。”长公疾呼曰：“开口便妙了。速道，速道。”和尚曰：“这一锭银，十成足色，斩碎来用，却块块是精的。人见其太好，乃过一炉火换一分铜，是九成了。九成银也还好用，再过第二手又换一分，是八成了。八成后换到第三、第四乃至第七、八手，到如今只见得是精铜无银气矣。”长公曰：“然则如何处置？”和尚曰：“如此则天厌之，人亦厌之，必须一并付与大炉火烹炼一番，铜、铅、铁、锡销尽了，然后还他十分本色也。”长公曰：“如此则造物亦须下毒手也。”和尚曰：“不下毒手，则天地不仁，造化无功，而天地之心，亦几乎息矣。”

和尚尝示诸门弟子曰：“天地古今，无空阙之人，无空阙之事，无空阙之理。自古圣人，不违心而择时、舍事而求理，以天下之事是吾本分之事，以古今之事是吾当然之事。所以处治处乱处吉处凶，皆是心王游衍大中至正之道。今人动以生不逢时，权不在我为恨。试问你：天当生个甚么时候处你才好，天当付个甚么权与你才好？我道恨时恨权之人，皆是不知自心之人，故有悖天自负之恨。又安知死死生升升沉沉，皆是自己业力哉！你不知自心业力强弱，不看自己种性、福德、智慧、才力、学行、造诣、机缘还得中正也无，却乃恨世、恨时、恨人、恨事，且道天生你在世间，所作何事。分明分付许多好题目与你做，你没本事，自不能做。如世间庸医，不恨自己学医不精，却恨世人生得病不好。天当生个甚么好病，独留与你医？成你之功？佛祖圣贤，将许多好脉诀好药性好良方好制法留下与你，你自心粗，不能审病诊脉量药裁方，却怪病不好治。岂神圣工巧之医哉？你不能医，则当反诸己，精读此书深造此道，则自然神化也。果能以诚仁信义，勉强力行，向上未有不造到圣贤佛祖地位，向下未有不造到英雄豪杰地位。今人果知此义，则自不敢恨生不逢时、权不在我，自为暴弃之人也。”

沧江主人曰：和尚可谓狮子吼也已！其所谓大炉火烹炼一番者，即陆象山所谓激励奋迅抉破罗网焚烧荆棘荡夷污泽。吾辈心境陷溺既久者，非用此一番工夫，则无以自进于高明。而欲救举世人心之陷溺，舍此亦更无其道。但当用何种手段以行烹炼，则吾至今犹未能得其法耳。其箴流俗恨时恨权之蔽，真乃一捧一条痕，一捆一掌血。今国中顽钝无耻之小人不足责，其号称爱国之士君子，殆莫不以“生不逢时”“权不在我”二语自饰，遂相率委国事于不问。吾以为疾风知劲草，盘错别利器，时势愈艰，则英杰愈当思所以自效。吾侪生此时，天之所以厚我者至矣。若权之云者，则岂必其尸君相之位乃始有之？一介之士皆可有焉，特其种类及其作用有不同耳。谓时势地位可以困人，无有是处，其见困者，皆自暴自弃之结果耳。万险万难，皆可拯拔，惟举国人皆自暴自弃，则真无可言者。何也？以其既造此恶业力，则所受之报，未有不与之相应也。难者曰：今既举国人相率以造此恶业力，欲以一二人与之抗，无异捧土以塞孟津，亦何能为？然则谓时势不能困人之说非也。应之曰

：佛法最明熏习之义，恶根固能熏善根以随染，善根亦能熏恶根以向净，而凡所熏者，以一部分成为个人所得之业，以一部分成为社会所得之业，而应报之迟速大小，则视其熏力之强弱何如。孰谓一二人不足以易天下也？彼圣贤佛祖，岂并时而斗量车载者哉！就令未能立挽狂流，亦当期效于方来。盖社会之生命，赒续而无极者也。自古虽极泯彝之世，未尝无一二仁人君子，自拔流俗，而以其所学风天下。而乾坤之所以不息，吾侪之所以不尽为禽兽，皆赖此一二仁人君子心力之赐也。即国家之事，一切不许我自效，若乃自效于此，则谁能禁之？夫苟能自效于此，则所效者已大矣。是故人生在世，终无可以自暴自弃之时，而凡持厌世主义者，皆社会之罪人，天地之罪人也。

雪浪和尚者，明季大德，与憨山大师同称法门龙象者也。

使法必行之法

《商君书·画策篇》云：“国之乱也，非其乱法也，非法无用也。国皆有法，而无使法必行之法。”呜呼！何其一似为今日言之也。数年来新颁之法令，亦既如牛毛矣。其法之良否勿论，要之诸法皆有，惟使法必行之法则无之。夫法而可以不必行，是亦等于无法而已。是法治之根本已拔，而枝叶更安丽也。中国而长此不变，则法愈多愈速其乱而已，然则使法必行之法维何？则君民共守之宪法是已，而举其实必赖国会。

然则专制国遂绝无使法必行之法乎？曰：亦有之。上戴英断之君主，而佐以公忠明察之宰相，则法亦可以使必行。君相苟非其人，而复无国会，则凡百之法，皆益乱者也。

治治，非治乱

《荀子》曰：“君子治治，非治乱也。然则国乱将不治欤？曰：‘国乱而治之者，非案乱而治之之谓也，去乱而被之以治。人污而修之者，非案污而修之之谓也，去污而易之以修。故去乱

而非治乱也，去污而非修污也。’”（《不苟篇》）

呜呼！治道尽于是矣，今中国之言治者，皆案乱而治之者也。数百年来之积弊，皆珍惜保袭之，不肯损其毫末，而日日施行新政不暇给。此犹治病者，未能祛寒热邪感，而贸贸然进以参、苓，其死于参、苓必矣。董子曰：“琴瑟不调甚者，必解而更张之，乃可鼓也。为政而不行甚者，必变而更化之，乃可理也。”此去乱而被之以治之说也。

君主无责任之学说

君主无责任，为近世立宪政体之一大义。而我国周秦诸子实已发明之。《慎子》云：“君臣之道，臣有事而君无事也。君逸乐而臣任劳，臣尽智力以善其事，君无与焉，仰成而已。事无不治，治之正道然也。人君自任而务先下，则是代下负任蒙劳也，臣反逸矣。故曰：君人者，好为善以先下，则下不敢与君争善以先君矣。皆称所知以自掩覆，有过则臣反责君，逆乱之道也。君之智未必最贤于众也，以未最贤而欲善尽被下，则下不赡矣。苟君之智最贤，以一君而尽赡下则劳，劳则有倦，倦则衰，衰则复返于人，不赡之道也。是故人君自任而躬事，则臣不事事也，是君臣易位也，谓之倒逆，倒逆则乱矣。”（《民杂篇》）

《尸子》曰：“夫使众者，诏作则迟，分地则速，是何也？无所逃其罪也。言亦有地，不可不分也。君臣同地，则臣有所逃其罪矣。”（《发蒙篇》）

《管子》亦云：“心不为五窍，五窍治；君子不为五官，五官治。”（《九守篇》）

又云：“以上及下事，谓之矫。”又云：“为人君者，下及官中之事，则有司不任。”（俱《君臣篇》）

今日中国之患，全在有司不任而有所逃其罪，非直逃其罪，乃反责过于君。而其所以至此者，则以君臣同地，而君代下负任蒙劳故也。三子之言，于君主所以必须无责任之故，发挥无余蕴矣。

所令与所好

《大学》曰：“尧、舜率天下以仁，而民从之；桀、纣率天下以暴，而民从之；其所令反其所好，而民弗从。”可谓至言。今之政府，皆所令反其所好者也。盖今所谓立宪，所谓行政改革，乃至所谓一切新政，类无一非政府官吏所深恶痛绝，而顾乃以此令于僚属，以此令于人民，受令者早有以窥其隐矣。故从令者不得赏，不从令者不得罚。不宁惟是，不从令者反得赏，从令者反得罚，往往而见也。以此而欲天下之从之，安可得耶？夫尧、舜率天下以仁，固善矣。即桀、纣率天下以暴，然犹悬一宗旨以为率，而欲纠正之者犹有其的，反动力之起，犹有因缘也。若所令反其所好，则欲献可而所可者不待人献，欲替否而所否者不胜其替，则末如之何也已矣。鲁子家子曰：呜呼！吾其为无望也夫。

好修

《楚辞》曰：“何昔日之芳草兮，今直为此萧艾也。岂其有他故兮，莫好修之害也。”吾比年来所见人士，夙相期许者，往往不及数稔，便尔堕落。其堕落之形态，亦有两途。宦达于时，沉溺于声色货利，以此为天下之至乐，而弃所学所志若敝屣者，一也。潦倒不得志，则嗒然自丧，奄奄无复生人气，若已僵之蚕，旦夕待死者，二也。推原其故，岂由性恶，亦曰所以自养者无其具耳。凡人于肉体之外，必更求精神上之愉快，乃可以为养。此即屈子好修之说也。好修之道有二：一曰修德，二曰修学。修德者，从宗教道德上，确有所体验，而自得之于己，则浩然之气终身不衰，自能不淫于富贵，不移于贫贱。此最上也，但非大豪杰之士，未易臻此造诣，则亦当修学以求自养。无论为旧学为新学，苟吾能入其中而稍有所以自得，则自然相引于弥长，而吾身心别有一系著之处，立于扰扰尘劳之表，则外境界不能以相夺。即稍夺矣，亦不至如空壁逐利者，尽为敌据其本营而进退无据也。其道何由？亦曰好修而已矣。今日中国人心风俗之败坏，实为数千年来所无，此恶浊社会，正如一大洪炉，金银铜铁砾石，入者无不融化；又如急湍旋涡，入者无不陷溺。吾于芳草之变萧艾者，惟有怜之耳，岂忍责之？且即吾身之能免融化能免陷溺否，尚不敢自保，又安能责人？惟吾辈正以处此社会之故，其危险之象，不可思议，愈不得不刻刻猛省，而求所以自卫。自卫之道，舍好修无他术矣。夫吾辈一二人之融化陷溺，似不足深惜，而不知国家之命，实托于吾辈少数人之手，弱一个则国家之元气斫丧一分，而此所斫丧者，皆其不可复者也。嗟嗟吾党，如之何勿惧？屈子又曰：“固时俗之从流兮，又孰能无变化。”又曰：“人生各有所乐兮，吾独好修以为常。”

怨天者无志

《荀子·荣辱篇》云：“自知者不怨人，知命者不怨天。怨人者穷，怨天者无志。失之己，反之人，岂不迂乎哉？”呜呼！君子读此，可以审所自处矣。人之穷也，国之悴也，未有不由自己业力所得者也。欲挽救之，惟努力以造善业耳。荀子于怨天者，不责以他，而直谓之无志，可谓鞭辟近里矣。或曰：既云“知命者不怨天”，又云“怨天者无志”，夫命固一定而不易者也，虽有志其奈之何？此二义得无矛盾？应之曰：不然。天亦何能尽人而一一为之定命。命也者，各人以前此业力所自造成者也。既已造成，则应业受报，丝毫无所逃避，无所假借。谓之有定，斯诚然矣；谓之不易，则不可也。何也？造之惟我，易之亦惟我也。故《孟子》亦曰：“修身以俟之，所以立命也。”明乎立命之义，则荀子之所谓志者可识矣。

欲恶取舍

《荀子·不苟篇》云：“欲恶取舍之权，见其所欲也，则必前后虑其可恶也者；见其可利也，则必前后虑其可害也者。而兼权之熟计之，然后定其欲恶取舍，如是则常不失陷矣。”今人之所以求富贵利达者，惟见可欲可利，而不知其后有可恶可害者存，是得为智者矣乎？